



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.


About Google Book Search

Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>



THIS BOOK
IS FROM THE LIBRARY OF
ELMER JAMES BAILEY

BV
4820
AI
1751



THE GIFT OF
HAYWARD KENISTON
PROFESSOR OF ROMANCE LANGUAGES

Imitatio Christi

DE

IMITATIONE
CHRISTI,

LIBRI QUATUOR,

AUCTORE THOMA A KEMPIS.

RECENSITI ADFIDEM AUTOGRAPHI

ANNI M. CCCC. XLI.

CUM VITA EJUSDEM THOMAE,

PER

HERIBERTUM ROSWEYDUM,

SOCIETATIS IESU.



GLASGUAE,

IN AEDIBUS ACADEMICIS

EXCEDEBANT ROBERTUS ET ANDREAS FOULIS,

ACADEMIAE TYPOGRAPHI,

M.DCC.LI.

11

Prof. H. Haywards Kennerly
P-13-45 [iii]

LIBRI HUIUS

ELOGIUM.

LIBELLUS hic ab omni aevo viris sanctissimis ita familiaris fuit, ut Pius V, S. Carolus Borromaeus et Bellarminus Cardinales, cum viae vitaeque suae comitem semper adsciverint: ex hoc S. Philippus Neri religiosum spiritum imbibit; eo Alexander Saulius Papiensis Episcopus animum suum gravissimis dioecesis suae curis distractum refecit et oblectavit. hunc Joannes Vendvillius, Tornacensium in Belgio Antistes, eo loco habuit, ut quoties Thomam a Kempis sibi deposceret (quod indies factitabat) non alia voce, quam **DALIBRUM**, κατ' ἰσοχὴν uteretur. denique communis omnium nostrum parens, ac dux, S. IGNATIUS, filiis suis eum librum maxime commendavit. quo factum est, ut nullum pene in Societatis nostrae domiciliis cubiculum sit, cujus auctor iste non sit

velut vernaculus. Rex quoque Mauritaniae tanti libellum hunc fecit, ut, vulgari Turcarum lingua conversum, in Bibliotheca sua religiose servarit, et omnibus Mahumetanorum libris praetulerit.

[v]

TESTIMONIA,

QUIBUS

THOMAS A KEMPIS

AUCTOR ASSERTITUR LIBRORUM

DE

IMITATIONE CHRISTI.

§. I. AUCTORITATE VARIORUM
MSS. QUI NOMEN THOMAE A
KEMPIS HIS LIBRIS MANIFESTE
PRAEFIXUM HABENT.

PRIMO, Lovanii, in monasterio Canonorum Regularium vallis sancti Martini, servatur Catalogus MS. variarum Bibliothecarum Belgii, circa annum M. cccc. lxxxvii conscriptus, forma oblonga, qui continet varios libros MSS. diversorum auctorum. inter alia opera Thomae a Kempis, quae in variis monasteriis MSS. esse designat, exhibet etiam libros de Imitatione Chris-

ti: quae MSS. ejus nomine exstare in hisce monasteriis affirmat: in Campo Cistertiensium prope Bercham, in Gaesdonck Regularium prope Goch, apud Martinieneses Lovanii, apud S. Catharinae Regulares prope Noviomagum, apud Regulares prope Endoviam.

Secundo, In eodem monasterio reperiuntur duo alii Catalogi MSS. simul juncti, duorum monasteriorum, titulo *Canonicorum Regularium*, videlicet, *registrum* librariae in Domo B. Mariae Virginis prope Endoviam, forma octava; itemque *registrum* librariae monasterii Fontis B. Mariae prope Arnhem, scriptum anno Domini M. cccc. lxxxi. *registrum* Endovienfenonnulla Thomae a Kempis nomine opuscula repraesentat; interque ea etiam libros de Imitatione Christi.

Tertio, In supradicta Martinienfium Bibliotheca servatur nomine Thomae a Kempis liber, qui continet Hortulum Rosarum, deinde librum 1, tum 4, ac denique 3, de Imitatione Christi. ad cujus finem adscriptum est eadem manu: *explicium tractatus quatuor Thomae de*

Kempis devoti et interni, scripti, illuminati et ligati per manus Fr. Simonis Jacobi de Leidis, professi in Lydendorp, pro tunc focii rectoris hujus monasterii sanctimonialium antiquarum in Amstelrodam, an. Domini M. CCCC. LXXXII.

Quarto, In eadem Bibliotheca servatur alius ejusdem auctoris codex, qui haec verba praefert: in hoc libello continentur subjecta opuscula Fr. Thomae Kempis, &c. inter quae unum ita inscribitur: incipit liber primus Fr. Thomae Kempis, Canonici Regularis, de Imitatione Christi, et contemptu omnium vanitatum mundi. deinde sequitur 2, 3, et 4. atque in fine: ultimâ Decembris finientis anni M. D. XXIV.

Quinto, Rinsbergae, celebri Dioecesis Colonienfis ad Rhenum oppido, in monasterio Canoniorum Regularium S. Augustini, membranaceus codex per antiquus visitur, qui, nomine Thomae a Kempis, praefixo, libros de Imitatione Christi continet.

Sexto, Admodum R. D. Paulus Schooff, Prior Rubrae Vallis, et Generalis Canoniorum Regularium congre-

gationis Windefemensis, penes se habuit ex monasterio majore Maseykenfi Regularium, librum de Imitatione Christi, scriptum anno M. cccc. lxxvii manu Domini Cornelii Offermans, Rectoris quondam Conventus Maseykenfis; qui compositum esse refert a Fr. Thoma de Kempis.

Septimo, Admodum R. D. Albertus Luykenius, cum Prior esset Canonico-rum Regularium Coloniae ad Corpus Christi, et ejusdem Ordinis sub Capitulo Windefemensis Generalis, testatus est, se in variis Germaniae Bibliothecis, librum de Imitatione Christi, Thomae a Kempis nomine praefixum, vidisse, tum in variis indicibus, tum in libris ipsis, ita perscribens: vidi ego Indices Bibliothecarum quarundam domorum Ordinis nostri antiquos, et antiqua fide scriptos, qui exemplaria MSS. Imitationis Christi Thomae adscribebant. vidi ego eundem per partes in antiqua membrana et charta scriptum, interdum nullo ordine capitum vel librorum servato, interdum cum Auctoris nomine,

interdum sine illo, aut hac adscriptione :
Pii alicujus Fratris.

Octavo, R. P. Joannes Hasius, multis in Societate nostra per Germaniam perfunctus officiis, Rector, Provincialis, literis suis testatur, passim codices MSS. librorum de Imitatione Christi, praesertim in Regularium Canoniconum monasteriis reperiri, etiam ipsius Thomae aetate exaratos, qui nomen ejus, tamquam Auctoris, praeferant. cujusmodi, inquit, ante aliquot annos reperi Confluentiae in Collegio nostro, cui obvenerant plerique codices a desolato Regularium monasterio.

Nono, Augustae Vindelicorum in monasterio S. Crucis, Canoniconum Regular. S. Augustini, asservatur codex MS in 4, absolutus, ut in fine additur, anno M. cccc. xl, 16 Decembr. ad calcem eadem manu additur: Compiler hujus Opusculi fuit quidam Fr. Thomas nomine, de conventu et Ordine Canoniconum Regular. Ordinis S. Augustini, Montis S. Agnetis Trajectensis.

§. II. AUCTORITATE MSS. AUTOGRAPHORUM, QUI NOMEN QUIDEM THOMAE NON PRAESCRIBUNT, SED TAMEN NUNC LIBRUM INDUBITATIS EJUSDEM AUCTORIS OPERIBUS INSERTUM VEL ADJUNCTUM HABENT.

Primo, Codex Canoniconum Regularium Montis S. Agnetis, ubi Thomas vixit et scripsit (qui nunc Antverpiae in domo Professa Societatis Iesu thesauri instar adservatur) manu Auctoris scriptus in 16, continet quatuor de Imitatione Christi libellos, pluribus ejusdem Thomae Opusculis initio praefixos: in quorum omnium fine subscripsit: finitus et completus anno Domini M. cccc. xli, per manus Thomae Kempis, in Monte S. Agnetis prope Swollis.

Secundo, Lovanii apud Martinenses etiam fervatur codex in 8, trium librorum de Imitatione Christi, quarto omisso, aliis ejus Opusculis in medio insertus, quem D. Joannes Ulimmerius,

illius olim monasterii Prior, testatur se ante multos annos accepisse a Fratribus Montis S. Agnetis; qui affirmabant eum manu Thomae a Kempis scriptum, ab eoque compositum, uti per traditionem continuam a maioribus suis ejusdem monasterii Fratribus acceperant.

§. III. TESTIMONIO AUCTORUM,
QUI THOMAE A KEMPIS VEL CO-
AEVI VEL SUPPARES FUERE.

PRIMO, Joannes Buschius ipsi Thomae non solum coaevus, sed etiam familiaris, ejusdemque ordinis in vicino Thomae monasterio Canonicus Regularis, in Chronico Windefemensi, l. 2. c. 21, ita ait: contigit ante paucos dies sui obitus (Joannis Heusden Prioris in Windefem) ut duo Fratres notabiles de Monte S. Agnetis, prope Swollis, Ordinis nostri, dictum Priorem nostrum sub certis rebus consulturi, in Windefem advenirent. quorum unus Fr. Thomas de Kempis, vir probatae vitae, qui plures devotos libros composuit, videlicet: Qui sequitur me. de Imitatione

Christi. potestne clarius certiusve testimonium adduci? scripsit haec ille anno Domini M. cccc. LXIV, Thoma etiamnum superstiti. qui in Praefatione dicit se scripturum, quae oculata fide coram positus vidi, audiui, inspiratus sum.

Secundo, Auctor Compendii vitae Thomae a Kempis, impressae cum ejusdem Operibus, Norimbergae, anno M. cccc. xciv, ejusdem pene aevi, in qua fidem suam et aetatem prodit, dum ait: se adhuc plura de ipsius conversatione audivisse a Fratribus illius Conventus, qui tum adhuc vivebant, attribuit illi Tractatum de Interna Christi locutione ad animam fidelem, qui est tertius liber de Imitatione Christi, citatque thema capitis secundi: scilicet, Loquere, Domine, quia audit servus tuus.

Tertio, Joannes Mamburnus, etiam ipsi Thomae vel coaetaneus, vel non diu post ejus mortem in eodem S. Agnetis monasterio Canonicus Regularis, quaedam ex his libris nomine Thomae a Kempis citat in Roseto suo, tum §. 3, Diaetarii Exercitiorum, de celebratione

Missarum, tum in Scala Communionis, Tit. 6, Alphabeto 22, §. 4.

Quarto, Joannes Geyler Keyserbergius, celeberrimus Argentinae concionator, qui natus est an. M. cccc. XLV, cum Thomas noster in flore esset, et libros spirituales conscriberet, in Navicula seu Speculo fatuorum, aliquoties citat Thomae a Kempis nomine sententias, ex libris de Imitatione Christi productas.

Quinto, Petrus Schottus Argentoratis Canonici, qui vixit tempore Thomae a Kempis, in fine Vitae Joannis Gersonis (quam scripsit anno M. cccc. xci.) operibus ejus praefixae : alii, inquit, Tractatus, qui Gersonio nonnumquam tribuuntur, et tamen auctorem certum habent, ut est libellus de Contemptu mundi (is ipsius est de Imitatione Christi, de quo agimus) quem constat a quodam Thoma Canonico Regulari editum, et alii plures, non sunt his Operibus inserti. ubi nota, Auctorem hunc loqui non sub dubio, vel per verbum fertur; sed per verbum constat, quod ea res certissima esset.

Sexto, Joannes Trithemius jam olim variarum Bibliothecarum lustrator, libro de Viris illustribus Germaniae (quem se scripsisse testatur anno M. cccc. xci.) et libro de Scriptoribus Ecclesiasticis (quem scripsit anno sequenti) Thomae a Kempis libros de Imitatione Christi manifeste attribuit.

§. IV. AUCTORITATE VETUSTISSIMARUM EDITIONUM, ET VI-
RORUM GRAVISSIMORUM JU-
DICIO.

PRIMO, Quod ad editiones attinet, libellus hic de Imitatione Christi exstat typis excusus, una cum aliis Thomae a Kempis Operibus, Norimbergae in folio, anno M. cccc. xciv. Parisiis, anno M. D. xx. et anno M. D. xxi, cum hac adjunctione: quod hi libri perperam M. Joanni Gerson adseribantur, cum stylus totus Teutonicam redoleat phrasim. in Bibliotheca Augustana servatur codex impressus, qui eidem Thomae a Kempis tribuit hunc librum. in prima autem pagina ista MSS. legun-

tur: iste liber emptus est a Conventu Augustensi Ordinis Fratrum Carmelitarum, anno M. cccc. lxxxvi. unde patet, hanc editionem esse superioribus tribus antiquiorem, quod ipsum arguunt inconditi rudissimi que characteres. omitto alias editiones quam plurimas, quae deinde secutae sunt, hunc librum inter Opera Thomae a Kempis repraesentantes, vel etiam separatim sub nomine ejusdem Auctoris exhibentes.

Secundo, Quod iudicium virorem gravissimorum spectat, cum jam produxerim auctoritatem doctissimorum virorum, qui Thomae aetate vixerunt, non magnopere quispiam requireret iudicia recentiorum Auctorum. ne quis tamen existimet omnes antiquos errasse, donec nuperus Scriptor opinione sua errorem detegeret, quemdam Joannem nunc Gesen, nunc Gessen, nunc Gersen (ô infidam tabularum Nominalium fidem! quas etiam vult ab Auctore ipso scriptas vel dictatas) ex putatio forte Gerson depravatum introducendo; unus Illustriss. Cardinalis Bellarmini, viri acerrimo iudicio praediti, verba subjici-

am, qui visis et perpenſis utrimque rationibus, ita anno M. DC. XXI, in Catalogo ſuo Eccleſiaſticorum Scriptorum, poſt reſenſita Thomae a Kempis opera, edi curavit: ſcriptos et compoſitos eſſe ab eodem Thoma libros de Imitatione Chriſti ſupraſcriptos, contrariis conjecturis everſis, demonſtrat evidenter in Vindiciis Kempenſibus Heribertus Roſweyduſ, Societatis Ieſu: cujus mihi rationes pleniffime ſatiſfecerunt, et ſententiam penitus amplector.

I N D E X

LIBRORUM ET CAPITUM.

L I B E R P R I M U S.

ADMONITIONES, AD SPIRITUALEM VITAM UTILES.

C A P U T I.

D E imitatione Christi, et contemptu omnium vanitatum mundi.	pag. 1
II. De humili sentire sui ipsius.	3
III. De doctrina veritatis.	4
IV. De providentia in agendis.	7
V. De lectione sanctarum Scripturarum.	ib.
VI. De inordinatis affectionibus.	8
VII. De vana spe, et elatione, fugienda.	9
VIII. De cavenda nimia familiaritate.	10
IX. De obedientia, et subjectione.	11
X. De cavenda superfluitate verborum.	12
XI. De pace acquirenda, et zelo proficiendi.	13
XII. De utilitate adversitatis.	15
XIII. De tentationibus resistendis.	ib.
XIV. De temerario iudicio vitando.	18
XV. De operibus ex caritate factis.	19
XVI. De sufferentia defectuum aliorum.	20
XVII. De monastica vita.	22

XVIII. De exemplis sanctorum Patrum.	23
XIX. De exercitiis boni Religiosi.	25
XX. De amore solitudinis et silentii.	28
XXI. De compunctione cordis.	31
XXII. De consideratione humanæ miseriæ	33
XXIII. De meditatione mortis.	36
XXIV. De iudicio, et poenis peccatorum.	39
XXV. De ferventi emendatione totius vitæ nostræ.	42

L I B E R S E C U N D U S.

ADMONITIONES, AD INTERNA TRAHENTES.

C A P U T I.

D E interna conversatione.	47
II. De humili submissione.	50
III. De bono pacifico homine.	51
IV. De pura mente, et simplici intentione.	53
V. De propria consideratione.	54
VI. De lætitiâ bonæ conscientiae.	55
VII. De amore Iesu super omnia.	57
VIII. De familiari amicitia Iesu.	58
IX. De carentia omnis solatii.	60
X. De gratitudine pro gratia Dei.	63
XI. De paucitate amatorum crucis Iesu.	66
XII. De Regia viâ sanctæ Crucis.	68

LIBERTERTIUS.

DE INTERNA CONSOLATIONE.

CAPUT I.

- D**E interna Christi locutione ad animam fidelem. 74
- II. Quod veritas intus loquitur sine strepitu verborum. 75
- III. Quod verba Dei cum humilitate sunt audienda: et quod multi ea non ponderant. 76
- IV. Quod in veritate et humilitate coram Deo conversandum est. 79
- V. De mirabili effectu divini amoris. 81
- VI. De probatione veri amatoris. 84
- VII. De occultanda gratia sub humilitatis custodia. 86
- VIII. De vili aestimatione sui ipsius, in oculis Dei. 89
- IX. Quod omnia ad Deum, sicut ad finem ultimum, sunt referenda. 90
- X. Quod spreto mundo, dulce est servire Deo. 91
- XI. Quod desideria cordis examinanda sunt, et moderanda. 93
- XII. De informatione patientiae, et luctamine adversus concupiscentias. 95
- XIII. De obedientia humilis subditi, ad exemplum Iesu Christi. 97

- XIV. De occultis Dei judiciis considerandis,
ne extollamur in bonis. 98
- XV. Qualiter standum sit ac dicendum, in
omni re desiderabili. 100
- XVI. Quod verum solatium in solo Deo est
quaerendum. 101
- XVII. Quod omnis sollicitudo in Deo statu-
enda sit. 103
- XVIII. Quod temporales miseriae, exemplo
Christi, aequanimiter sint ferendae. 104
- XIX. De tolerantia injuriarum, et quis ve-
rus patiens probetur. 105
- XX. De confessione propriae infirmitatis, et
hujus vitae miseriis. 107
- XXI. Quod in Deo super omnia bona et do-
na requiescendum est. 109
- XXII. De recordatione multiplicium benefi-
ciorum Dei. 112
- XXIII. De quatuor magnam importantibus
pacem. 114
- XXIV. De evitatione curiosae inquisitionis
super alterius vita. 117
- XXV. In quibus firma pax cordis, et verus
profectus, consistit. 118
- XXVI. De eminentia liberae mentis, quam
supplex oratio magis meretur, quam
lectio. 119
- XXVII. Quod privatus amor a summo bono
maxime retardat. 121
- XXVIII. Contra linguas obrectatorum. 123

- XXIX. Qualiter, instante tribulatione, Deus invocandus est, et benedicendus. 123
- XXX. De divino petendo auxilio, et confidentia recuperandae gratiae. 124
- XXXI. De neglectu omnis creaturae, ut Creator possit inveniri. 127
- XXXII. De abnegatione sui, et abdicatione omnis cupiditatis. 129
- XXXIII. De instabilitate cordis, et de intentione finali ad Deum habenda. 131
- XXXIV. Quod amanti, sapit Deus super omnia, et in omnibus. 132
- XXXV. Quod non est securitas a tentatione in hac vita. 133
- XXXVI. Contra vana hominum iudicia. 135
- XXXVII. De pura et integra resignatione sui, ad obtinendam cordis libertatem. 136
- XXXVIII. De bono regimine in externis, et recursum ad Deum in periculis. 138
- XXXIX. Quod homo non sit importunus in negotiis. 139
- XL. Quod homo nihil boni ex se habet, et de nullo gloriari potest. 140
- XLI. De contemptu omnis temporalis honoris. 142
- XLII. Quod pax non est ponenda in hominibus. 143
- XLIII. Contra vanam et secularem scientiam. 144

- XLIV.** De non attrahendo sibi res exteriores. 145
- XLV.** Quod omnibus non est credendum et de facili lapsu verborum. 146
- XLVI.** De confidentia in Deo habenda, quando insurgunt verborum jacula. 148
- XLVII.** Quod omnia gravia, pro aeterna vita sunt toleranda. 151
- XLVIII.** De die aeternitatis, et hujus vitae angustiis. 152
- XLIX.** De desiderio aeternae vitae: et quanta sint certantibus bona promissa. 155
- L.** Qualiter homo desolatus se debet in manus Dei offerre. 159
- LI.** Quod humilibus insistendum est operibus, cum deficitur a summis. 162
- LII.** Quod homo non reputat se consolatione dignum, sed magis verberibus reum. 163
- LIII.** Quod gratia Dei non miscetur terrena sapientibus. 165
- LIV.** De diversis motibus Naturae et Gratiae. 166
- LV.** De corruptione naturae, et efficacia gratiae divinae. 170
- LVI.** Quod nos ipsos abnegare, et Christum imitari debemus per crucem. 173
- LVII.** Quod homo non sit nimis dejectus, quando in aliquos labitur defectus. 175
- LVIII.** De altioribus rebus et occultis iudiciis Dei non scrutandis. 176

LIX. Quod omnis spes et fiducia in solo Deo
est figenda. 181

LIBER Q U A R T U S.

DE SACRAMENTO.

C A P U T I.

- C**UM quanta reverentia Christus sit susci-
piendus. 185
- II. Quod magna bonitas et caritas Dei in Sa-
cramento homini exhibetur. 190
- III. Quod utile sit saepe communicare. 193
- IV. Quod multa bona praestantur devote
communicantibus. 196
- V. De dignitate Sacramenti, et statu Sacer-
dotali. 199
- VI. Interrogatio de exercitio ante Commu-
nionem. 201
- VII. De discussione propriae conscientiae, et
emendationis proposito. 202
- VIII. De oblatione Christi in cruce, et pro-
pria resignatione. 204
- IX. Quod nos et omnia nostra Deo debemus
offerre, et pro omnibus orare. 205
- X. Quod sacra Communio de facili non est
relinquenda. 208
- XI. Quod Corpus Christi et sacra Scriptura
maxime sint animae fidei necessaria
211

XII. Quod magna diligentia se debeat, communicaturus Christo, praeparare. 215

XIII. Quod toto corde anima devota Christi unionem in Sacramento affectare debet. 217

XIV. De quorundam devotorum ardenti desiderio ad Corpus Christi. 219

XV. Quod gratia devotionis, humilitate, et sui ipsius abnegatione, acquiritur. 221

XVI. Quod necessitates nostras Christo aperire, et ejus gratiam postulare debemus. 223

XVII. De ardenti amore, et vehementi affectu, suscipiendi Christum. 224

XVIII. Quod homo non sit curiosus scrutator Sacramenti, sed humilis imitator Christi, subdendo sensum suum sacrae fidei. 227

D E
IMITATIONE
CHRISTI,

LIBER PRIMUS.

ADMONITIONES, AD SPIRITUA-
LEM VITAM UTILES.

CAPUT I.

DE IMITATIONE CHRISTI, ET CONTEMPTU
OMNIUM VANITATUM MUNDI.

QUI SEQUITUR ME, NON AMBULAT IN tenebris: dicit Dominus. haec sunt verba Christi, quibus admonemur, quatenus vitam ejus et mores imitemur, si velimus veraciter illuminari, et ab omni caecitate cordis liberari. summum igitur studium nostrum sit, in vita Jesu Christi meditari. Doctrina Christi, omnes doctrinas sanctorum praece- lit: et qui spiritum haberet, absconditum ibi manna inveniret. sed contingit, quod multi ex frequenti auditu evangelii, parvum desiderium sentiunt: quia spiritum Christi non

*can keep h
of the
world.*

habent. qui autem vult plene et sapide Christi verba intelligere: oportet, ut totam vitam suam illi studeat conformare. Quid prodest tibi, alta de Trinitate disputare; si careas humilitate, unde displiceas Trinitati? vere, alta verba non faciunt sanctum et justum: sed virtuosa vita efficit Deo carum. opto magis sentire compunctionem, quam scire ejus definitionem. si scires totam bibliam exterius, et omnium philosophorum dicta: quid totum prodesset, sine caritate Dei et gratia? vanitas vanitatum, et omnia vanitas, praeter amare Deum, et illi soli servire. ista est summa sapientia, per contemptum mundi tendere ad regna caelestia. Vanitas igitur est, divitias perituras quaerere: et in illis sperare. vanitas quoque est, honores ambire, et in altum statum se extollere. vanitas est, carnis desideria sequi: et illud desiderare, unde postmodum graviter oportet puniri. vanitas est, longam vitam optare, et de bona vita parum curare. vanitas est, praesentem vitam solum attendere, et quae futura sunt, non praevidere. vanitas est, diligere, quod cum omni celeritate transit: et illic non festinare, ubi sempiternum gaudium manet. Memento illius frequenter proverbii: [Quia non satiatur oculus visu, nec auris impletur auditu.] stude ergo cor tuum ab amore visibilium abstrahere, et ad invisibilia te transferre. nam sequentes suam sensuali-

tatem, maculant conscientiam, et perdunt Dei gratiam.

II. DE HUMILI SENTIRE SUI IPSIUS.

OMNIS homo naturaliter scire desiderat; sed scientia sine timore Dei, quid importat? melior est profecto humilis rusticus, qui Deo servit; quam superbus philosophus, qui, se neglecto, cursum caeli considerat. qui bene se ipsum cognoscit, sibi ipsi vilescit, nec laudibus delectatur humanis. si scirem omnia quae in mundo sunt, et non essem in caritate; quid me juvaret coram Deo, qui me iudicaturus est ex facto? Quiesce a nimio sciendi desiderio: quia magna ibi invenitur distractio, et deceptio. scientes, libenter volunt videri, et sapientes dici. multa sunt, quae scire, parum vel nihil animae profunt. et valde insipiens est, qui aliquibus intendit, quam his quae salutis suae deserviunt. multa verba non satiant animam; sed bona vita refrigerat mentem: et pura conscientia magnam ad Deum praestat confidentiam. Quanto plus et melius scis, tanto gravius inde iudicaberis, nisi sanctius vixeris. noli ergo extolli de ulla arte vel scientia; sed potius time de data tibi notitia. si tibi videtur quod multa scis, et satis bene intelligis: scito tamen, quia sunt multo plura quae nescis. noli altum sapere, sed ignorantiam tuam magis fatere. quid te vis alicui

Knowledge
without
the fear
of God
and
Humility
of mind
prevents
sought.
in the
eye of
God. —

praeferre, cum plures doctiores te inveniantur, et magis in lege periti? si vis utiliter aliquid scire, et discere; ama nesciri, et pro nihilo reputari. Haec est altissima et utilissima lectio, sui ipsius vera cognitio, et despectio. de se ipso nihil tenere, et de aliis semper bene et alte sentire, magna sapientia est et perfectio. si videres alium aperte peccare, vel aliqua gravia perpetrare, non deberes te tamen meliorem aestimare: quia nescis, quam diu possis in bono stare. omnes fragiles sumus; sed tu neminem fragiliorem te ipso tenebis.

Sept 21. 1826

III. DE DOCTRINA VERITATIS.

Truth simple

*Objects
sensual.
hidden.
curious
not to
be
studied*

*The word
of God
is truth
simple
knowledge
judgy most*

FELIX, quem veritas per se docet, non per figuras et voces transeuntes, sed sicuti se habet. nostra opinio, et noster sensus, saepe nos fallit, et modicum videt. quid prodest magna cavillatio de occultis et obscuris rebus, de quibus nec arguemur in iudicio, quia ignoravimus? grandis insipientia, quod neglectis utilibus et necessariis, ultro intendimus curiosis et damnosis. oculos habentes, non videmus. Et quid curae nobis de generibus et speciebus? cui aeternum Verbum loquitur, a multis opinionibus expeditur. ex uno verbo omnia, et unum loquuntur omnia: et hoc est principium, quod et loquitur nobis. nemo sine illo intelligit, aut recte iudicat. cui omnia unum sunt, et omnia ad unum trahit, et omnia in

uno videt; potest stabilis corde esse, et in Deo
 pacificus permanere. *o* veritas Deus, fac me
 unum tecum, in caritate perpetua. taceat me
 saepe, multa legere et audire: in te est totum
 quod volo et desidero. taceant omnes docto-
 res, sileant universae creaturae in conspectu
 tuo: tu mihi *Te*quere solus. Quanto aliquis
 magis sibi unitus, et interior simplicatus fu-
 erit, tanto plura et altiora sine labore intelli-
 git; quia desuper lumen intelligentiae acci-
 pit. purus, simplex, et stabilis spiritus, in
 multis operibus non dissipatur: quia omnia ad
 Dei honorem operatur, et in se otiosus ab
 omni propria exquisione esse nititur. quis te
 magis impedit et molestat, quam tua immor-
 tificata affectio cordis? bonus et devotus ho-
 mo opera sua prius intus disponit, quae foris
 agere debet. nec illa trahunt eum ad deside-
 ria vitiosae inclinationis, sed ipse inspicit ea
 ad arbitrium rectae rationis. quis habet for-
 tius certamen, quam qui nititur vincere seip-
 sum? et hoc deberet esse negotium nostrum;
 vincere videlicet se ipsum, et quotidie se ipso
 fortiolem fieri, atque in melius aliquid pro-
 ficere. Omnis perfectio in hac vita, quam-
 dam imperfectionem sibi habet annexam; et
 omnis speculatio nostra, quadam caligine non
 caret. humilis tui cognitio, certior via est ad
 Deum, quam profunda scientiae inquisitio.
 non est culpanda scientia, aut quaelibet sim-
 plex rei notitia, quae bona est in se conside-

*fewer
Love of God*

*immortal
affections.*

right reason

self + rule.

*Perfection
imperfect*

*Speculation
dark.*

*Self abas-
sment.*

*to
be
in*

Good
conscience &

DE IMITATIONE

Good life
better
than
Knowledge

rata, et a Deo ordinata; sed praeferenda est
semper bona conscientia, et virtuosa vita.
quia vero plures magis student scire, quam
bene vivere; ideo saepe errant, et pene nul-
lum vel modicum fructum ferunt. O si tan-
tam adhiberent diligentiam, ad extirpanda
vitia, et virtutes inserendas, sicuti ad moven-
das quaestiones; non fierent tanta mala et
scandala in populo, nec tanta dissolutio in coe-
nobis. certe adveniente die iudicii, non quae-
retur a nobis quid legimus, sed quid fecimus;
nec quam bene diximus, sed quam religiose
viximus. dic mihi, ubi sunt modo omnes illi
domini et magistri, quos bene novisti dum ad-
huc viverent, et studiis flourerent? jam eorum
praeendas alii possident; et nescio utrum de
eis recogitant. in vita sua aliquid esse vide-
bantur, et modo de illis tacetur. O quam ci-
to transit gloria mundi! utinam vita eorum,
scientiae ipsorum concordasset! tunc bene stu-
duissent, et legissent. quam multi pereunt
per vanam scientiam in seculo, qui parum cu-
rant de Dei servitio! et quia magis eligunt
magnum esse quam humiles, ideo evanescent in
cogitationibus suis. vere magnus est, qui
magnam habet caritatem. vere magnus est,
qui in se parvus est, et pro nihilo omne cul-
men honoris ducit. vere prudens est, qui om-
nia terrena arbitratur ut stercora, ut Christum
lucrifaciat. et vere bene doctus est, qui Dei

et. b. q. 1.

Not
reading
but
acting

True
worldly
knowledge

Charity
is great
reps.

Self as
baseless

— the

my
worldly

as evidence.

CHRISTI, LIB. I.

voluntatem facit, et suam voluntatem relinquit.

IV. DE PROVIDENTIA IN AGENDIS.

Non est credendum omni verbo, nec instinctui; sed caute et longanimiter res est secundum Deum ponderanda. proh dolor! saepe malum facilius quam bonum de alio creditur et dicitur, ita infirmi sumus. sed perfecti viri non facile credunt omni enarranti: quia sciunt infirmitatem humanam, ad malum proclivam, et in verbis satis labilem. Magna sapientia, non esse praecipitem in agendis, nec pertinaciter in propriis stare sensibus. ad hanc etiam pertinet, non quibuscumque hominum verbis credere: nec audita vel credita, mox ad aliorum aures effundere. cum sapiente et conscientioso viro consilium habe: et quaere potius a meliore instrui, quam tuas ad inventiones sequi. bona vita facit hominem sapientem secundum Deum, et expertum in multis. quanto quis in se humilior fuerit, et Deo subiectior; tanto in omnibus erit sapientior, et pacatior.

V. DE LECTIOE SANCTARUM SCRIPTURARUM.

VERITAS est in scripturis sanctis quaerenda, non eloquentia: omnis scriptura sacra

True
know:
7: ledge
to do
God's
will
and
give up
man's.
Sept. 25.
Caution
Man's
weakness
No haste
No obsti:
nacy
No gossip
Address
of friends

S.S Lib
lent
Irish. V
ase.

devotion
*
simpliciter
matter
not
bl.
wonder

See Rosen
Sermon
on
Searching
the S.S.

8 DE IMITATIONE

spiritu debet legi, quo facta est. quaerere potius debemus utilitatem in scripturis, quam subtilitatem sermonis. ita libenter devotos et simplices libros legere debemus, sicut altos et profundos. non te offendat auctoritas scribentis, utrum parvae vel magnae litteraturae fuerit; sed amor purae veritatis te trahat ad legendum. non quaeras quis hoc dixerit; sed quid dicatur, attende. Homines transeunt, sed veritas Domini manet in aeternum. sine personarum acceptione, variis modis loquitur nobis Deus. curiositas nostra saepe nos impedit in lectione scripturarum, cum volumus intelligere et discutere, ubi simpliciter esset transeundum. si vis profectum haurire, lege humiliter, simpliciter, et fideliter; nec umquam velis habere nomen scientiae. interroga libenter, et audi tacens verba sanctorum; nec displiceant tibi parabolae seniorum: sine causa enim non proferuntur. X

Sept 26 VI. DE INORDINATIS AFFECTIONIBUS.

QUANDOCUMQUE homo aliquid inordinate appetit, statim in se inquietus fit. superbus et avarus, numquam quiescunt: pauper et humilis spiritu, in multitudine pacis conversantur. homo qui necdum perfecte in se mortuus est, cito tentatur, et vincitur in parvis et vilibus rebus. infirmus in spiritu, et quodammodo adhuc carnalis, et ad sensibilia in-

clinatus, difficile se potest a terrenis desideriis ex toto abstrahere. et ideo saepe habet tristitiam, cum se subtrahit: leviter etiam indignatur, si quis ei resistit. Si autem persecutus fuerit quod concupiscit, statim ex reatu conscientiae gravatur: quia secutus est passionem suam, quae nihil juvat ad pacem quam quaesivit. resistendo igitur passionibus, invenitur pax vera cordis, non autem eis serviendo. non est ergo pax in corde hominis carnalis, non in homine exterioribus dedito, sed in fervido et spirituali.

VII. DE VANA SPE, ET ELATIONE FUGIENDA.

VANUS est, qui spem suam ponit in hominibus, aut in creaturis. non te pudeat aliis servire, amore Jesu Christi; et pauperem in hoc seculo videri. non stes super te ipsum, sed in Deo spem tuam constitue. fac quod in te est, et Deus aderit bonae voluntati tuae. non confidas in tua scientia, vel astutia cujuscumque viventis; sed magis in Dei gratia, qui adjuvat humiles, et de se praesumentes humiliat. Ne glorieris in divitiis, si adsunt; nec in amicis, quia potentes sunt; sed in Deo, qui omnia praestat, et se ipsum super omnia dare desiderat. non te extollas de magnitudine vel pulcritudine corporis, quae modica infirmitate corrumpitur et defordatur. non

placeas tibi ipsi de habilitate aut ingenio tuo : ne displiceas Deo, cujus est totum quidquid boni naturaliter habueris. Non te reputes aliis meliorem, ne forte coram Deo deterior habearis, qui scit, quid est in homine. non superbias de operibus bonis : quia aliter sunt iudicia Dei, quam hominum : cui saepe displicet, quod hominibus placet. si aliquid boni habueris, crede aliis meliora, ut humilitatem conserves. non nocet, si omnibus te supponas : nocet autem plurimum, si vel uni te praeponas. jugis pax cum humili : in corde autem superbi, zelus et indignatio frequens.

VIII. DE CAVENDA NIMIA

FAMILIARITATE.

Non omni homini reveles cor tuum ; sed eum sapiente, et timente Deum, age causam tuam. cum juvenibus, et extraneis, rarus esto. cum divitibus noli blandire ; et coram magnatibus non libenter appareas. cum humilibus et simplicibus, cum devotis et morigeratis sociare : et quae aedificationis sunt, pertracta. non sis familiaris alicui mulieri ; sed, in communi, omnes bonas mulieres Deo commenda. soli Deo et angelis ejus opta familiaris esse, et hominum notitiam evita. Caritas habenda est ad omnes, sed familiaritas non expedit. quandoque accidit, ut persona ignota, ex bona fama luceat : cujus tamen praesentia oculos intuentium offuscat. puta-

mus aliquando aliis placere ex conjunctione nostra; et incipimus magis displicere ex morum improbitate in nobis considerata.

Sept. 29.
1826.

IX. DE OBEDIENTIA ET SUBJECTIONE.

VALDE magnum est, in obedientia stare, sub praelato vivere, et sui juris non esse. multo tutius est, stare in subjectione, quam in praelatura. multi sunt sub obedientia, magis ex necessitate, quam ex caritate: et illi poenam habent, et leviter murmurant. nec libertatem mentis acquirunt, nisi ex toto corde propter Deum se subiciant. curre hic vel ibi: non invenies quietem, nisi in humili subjectione sub praelati regimine. imaginatio locorum et mutatio, multos fefellit. Verum est, quod unusquisque libenter agit pro sensu suo; et inclinatur ad eos magis qui secum sentiunt. sed si Deus est inter nos, necesse est, ut relinquamus etiam quandoque nostrum sentire, propter bonum pacis. quis est ita sapiens, qui omnia plene scire potest? ergo, noli nimis in sensu tuo confidere: sed velis etiam libenter aliorum sensum audire. si bonum est tuum sentire, et hoc ipsum propter Deum dimittis, et alium sequeris, magis exinde proficies. Audivi enim saepe, securius esse, audire et accipere consilium, quam dare. potest etiam contingere, ut bonum sit uniuscujusque sentire; sed nolle aliis acquiescere, cum id ra-

tio aut causa postulat, signum est superbiae et pertinaciae.

**X. DE CAVENDA SUPERFLUITATE
VERBORUM.**

CAVEAS tumultum hominum, quantum potes: multum enim impedit tractatus secularium gestorum, etiam si simplici intentione proferantur. cito enim inquinamur vanitate, et captivamur. vellem me pluries tacuisse, et inter homines non fuisse. sed quare tam libenter loquimur, et invicem fabulamur: cum tamen raro, sine laesione conscientiae, ad silentium redimus? ideo tam libenter loquimur; quia per mutuas locutiones, ab invicem consolari quaerimus: et cor diversis cogitationibus fatigatum, optamus relevare. et multum libenter de his, quae multum diligimus vel cupimus, vel quae nobis contraria sentimus, libet loqui et cogitare. Sed, proh dolor! saepe inaniter et frustra. nam haec exterior consolatio, interioris et divinae consolationis non modicum detrimentum est. ideo vigilandum est, et orandum, ne tempus otiose transeat. si loqui licet et expedit, quae aedificabilia sunt loquere. malus usus, et negligentia profectus nostri, multum facit ad incustodiam oris nostri. juvat tamen non parum ad profectum spiritualem, devota spiritualium rerum collatio: maxime ubi pares animo et spiritu, in Deo sibi sociantur.

XI. DE PACE ACQUIRENDA, ET ZELO PROFICIENDI.

MULTAM possemus pacem habere, si non vellemus nos cum aliorum dictis et factis, et quae ad nostram curam non spectant, occupare. quomodo potest ille diu in pace manere, qui alienis curis se intermiscet? qui occasiones forinsecus quaerit? qui parum vel raro se intrinsecus colligit? beati simplices, quoniam multam pacem habebunt. Quare quidam sanctorum, tam perfecti et contemplativi fuerunt? quia omnino se ipsos mortificare ab omnibus terrenis desideriis studuerunt: et ideo totis medullis cordis Deo inhaerere, atque libere sibi vacare, potuerunt. nos nimium occupamur propriis passionibus, et de transitoriis nimis sollicitamur. raro etiam unum vitium perfecte vincimus, et ad quotidianum profectum non accendimur: ideo frigidi et tepidi remanemus. Si essemus nobis ipsis perfecte mortui, et interius minime implicati, tunc possemus etiam divina sapere, et de caelesti contemplatione aliquid experiri. totum et maximum impedimentum est, quia non sumus a passionibus et concupiscentiis liberi: nec perfectam sanctorum viam conamur ingredi. quando etiam modicum adversitatis occurrit, nimis cito deijcitur, et ad humanas consolationes convertitur. Si niteremur, sicut viri fortes, stare in proelio,

14 DE IMITATIONE

profecto auxilium Domini super nos videremus de caelo. ipse enim certantes, et de sua gratia sperantes, paratus est adjuvare: qui nobis certandi occasiones procurat, ut vincamus. si tantum in istis exterioribus observantiis profectum religionis ponimus, cito finem habebit devotio nostra. sed ad radicem securim ponamus: ut purgati a passionibus, pacificam mentem possideamus. Si omni anno unum vitium extirparemus, cito viri perfecti efficeremur. sed modo e contrario saepe sentimus, ut meliores et puriores in initio conversionis nos fuisse inveniamus, quam post multos annos professionis. fervor et profectus quotidie debet crescere; sed nunc pro magno videtur, si quis primi fervoris partem posset retinere. si modicam violentiam faceremus in principio, tunc postea cuncta possemus facere cum levitate et gaudio. Grave est, assueta dimittere; sed gravius est, contra propriam voluntatem ire. sed si non vincis parva et levia, quando superabis difficiliora? resiste in principio inclinationi tuae, et malam dedisce consuetudinem, ne forte paulatim ad majorem te ducat difficultatem. O si adverteres, quantam tibi pacem, et aliis laetitiam faceres, te ipsum bene habendo, puto, quod sollicitior esses ad spirituales profectum!

XII. DE UTILITATE ADVERSITATIS.

Bonum nobis est, quod aliquando habeamus aliquas gravitates et contrarietates; quia saepe hominem ad cor revocant, quatenus se in exilio esse cognoscat, nec spem suam in aliqua re mundi ponat. bonum est, quod patiamur quandoque contradictiones, et quod male et imperfecte de nobis sentiat, etiamsi bene agimus et intendimus. ista saepe juvant ad humilitatem, et a vana gloria nos defendunt. tunc enim melius interiorem testem Deum quaerimus, quando foris vilipendimur ab hominibus, et non bene nobis creditur. Ideo deberet se homo in Deo taliter firmare, ut non esset ei necesse, multas humanas consolationes quaerere. quando homo bonae voluntatis tribulatur, vel tenatur, aut malis cogitationibus affligitur; tunc Deum sibi magis necessarium intelligit, sine quo nihil boni se posse deprehendit. tunc etiam tristatur, gemit et orat, pro miseris quas patitur. tunc taedet eum diutius vivere, et mortem optat venire: ut possit dissolvi, et cum Christo esse. tunc etiam bene advertit, perfectam securitatem, et plenam pacem, in mundo non posse constare.

XIII. DE TENTATIONIBUS RESISTENDIS.

QUAMDIU in mundo vivimus, sine tribu-

latione et tentatione esse non possumus. unde in Job scriptum est: tentatio est vita humana super terram. ideo unusquisque sollicitus esse deberet circa tentationes suas, et vigilare in orationibus; ne diabolus locum inveniret decipiendi, qui numquam dormitat, sed circuit quaerens quem devoret. nemo tam perfectus est et sanctus, qui non habeat aliquando tentationes: et plene eis carere non possumus. Sunt tamen tentationes homini saepe valde utiles, licet molestae sint et graves; quia in illis homo humiliatur, et purgatur, et eruditur. omnes sancti, per multas tribulationes et tentationes transierunt, et profecerunt. et qui tentationes sustinere nequiverunt, reprobi facti sunt, et defecerunt. non est aliquis ordo tam sanctus, nec locus tam secretus, ubi non sint tentationes vel adversitates. Non est homo securus a tentationibus totaliter, quam diu vixerit: quia in nobis est unde tentamur, ex quo in concupiscentia nati sumus. una tentatione seu tribulatione recedente, alia supervenit: et semper aliquid ad patiendum habebimus; nam bonum felicitatis nostrae perdidimus. multi quaerunt tentationes fugere, et gravius incidunt in eas. per solam fugam non possumus vincere, sed per patientiam et veram humilitatem, omnibus hostibus efficimur fortiores. Qui tantummodo exterius declinat, nec radicem evellit, parum proficiet: imo citius ad eum tentationes redient,

et pejus sentiet. paulatim, et per patientiam cum longanimitate (Deo juvante) melius superabis, quam cum duritia et importunitate propria. saepius accipe consilium in tentatione, et cum tentato noli duriter agere; sed consolationemingere, sicut tibi optares fieri. Initium omnium malarum tentationum, inconstantia animi, et parva ad Deum confidentia. quia, sicut navis sine gubernaculo, hinc inde a fluctibus impellitur; ita homo remissus, et suum propositum deserens, varie tentatur. ignis probat ferrum, et tentatio hominem justum. nescimus saepe quid possumus: sed tentatio aperit quid sumus. vigilandum est tamen, praecipue circa initium tentationis: quia tunc facilius hostis vincitur, si ostium mentis nullatenus intrare sinitur; sed extra limen, statim ut pulsaverit, illi obviatur. unde quidam dixit:

Principiis obsta, sero medicina paratur.

nam primo occurrit menti simplex cogitatio, deinde fortis imaginatio, postea delectatio, et motus pravus, et assensio. sicque paulatim ingreditur hostis malignus ex toto, dum illi non resistitur in principio. et quanto diutius ad resistendum quis torpuerit, tanto in se quotidie debiliior fit, et hostis contra eum potentior. Quidam in principio conversationis suae, graviores tentationes patiuntur; quidam autem in fine. quidam vero, quasi per totam vitam suam, male habent. nonnulli

satis leniter tentantur, secundum divinae ordinationis sapientiam et aequitatem, quae statum et merita hominum pensat, et cuncta ad electorum suorum salutem praecordinat. Ideo non debemus desperare, cum tentamur; sed eo ferventius Deum exorare, quatenus nos in omni tribulatione dignetur adjuvare: qui utique, secundum dictum Pauli, talem faciet cum tentatione proventum, ut possimus sustinere. humiliemus ergo animas nostras sub manu Dei, in omni tentatione et tribulatione: quia humiles spiritu salvabit, et exaltabit. In tentationibus et tribulationibus probatur homo, quantum profecit; et ibi majus meritum existit, et virtus melius patescit. nec magnum est, si homo devotus sit et fervidus, cum gravitatem non sentit: sed si tempore adversitatis patienter se sustinet, spes magni profectus erit. quidam a magnis tentationibus custodiuntur, et in parvis quotidianis saepe vincuntur: ut humiliati, numquam de se ipsis in magnis confidunt, qui in tam modicis infirmantur.

XIV. DE TEMERARIO JUDICIO VITANDO.

Ad te ipsum oculos reflecte, et aliorum facta caveas judicare. in judicando alios, homo frustra laborat, saepius errat, et leviter peccat; se ipsum vere judicando et discutiendo, semper fructuose laborat. sicut nobis res cor-

di est, sic de ea frequenter judicamus: nam verum iudicium propter privatum amorem faciliter perdimus. si Deus semper esset pura intentio nostri desiderii, non tam faciliter turbaremur pro resistantia sensus nostri. Sed saepe aliquid ab intra latet, vel etiam ab extra concurrit, quod nos etiam pariter trahit. multi occulte se ipsos quaerunt, in rebus quasi agunt, et nesciunt. videntur etiam in bona pace stare, quando res pro eorum velle fiunt, et sentire: si autem aliter sit quam cupiunt, cito moventur et tristes fiunt. propter diversitatem sensuum et opinionum, satis frequenter oriuntur dissensiones inter amicos et cives, inter religiosos et devotos. Antiqua consuetudo difficulter relinquitur: et ultra proprium videre, nemo libenter ducitur. si rationi tuae magis inniteris vel industriae, quam virtuti subjectivae Jesu Christi, raro et tarde eris homo illuminatus: quia Deus vult, nos sibi perfecte subjici, et omnem rationem per inflammatum amorem transcendere.

XV. DE OPERIBUS EX CARITATE

FACTIS.

Pro nulla re mundi, et pro nullius hominis dilectione, aliquod malum est faciendum; sed pro utilitate tamen indigentes, opus bonum libere aliquando intermittendum est, aut etiam pro meliori mutandum. hoc enim facto, opus bonum non destruitur, sed in me-

lius commutatur. sine caritate, opus exter-
num nihil prodest: quidquid autem ex cari-
tate agitur, quantumcumque etiam parvum
sit et despectum, totum efficitur fructuosum.
magis siquidem Deus pensat ex quanto quis
agit, quam opus quod facit. Multum facit,
qui multum diligit. multum facit, qui rem
bene facit. bene facit, qui communitati ma-
gis quam suae voluntati servit. saepe videtur
esse caritas, et est magis carnalitas: quia na-
turalis inclinatio, propria voluntas, spes re-
tributionis, affectus commoditatis, raro abesse
volunt. Qui veram et perfectam caritatem
habet, in nulla re se ipsum quaerit; sed Dei
solummodo gloriam in omnibus fieri deside-
rat. nulli etiam invidet, quia nullum priva-
tum gaudium amat: nec in se ipso vult gau-
dere; sed in Deo, super omnia bona, optat
beatificari. nemini aliquid boni attribuit, sed
totaliter ad Deum refert, a quo fontaliter om-
nia procedunt: in quo finaliter omnes sancti
fruibiliter requiescunt. O qui scintillam habe-
ret verae caritatis, profecto omnia terrena
sentiret plena fore vanitatis!

XVI. DE SUFFERENTIA DEFECTUUM ALIORUM.

QUAE homo in se vel in aliis emendare
non valet, debet patienter sustinere, donec
Deus aliter ordinet. cogita, quia sic forte me-
lius est pro tua probatione et patientia, sine

qua non sunt multum ponderanda merita nostra. debes tamen pro talibus impedimentis supplicare, ut Deus tibi dignetur subvenire, et possis benigne portare. Si quis semel aut bis admonitus, non acquiescit, noli cum eo contendere; sed totum Deo committe, ut fiat voluntas ejus, et honor, in omnibus servis suis, qui scit bene mala in bonum convertere. stude patiens esse in tolerando aliorum defectus, et qualescumque infirmitates; quia et tu multa habes, quae ab aliis oportet tolerari. si non potes te talem facere, qualem vis; quomodo poteris alium ad tuum habere beneplacitum? libenter habemus alios perfectos, et tamen proprios non emendamus defectus. Volumus, quod alii stricte corrigantur, et ipsi corrigi nolumus. displicet larga aliorum licentia, et tamen nobis nolumus negari quod petimus. alios restringi per statuta volumus, et ipsi nullatenus patimur amplius cohiberi. sic ergo patet, quam raro proximum sicut nos ipsos pensamus. si essent omnes perfecti, quid tunc haberemus ab aliis pro Deo pati? Nunc autem Deus sic ordinavit, ut discamus alter alterius onera portare: quia nemo sine defectu, nemo sine onere, nemo sibi sufficiens, nemo sibi satis sapiens: sed oportet nos invicem portare, invicem consolari, pariter adjuvare, instruere et admonere. quantae autem virtutis quisque fuerit, melius patet occasione

adversitatis. occasiones namque hominem fragilem non faciunt; sed qualis sit, ostendunt.

XVII. DE MONASTICA VITA.

OPORTET quod discas te ipsum in multis frangere, si vis pacem et concordiam cum aliis tenere. non est parvum, in monasteriis vel in congregatione habitare, et inibi sine querela conversari, et usque ad mortem fidelis perseverare. beatus, qui ibidem bene vixerit, et feliciter consummaverit. si vis debite stare et proficere, teneas te tamquam exulem peregrinum super terram. oportet te stultum fieri propter Christum, si vis religiosam ducere vitam. Habitus, et tonsura, modicum confert; sed mutatio morum, et integra mortificatio passionum, verum faciunt religiosum. qui aliud quaerit, quam pure Deum, et animae suae salutem, non inveniet nisi tribulationem et dolorem. non potest etiam diu stare pacificus, qui non nititur esse minimus, et omnibus subiectus. Ad serviendum venisti, non ad regendum: ad patiendum et laborandum seias te vocatum, non ad otia dum vel fabulandum. hic ergo probantur homines, sicut aurum in fornace. hic nemo potest stare, nisi ex toto corde se voluerit propter Deum humiliare.

XVIII. DE EXEMPLIS SANCTORUM
PATRUM.

INTUERE sanctorum Patrum vivida exempla, in quibus vera perfectio refulsit et religio, et videbis, quam modicum sit, et pene nihil, quod nos agimus. heu, quid est vita nostra, si illis fuerit comparata! Sancti, et amici Christi, Domino servierunt in fame et siti, in frigore et nuditate, in labore et fatione, in vigiliis et jejuniis, in orationibus et meditationibus sanctis, in persecutionibus et opprobriis multis. O quam multas et graves tribulationes passi sunt Apostoli, Martyres, Confessores, Virgines, et reliqui omnes, qui Christi vestigia voluerunt sequi! nam animas suas in hoc mundo oderunt, ut in aeternam vitam eas possiderent. O quam strictam et abdicatam vitam sancti Patres in crebro duxerunt! quam longas et graves tentationes pertulerunt! quam frequenter ab inimico vexati sunt! quam crebras et fervidas orationes Deo obtulerunt! quam rigidas abstinentias peregerunt! quam magnum zelum et fervorem ad spiritualem profectum habuerunt! quam forte bellum adversus edomationem vitiorum gesserunt! quam puram et rectam intentionem ad Deum tenuerunt! per diem laborabant, et noctibus orationi divinae vacabant, quamquam laborando, ab oratione mentali minime cessarent. Omne tempus utiliter ex-

pendebant: omnis hora ad vacandum Deo brevis videbatur: et prae magna dulcedine contemplationis, etiam oblivioni tradebatur necessitas corporalis refectionis. omnibus divitiis, dignitatibus, honoribus, amicis et cognatis, renuntiabant: nil de mundo habere cupiebant, vix necessaria vitae sumebant: corpori servire, etiam in necessitate, dolebant. pauperes igitur erant rebus terrenis, sed divites valde in gratia et virtutibus. foris egebant, sed intus gratia et consolatione divina reficiebantur. Mundo erant alieni, sed Deo proximi ac familiares amici. sibi ipsis videbantur tamquam nihili, et huic mundo despecti: sed erant in oculis Dei pretiosi et dilecti. in vera humilitate stabant, in simplici obedientia vivebant, in caritate et patientia ambulabant: et ideo quotidie in spiritu proficiebant, et magnam apud Deum gratiam obtinebant. dati sunt in exemplum omnibus religiosis: et plus provocare nos debent ad bene proficiendum, quam tepidorum numerus ad relaxandum. O quantus fervor omnium religiosorum in principio suae sanctae institutionis fuit! ô quanta devotio orationis! quanta aemulatio virtutis! quam magna disciplina vixit! quanta reverentia et obedientia, sub regula magistri, in omnibus effloruit! testantur adhuc vestigia derelicta, quod vere viri sancti et perfecti fuerunt: qui tam strenue militantes, mundum suppediterunt.

jam magnus putatur, si quis transgressor non fuerit: si quis, quod accepit, cum patientia tolerare potuerit. Oh teporis et negligentiae status nostri, quod tam cito declinamus a pristino fervore; et jam taedet vivere, prae lassitudine et tepore! utinam in te penitus non dormitet profectus virtutum, qui multa sapius exempla vidisti devotorum!

XIX. DE EXERCITIIS BONI RELIGIOSI.

VITA boni religiosi, omnibus virtutibus pollere debet: ut sit talis interius, qualis videtur hominibus exterius. et merito, multo plus debet esse intus, quam quod cernitur foris: quia inspector noster est Deus; quem summopere revereri debemus, ubicumque fuerimus, et tamquam Angeli in conspectu ejus mundi incedere. omni die renovare debemus propositum nostrum, et ad fervorem nos excitare, quasi hodie primum ad conversionem venissemus, atque dicere: adjuva me, Domine Deus, in bono proposito, et sancto servitio tuo: et da mihi nunc hodie perfecte incipere, quia nihil est quod hactenus feci. Secundum propositum nostrum, cursus profectus nostri: et multa diligentia opus est, bene proficere volenti. quod si fortiter proponens, saepe deficit: quid ille, qui raro aut minus fixe aliquid proponit? variis tamen modis contingit desertio propositi nostri: et levis omissio exercitiorum, vix sine aliquo dispendio

transit. iustorum propositum, in gratia Dei potius, quam in propria sapientia pendet: in quo et semper confidunt, quidquid arripunt. nam homo proponit, sed Deus disponit: nec est in homine via ejus. Si pietatis causa, aut fraternae utilitatis proposito, quandoque consuetum omittitur exercitium, facile postea poterit recuperari. si autem taedio animi aut negligentia faciliter relinquitur, satis culpabile est, et nocivum sentietur. conemur quantum possumus, adhuc leviter deficiemus in multis. semper tamen aliquid certi proponendum est; et contra illa praecipue, quas amplius nos impediunt. exteriora nostra, et interiora, pariter nobis scrutanda sunt et ordinanda, quia utraque expediunt ad profectum. Si non continue te vales colligere, saltem interdum: et ad minus semel in die, mane videlicet, aut vespere. mane propone, vespere discute mores tuos, qualis hodie fuisti in verbo, opere, et cogitatione: quia in his saepius forsitan offendisti Deum et proximum. accinge te, sicut vir, contra diabolicas nequitias: frena gulam, et omnem carnis inclinationem facilius frenabis. numquam sis ex toto otiosus: sed aut legens, aut scribens, aut orans, aut meditans, aut aliquid utilitatis pro communi laborans. corporalia tamen exercitia, discrete sunt agenda, nec omnibus aequaliter assumenda. Quae communia non sunt, non sunt foris ostendenda: nam in se-

creto tutius exercentur privata. cavendum tamen, ne piger sis ad communia, et ad singularia promptior: sed expletis integre et fideliter debitis et injunctis, si jam ultra vacat, redde te tibi, prout devotio tua desiderat. non possunt omnes habere unum exercitium: sed aliud isti, aliud illi, magis deservit. etiam pro temporis congruentia, diversa placent exercitia; qui alia in festis, alia in feriatis, magis sapiunt diebus. aliis indigemus tempore tentationis, et aliis tempore pacis et quietis. alia, cum tristamur, libet cogitare: et alia, cum lacti in Domino fuerimus. circa principalia festa, renovanda sunt bona exercitia; et Sanctorum suffragia ferventius imploranda. de festo in festum proponere debemus, quasi tunc de hoc seculo migraturi, et ad aeternum festum perventuri. ideoque solícite nos praeparare debemus in devotis temporibus, et devotius conversari, atque omnem observantiam strictius custodire, tanquam in brevi praemium laboris nostri a Deo percepturi. Et si delatum fuerit, credamus nos minus bene praeparatos, atque indignos tantae adhuc gloriae, quae revelabitur in nobis tempore praefinito: et studeamus nos melius ad exitum praeparare. beatus servus (ait Evangelista Lucas) quem, cum venerit Dominus, invenerit vigilantem. amen dico vobis, super omnia bona sua constituet eum.

XX. DE AMORE SOLITUDINIS, ET
SILENTII.

QUAERE aptum tempus vacandi tibi, et de beneficiis Dei frequenter cogita. relinque curiosa. tales perlege materias quae compunctionem magis praestant, quam occupationem. si te subtraxeris a superfluis locutionibus et otiosis circuituionibus, nec non a novitatibus et rumoribus audiendis, invenies tempus sufficiens et aptum pro bonis meditationibus insistendis. maximi Sanctorum humana consortia, ubi poterant, vitabant, et Deo in secreto servire eligeant. Dixit quidam: quoties inter homines fui, minor homo redii. hoc saepius experimur, quando diu confabulamur. facilius est omnino tacere, quam verbo non excedere. facilius est domi latere, quam foris se posse sufficienter custodire. qui igitur intendit ad interiora et spiritualia pervenire, oportet eum cum Jesu a turba declinare. nemo secure apparet, nisi qui libenter latet. nemo secure loquitur, nisi qui libenter tacet. nemo secure praest, nisi qui libenter subest. nemo secure praecipit, nisi qui bene obedire didicit. Nemo secure gaudet, nisi bonae conscientiae in se testimonium habeat. semper tamen Sanctorum securitas, plena timoris Dei extitit. nec eo minus solliciti et humiles in se fuerunt, quia magnis virtutibus et gratia emicuerunt. pravorum

autem securitas ex superbia et praesumptione oritur, et in fine in deceptionem sui ipsius vertitur. numquam promittas tibi securitatem in hac vita, quamvis bonus videaris coenobita, aut devotus eremita. Saepe meliores in aestimatione hominum, gravius periclitati sunt propter suam nimiam confidentiam. unde multis utilius est, ut non penitus tentationibus careant, sed saepius impugnentur; ne nimium securi sint; ne forte in superbiam eleventur; ne etiam ad exteriores consolationes licentius declinent. *ô* qui numquam transitoriam laetitiam quaereret, qui numquam cum mundo se occuparet, quam bonam conscientiam servaret! *ô* qui omnem vanam solitudinem amputaret, et dumtaxat salutaria ac divina cogitaret, et totam spem suam in Deo constitueret, quam magnam pacem et quietem possideret! Nemo dignus est caelesti consolatione, nisi diligenter se exercuerit in sancta compunctione. si vis corde tenus compungi, intra cubile tuum, et excludere tumultus mundi, sicut scriptum est: in cubilibus vestris compungimini. in cella invenies, quod de foris saepius amittes. cella continuata dulcescit, et male custodita taedium generat. si in principio conversionis tuae bene eam incolueris et custodieris, erit tibi postea dilecta amica, et gratissimum solatium. In silentio et quiete, proficit anima devota, et discit abscondita scripturarum. ibi invenit

fluente lacrymarum, quibus singulis noctibus se lavet et mundet: ut conditori suo tanto familiarior fiat, quanto longius ab omni seculari tumultu degit. qui ergo se abstrahit a notis et amicis, approximabit illi Deus cum Angelis sanctis. melius est latere, et sui curam agere, quam se neglecto, signa facere. laudabile est homini religioso, raro foras ire, fugere videri, nolle etiam homines videre. Quid vis videre, quod non licet habere? transit mundus, et concupiscentia ejus. trahunt desideria sensualitatis ad spatiandum: sed cum hora transierit, quid nisi gravitatem conscientiae, et cordis dispersionem, reportas? laetus exitus, tristem saepe reditum parit: et laeta vigilia serotina, triste mane facit. sic omne carnale gaudium, blande intrat: sed in fine mordet, et perimit. quid potes alibi videre, quod hic non vides? ecce caelum, et terra, et omnia elementa; nam ex istis omnia sunt facta. Quid potes alicubi videre, quod diu potest sub sole permanere? credis te forsitan satiari, sed non poteris pertingere. si cuncta videres praesentia, quid esset nisi visio vana? leva oculos tuos ad Deum in excelsis: et ora pro peccatis tuis et negligentis. dimitte vana vanis; tu autem intende illis, quae tibi praecipit Deus. claudes super te ostium tuum, et voca ad te Iesum, dilectum tuum. mane cum eo in cella, quia non invenies alibi tantam pacem. si non exisses, nec quidquam de ru-

moribus audisses, melius in bona pace permanisses. ex quo nova delectat aliquando audire, oportet te exinde turbationem cordis tolerare.

XXI. DE COMPUNCTIONE CORDIS.

Si vis aliquid proficere, conserva te in timore Dei, et noli esse nimis liber: sed sub disciplina cohibe omnes sensus tuos, nec ineptas te tradas lætitiæ. da te ad cordis compunctionem, et invenies devotionem. compunctio multa bona aperit, quæ dissolutio cito perdere consuevit. mirum est, quod homo potest unquam perfecte in hac vita lætari; qui suum exilium, et tam multa pericula animæ suæ, considerat et pensat. Propter levitatem cordis, et negligentiam defectuum nostrorum, non sentimus animæ nostræ dolores: sed sæpe vane ridemus, quando merito flere deberemus, non est vera libertas, nec bona lætitia, nisi in timore Dei cum bona conscientia. felix, qui abjicere potest omne impedimentum distractionis, et ad unionem se recolligere sanctæ compunctionis, felix, qui a se abdicat, quidquid conscientiam suam maculare potest vel gravare. certa viriliter, consuetudo consuetudine vincitur. si tu scis homines dimittere, ipsi bene te dimittent tua facta facere. Non attrahas tibi res aliorum, nec te implices causis majorum. habeas semper oculum super te primum, et admoncas te

ipsum specialiter, prae omnibus tibi dilectis. si non habes favorem hominum, noli ex hoc tristari: sed hoc sit tibi grave, quia non habes te satis bene et circumspicte, sicut deceret, Dei servum, et devotum religiosum, conversari. utilius est saepe et securius, quod homo non habeat multas consolationes in hac vita, secundum carnem praecipue. tamen, quod divinas non habemus, aut rarius sentimus, nos in culpa sumus: quia compunctionem cordis non quaerimus, nec vanas et externas omnino abjicimus. Cognosce te indignum divina consolatione, sed magis dignum multa tribulatione. quando homo est perfecte compunctus, tunc gravis et amarus est ei totus mundus. bonus homo sufficientem invenit materiam dolendi et flendi. sive enim se considerat, sive de proximo pensat, scit quia nemo sine tribulatione hic vivit. et quanto strictius sese considerat, tanto amplius dolet. materiae justis doloris, et internae compunctionis, sunt peccata et vitia nostra: quibus ita involuti jacemus, ut raro caelestia contemplari valeamus. Si frequentius de morte tua, quam de longitudine vitae cogitares, non dubium quin ferventius te emendares. si etiam futuras inferni sive purgatorii poenas cordialiter perpenderes, credo quod libenter laborem et dolorem sustineres, et nihil rigoris formidares. sed quia ad cor ista non transeunt, et blandimenta adhuc amamus, ideo fri-

gidi et valde pigri remanemus. Saepe est inopia spiritus, unde tam leviter conqueritur miserum corpus. ora igitur humiliter ad Dominum, ut det tibi compunctionis spiritum, et dic cum Propheta: ciba me, Domine, pane lacrymarum, et potum da mihi in lacrymis, in mensura.

XXII. DE CONSIDERATIONE HUMANÆ MISERIAE.

MISER es, ubicumque fueris, et quocumque te verteris, nisi ad Deum te convertas. quid turbaris, quia non succedit tibi sicut vis et desideras? quis est qui habet omnia secundum suam voluntatem? nec ego, nec tu, nec aliquis hominum super terram. nemo est in mundo sine aliqua tribulatione vel angustia, quamvis rex sit vel papa. quis est, qui melius habet? utique qui pro Deo aliquid pati valet. Dicunt multi imbecilles et infirmi: ecce, quam bonam vitam ille homo habet! quam dives, quam magnus, quam potens et excelsus! sed attende ad caelestia bona, et videbis quod omnia ista temporalia nulla sunt; sed valde incerta et magis gravantia, quia numquam sine solitudine et timore possidentur. non est hominis felicitas, habere temporalia ad abundantiam; sed sufficit ei mediocritas. vere miseria est, vivere super terram. quanto homo voluerit esse spiritualior, tanto praesens vita fit ei amarior; quia sentit melius, et videt

clarior, humanae corruptionis defectus. nam comedere, bibere, vigilare, dormire, quiescere, laborare, et ceteris necessitatibus naturae subjacere, vere magna miseria est, et afflictio homini devoto, qui libenter esset absolutus, et liber ab omni peccato. Valde enim gravatur interior homo necessitatibus corporalibus in hoc mundo. unde Propheta devote rogat, quatenus liber ab istis esse valeat, dicens: de necessitatibus meis erue me, Domine. sed vac non cognoscentibus suam miseriam: et amplius vac illis, qui diligunt hanc miseram et corruptibilem vitam. nam in tantum quidam hanc amplectuntur, (licet etiam vix necessaria laborando aut mendicando habeant) ut si possent hic semper vivere, de regno Dei nihil curarent. O insani et infideles corde, qui tam profunde in terrenis jacent, ut nihil nisi carnalia sapiant! sed miseri, adhuc in fine graviter sentient, quam vile et nihilum erat quod amaverunt. Sancti autem Dei, et omnes devoti amici Christi, non attenderunt quae carni placuerunt, nec quae in hoc tempore floruerunt; sed tota spes eorum et intentio ad aeterna bona anhelabat. ferebatur totum desiderium eorum sursum ad mansura et invisibilia, ne amore visibilium traherentur ad infima. noli, frater, amittere confidentiam proficiendi ad spiritualia; adhuc habes tempus et horam. Quare vis procrastinare propositum tuum? surge, et in instanti incipe,

et dic : nunc tempus est faciendi, nunc tempus est pugnandi, nunc aptum tempus est emendandi. quando male habes, et tribularis, tunc tempus est promerendi. oportet te transire per ignem et aquam, antequam venias in refrigerium. nisi tibi vim feceris, vitium non superabis. quamdiu istud fragile corpus gerimus, sine peccato esse non possumus, nec sine taedio et dolore vivere. libenter haberemus ab omni miseria quietem; sed quia per peccatum perdidimus innocentiam, amisimus etiam veram beatitudinem. ideo oportet nos tenere patientiam, et Dei expectare misericordiam; donec transcat iniquitas hæc, et mortalitas absorbeatur a vita. O quanta fragilitas humana, quæ semper prona est ad vitia! hodie confiteris peccata tua, et cras iterum perpetras confessa. nunc proponis cavere; et post horam agis, quasi nihil proposuisses. merito ergo nos ipsos humiliare possumus, nec umquam aliquid magni de nobis sentire; quia tam fragiles et instabiles sumus, cito etiam potest perdi per negligentiam, quod multo labore vix tandem acquisitum est per gratiam. Quid fiet de nobis adhuc in fine, qui tepescimus tam mane? vae nobis, si sic volumus declinare ad quietem, quasi jam pax sit et securitas, cum necdum appareat vestigium veræ sanctitatis, in conversatione nostra. bene opus esset, quod adhuc iterum instrueremur, tamquam boni novitii, ad mores

optimos: si forte spes esset de aliqua futura emendatione, et majori spirituali profectu.

XXIII. DE MEDITATIONE MORTIS.

VALDE cito erit tecum huc factum, vide aliter quomodo te habeas: hodie homo est, et cras non comparet. cum autem sublatus fuerit ab oculis, etiam cito transit a mente. ô hebetudo et duritia cordis humani, quod solum praesentia meditatur, et futura non magis praevidet! sic te in omni facto et cogitatu deberes tenere, quasi hodie esses moriturus. si bonam conscientiam haberes, non multum mortem timeres. melius esset peccata cavere, quam mortem fugere. si hodie non es paratus, quomodo cras eris? cras est dies incerta; et quid scis, si crastinum habebis? Quid prodest diu vivere, quando tam parum emendatur? ah! longa vita non semper emendat, sed saepe culpam magis auget. utinam per unam diem bene essemus conversati in hoc mundo! multi annos computant conversionis, sed saepe parvus est fructus emendationis. si formidolosum est mori, forsitan periculosius erit diutius vivere. beatus, qui horam mortis suae semper ante oculos habet, et ad moriendum quotidie se disponit. si vidisti aliquando hominem mori, cogita, quia et tu per eandem viam transibis. Cum mane fuerit, puta te ad vesperum non perventurum. vespere autem facto, mane non audcas

tibi polliceri. semper ergo paratus esto, et taliter vive, ut nunquam te imparatum mors inveniatur. multi subito et improvise moriuntur. nam hora, qua non putatur, filius hominis venturus est. quando illa extrema hora venerit, multum aliter sentire incipies de tota vita tua praeterita: et valde dolebis, quia tam negligens et remissus fuisti. Quam felix et prudens, qui talis nunc nititur esse in vita, qualis optat inveniri in morte! dabit namque magnam fiduciam feliciter moriendi, perfectus contemptus mundi, fervens desiderium in virtutibus proficiendi, amor disciplinae, labor poenitentiae, promptitudo obedientiae, abnegatio sui, et supportatio ejuslibet adversitatis pro amore Christi. multa bona potes operari, dum sanus es; sed infirmatus, nescio quid poteris. pauci ex infirmitate meliorantur: sic et qui multum peregrinantur, raro sanctificantur. Noli considerare super amicos et proximos, nec in futurum tuam differas salutem: quia citius obliviscentur tui homines, quam aestimas: melius est, nunc tempestive providere, et aliquid boni praemittere, quam super aliorum auxilio sperare. si non es pro te ipso sollicitus modo, quis erit sollicitus pro te in futuro? nunc tempus est valde pretiosum. nunc sunt dies salutis. nunc tempus acceptabile. sed prohi dolor, quod hoc utilius non expendis, in quo promereri vales, unde aeternaliter vivas! veniet, quando unum

diem seu horam pro emendatione desiderabis; et nescio an impetrabis. **Eia, carissime, de quanto periculo te poteris liberare, de quam magno timore eripere, si modo semper timoratus fueris, et suspectus de morte? stude nunc taliter vivere, ut in hora mortis valeas potius gaudere, quam timere. discce nunc mori mundo, ut tunc incipias vivere cum Christo. discce nunc omnia contemnere, ut tunc possis libere ad Christum pergere. castiga nunc corpus tuum per poenitentiam, ut tunc certam valeas habere confidentiam. Ah stulte, quid cogitas te diu victurum, cum nullum diem habeas securum? quam multi decepti sunt, et insperate de corpore extracti? quoties audisti a dicentibus, quia ille gladio cecidit, ille submersus est, ille ab alto ruens cervicem fregit, ille manducando obriguit, ille ludendo finem fecit? alius igne, alius ferro, alius peste, alius latrocinio interiit: et sic omnium finis mors est, et vita hominum tamquam umbra subito pertransit. Quis memorabitur tui post mortem? et quis orabit pro te? age, age nunc, carissime, quidquid agere potes: quia nescis quando morieris, nescis etiam quid tibi post mortem sequetur. dum tempus habes, congrega tibi divitias immortales. praeter salutem tuam, nihil cogites; solum quae Dei sunt, cures. fac nunc tibi amicos, venerando Dei Sanctos, et eorum actus imitando: ut, cum defeceris in hac vita, illi te recipiant in aeter-**

na tabernacula. *Serva te tamquam peregrinum et hospitem super terram, ad quem nihil spectat de mundi negotiis. serva cor liberum, et ad Deum sursum erectum, quia non habes hic manentem civitatem. illuc preces et gemitus quotidianos cum lacrymis dirige, ut spiritus tuus mereatur ad Dominum, post mortem, feliciter transire. amen.*

XXIV. DE JUDICIO ET POENIS PECCATORUM.

IN omnibus rebus respice finem, et qualiter ante districtum stabis judicem, cui nihil est occultum: qui muncribus non placatur, nec excusationes recipit; sed, quod justum est, judicabit. ô miserrime et insipiens peccator, quid respondebis Deo, omnia mala tua scienti; qui interdum formidas vultum hominis irati? ut quid non praevides tibi in die iudicii, quando nemo poterit per alium excusari vel defendi; sed unusquisque sufficiens onus erit sibi ipsi? nunc labor tuus est fructuosus, fletus acceptabilis, gemitus exaudibilis, dolor satisfactorius, et purgativus. Habet magnum et salubre purgatorium patiens homo, qui suscipiens injurias, plus dolet de alterius malitia, quam de sua injuria: qui pro contrariantibus sibi libenter orat, et ex corde culpas indulget: qui veniam ab aliis petere non retardat: qui facilius miseretur, quam irascitur: qui sibi ipsi violentiam frequenter fa-

cit, et carnem omnino spiritui subjugare conatur. melius est, modo purgare peccata, et vitia refecare, quam in futuro purganda reservare. vere nos ipsos decipimus per inordinatum amorem, quem ad carnem habemus. Quid aliud ignis ille devorabit, nisi peccata tua? quanto amplius tibi ipsi nunc parcis, et carnem sequeris, tanto durius postea lues, et majorem materiam comburendi reservas. in quibus homo peccavit, in illis gravius punietur. ibi acediosi, ardentibus stimulis perurgebuntur: et gulosi, ingenti siti ac fame cruciabuntur. ibi luxuriosi, et voluptatum amatores, ardenti pice et foetido sulphure perfundentur: et, sicut furiosi canes, prae dolore, invidiosi ululabunt. Nullum vitium erit, quod suum proprium cruciatum non habebit. ibi superbi, omni confusione replebuntur: et avari, miserrima egestate arctabuntur. ibi erit una hora gravior in poena, quam hic centum anni in gravissima poenitentia. ibi nulla requies est, nulla consolatio damnatis: hic tamen interdum cessatur a laboribus, atque amicorum fruitur solatiis. esto modo sollicitus et dolens pro peccatis tuis, ut in die judicii securus sis cum beatis. tunc enim iusti stabunt in magna constantia adversus eos, qui se angustiaverunt, et depresserunt. tunc stabit ad judicandum, qui modo se subjecit humiliter judiciis hominum. tunc magnam fiduciam habebit pauper et humilis, et pavebit unda-

que superbus. Tunc videbitur sapiens in hoc mundo fuisse, qui pro Christo didicit stultus et despectus esse. tunc placebit omnis tribulatio patienter perpeſſa, et omnis iniquitas oppilabit os suum. tunc gaudebit omnis devotus, et moerebit omnis irreligioſus. tunc plus exultabit caro afflicta, quam ſi in deliciis fuiſſet ſemper nutrita. tunc ſplendeſcit habitus vilis, et obteneſcet veſtis ſubtilis. tunc plus laudabitur pauperulum domicilium, quam deauratum palatium. tunc juvabit plus conſtans patientia, quam omnis mundi potentia. tunc amplius exaltabitur ſimplex obedientia, quam omnis ſecularis aſtutia. Tunc plus lactificabit pura et bona conſcientia, quam docta philoſophia. tunc plus ponderabit contemptus divitiarum, quam totus theſaurus terrigenarum. tunc magis conſolaberis ſuper devota oratione, quam ſuper delicata comeſtione. tunc potius gaudebis de ſervato ſilentio, quam de longa fabulatione. tunc plus valebunt ſancta opera, quam multa pulcra verba. tunc plus placebit ſtricta vita et ardua poenitentia, quam omnis delectatio terrena. diſce te nunc in modico pati, ut tunc a gravioribus valcas liberari. hic primo proba, quid poſſis poſtea. ſi nunc tam parum vales ſuſtinere, quomodo aeterna tormenta poteris ſuſſerre? ſi modo modica paſſio tam impatientem efficit, quid gehenna tunc faciet? ecce vere non potes duo gaudia habere,

delectari hic in mundo, et postea regnare cum Christo. Si usque in hodiernam diem semper in honoribus et voluptatibus vixisses; quid totum tibi profuisset, si jam mori instanti contingeret? omnia ergo vanitas, praeter amare Deum, et illi soli servire. Qui enim Deum ex toto corde amat; nec mortem, nec supplicium, nec iudicium, nec infernum metuit: quia perfectus amor, securum ad Deum accessum facit. quem autem adhuc peccare delectat, non mirum, si mortem et iudicium timeat. bonum tamen est, ut, si necdum amor a malo te revocat, saltem timor gehennalis coërceat qui vero timorem Dei postponit, diu stare in bono non valebit; sed diaboli laqueos citius incurret.

XXV. DE FERVENTI EMENDATIONE
TOTIUS VITAE NOSTRAE.

Esto vigilans et diligens in Dei servitio; et cogita frequenter: ad quid venisti, et cur seculum reliquisti? nonne ut Deo viveres, et spiritualis homo fieres? igitur ad profectum serveas, quia mercedem laborum tuorum in brevi recipies; nec erit tunc amplius timor, aut dolor, in finibus tuis. modicum nunc laborabis, et magnam requiem, imo perpetuam laetitiam, invenies. si tu permanse-
ris fidelis et fervidus in agendo, Deus procul dubio erit fidelis et locuples in retribuendo. spem bonam retinere debes, quod ad palmam

pervenies; sed securitatem capere non oportet, ne torpeas, aut elatus sis. Cum quidam anxius inter metum et spem frequenter fluctuaret, et quadam vice moerore confectus, in Ecclesia ante quoddam altare se in oratione prostravisset, haec intra se revolvit, dicens: *ô si scires, quod adhuc perseveraturus esses!* statimque audivit divinum intus responsum: quod si hoc scires, quid facere velles? fac nunc, quod tunc facere velles, et bene securus eris. moxque consolatus, et confortatus, divinae se commisit voluntati, et cessavit anxiosa fluctuatio. noluitque curiose investigare, ut sciret quae sibi essent futura: sed magis studuit inquirere, quae esset voluntas Dei beneplacens et perfecta, ad omne opus bonum inchoandum et perficiendum. Spera in Domino, et fac bonitatem (ait Propheta), et inhabita terram, et pascaris in divitiis ejus. unum est, quod multos a profectu et ferventi emendatione retrahit, horror difficultatis, seu labor certaminis. enimvero, illi maxime praeceteris in virtutibus proficiunt, qui ea, quae sibi magis gravia et contraria sunt, viriliter vincere nituntur. nam ibi homo plus proficit, et gratiam meretur ampliorem, ubi magis se ipsum vincit, et in spiritu mortificat. Sed non omnes habent aequè multum, ad vincendum et moriendum. diligens tamen aemulator, valentior erit ad proficiendum, etiam si plures habeat

passiones, quam alius bene morigeratus, minus tamen fervens ad virtutes. duo specialiter ad magnam emendationem juvant; videlicet, subtrahere se violenter, ad quod natura vitiose inclinatur; et ferventer instare pro bono, quo amplius quis indiget. illa enim studeas magis cavere et vincere, quae tibi frequentius in aliis displicent. Ubique profectum tuum capias: ut, si bona exempla videas vel audias, ad imitandum accendaris. si quid autem reprehensibile consideraveris, cave ne idem facias; aut, si aliquando fecisti, citius emendare te studeas. sicut oculus tuus alios considerat, sic iterum ab aliis notaris. quam jucundum et dulce est, videre fervidos et devotos fratres, bene morigeratos et disciplinatos! quam triste est et grave, videre inordinate ambulantes, qui ea, ad quae vocati sunt, non exercent! quam nocivum est, negligere vocationis suae propositum, et ad non commissam sensum inclinare! Memor esto arrepti propositi, et imaginem tibi propone Crucifixi. bene verecundari potes, inspecta vitam Iesu Christi; quia necdum magis illi te conformare studuisti, licet diu in via Dei fuisti. religiosus, qui se intente et devote in sanctissima vita et passione Domini exercet, omnia utilia et necessaria sibi abundanter ibi inveniet; nec opus est, ut extra Iesum aliquid melius quaerat. o si Iesus crucifixus in cor nostrum veniret, quam cito et sufficienter

docti essemus! Religiosus fervidus, omnia bene portat et capit, quae illi jubentur. religiosus negligens et tepidus, habet tribulationem super tribulationem, et ex omni parte patitur angustiam: quia interiori consolatione caret, et exteriorem quaerere prohibetur. religiosus, extra disciplinam vivens, gravi patet ruinae. qui laxiora quaerit et remissiora, semper in angustiiis erit: quia unum aut reliquum sibi displicebit. Quomodo faciunt tam multi alii religiosi, qui satis arctati sunt sub disciplina claustrali? raro exeunt, abstracte vivunt, pauperrime comedunt, grosse vestiuntur, multum laborant, parum loquuntur, diu vigilant, mature surgunt, orationes prolongant, frequenter legunt, et se in omni disciplina custodiunt. attende Carthusienses, Cistercienses, et diversae Religionis monachos ac moniales: qualiter omni nocte ad psallendum Domino assurgunt. et ideo turpe esset, ut tu deberes in tam sancto opere pigritare, ubi tanta multitudo religiosorum incipit Deo jubilaré. O si nihil aliud faciendum incumberet, nisi Dominum Deum nostrum toto corde et ore laudare! ô si numquam indigeres comedere, nec bibere, nec dormire; sed semper posses Deum laudare, et solummodo spiritualibus studiis vacare! tunc multo felicior esses quam modo, cum carni ex qualicumque necessitate servis. utinam non essent istae necessitates, sed solum spiri-

tuales animae refectiones, quas (heu) satis raro degustamus! Quando homo ad hoc pervenit, quod de nulla creatura consolationem suam quaerit, tunc ei Deus primo perfecte sapere incipit: tunc etiam bene contentus de omni eventu rerum erit. tunc nec pro magno laetabitur, nec pro modico contristabitur; sed ponit se integre et fiducialiter in Deo, qui est ei omnia in omnibus: cui nihil utique perit nec moritur, sed omnia ei vivunt, et ad nutum incunctanter deserviunt. Memento semper finis, et quia perditum non redit tempus. sine sollicitudine et diligentia, numquam acquies virtutes. si incipis tepestere, incipies male habere. si autem dederis te ad fervorem, invenies magnam pacem, et senties leviozem laborem, propter Dei gratiam, et virtutis amorem. homo fervidus, et diligens, ad omnia est paratus. major labor est, resistere vitiis et passionibus, quam corporalibus insudare laboribus. qui parvos non vitat defectus, paulatim labitur ad majores. gaudebis semper vespere, si diem expendas fructuose. vigila super te ipsum, excita te ipsum, admone te ipsum; et, quidquid de aliis sit, non negligas te ipsum. tantum proficies, quantum tibi ipsi vim intuleris. amen.

EXPLICIUNT ADMONITIONES AD SPI-
RITUALEM VITAM UTILES.

D E
IMITATIONE
CHRIST I.
LIBER SECUNDUS.

ADMONITIONES, AD INTERNA
TRAHENTES.

CAPUT I.

DE INTERNA CONVERSATIONE.

REGNUM Dei intra vos est, dicit Domi-
nus. converte te ex toto corde ad De-
minum, et relinque hunc miserum mundum,
et inveniet anima tua requiem. discite exteri-
ora contemnere, et ad interiora te dare, et
videbis regnum Dei in te venire. est enim
regnum Dei, pax et gaudium in Spiritu sanc-
to, quod non datur impiis. veniet ad te
Christus, ostendens tibi consolationem suam,
si dignam illi ab intus paraveris mansionem.
omnis gloria ejus, et decor, ab intra est, et ibi
complacet sibi. frequens illi visitatio cum ho-
mine interno, dulcis sermocinatio, grata con-

solatio, multa pax, familiaritas stupenda nimis. Eia, anima fidelis, praepara huic sponso cor tuum, quatenus ad te venire, et in te habitare dignetur. sic enim dicit: si quis diligit me, sermonem meum servabit, et ad eum veniemus, et mansionem apud eum faciemus. da ergo Christo locum, et ceteris omnibus nega introitum. cum Christum habueris, dives es, et sufficit tibi. ipse erit provisor tuus, et fidelis procurator in omnibus, ut non sit opus in hominibus sperare. homines enim cito mutantur, et deficiunt velociter; Christus autem manet in aeternum, et adstat usque in finem firmiter. Non est magna fiducia ponenda in homine fragili et mortali, etiam si utilis sit et dilectus: neque tristitia multa ex hoc capienda, si interdum adversetur et contradicat. qui hodie tecum sunt, cras contrariari possunt; et e converso, saepe ut aura, vertuntur. pone totam fiduciam in Deo, et sit ipse timor tuus, et amor tuus. ipse pro te respondebit, et faciet bene, sicut melius fuerit. non habes hic manentem civitatem; et, ubicumque fueris, extraneus es et peregrinus; nec requiem aliquando habebis, nisi Christo intime fueris unitus. Quid hic circumspecis, cum iste non sit locus tuae requietionis? in caelestibus debet esse habitatio tua; et sicut in transitu, cuncta terrena sunt apprehendenda. transeunt omnia, et tu cum eis pariter. vide, ut non inhaereas; ne capiaris, et pereas. a-

pod Altissimum sit cogitatio tua, et deprecatio tua ad Christum sine intermissione dirigatur. si nescis speculari alta et caelestia, requiesce in passione Christi; et in sacris vulneribus ejus libenter habita. si enim ad vulnera, et pretiosa stigmata Iesu, devote confugis, magnam in tribulatione confortationem senties: nec multum curabis hominum despectiones, faciliterque verba detrahentia perferes. Christus fuit etiam in mundo ab hominibus despectus: et, in maxima necessitate, a notis et amicis inter opprobria derelictus. Christus pati voluit et despici, et tu audes de aliquo conqueri? Christus habuit adversarios et oblocutores, et tu vis omnes habere amicos et benefactores? unde coronabitur patientia tua, si nihil adversitatis occurrerit? si nihil contrarium vis pati, quomodo eris amicus Christi? sustine te cum Christo, et pro Christo, si vis regnare cum Christo. Si semel perfecte introisses in interiora Iesu, et modicum de ardenti amore ejus sapuisses, tunc de proprio commodo vel incommodo nihil curares, sed magis de opprobrio illato gauderes: quia amor Iesu, facit hominem se ipsum contemnere. amator Iesu et veritatis, et verus internus et liber ab affectionibus inordinatis, potest se ad Deum libere convertere, et elevare supra se ipsum in spiritu, ac fruitive quiescere. Cui sapiunt omnia, prout sunt, non ut dicuntur, aut aestimantur, hic vere sapiens

est, et doctus magis a Deo, quam ab hominibus. qui ab intra scit ambulare, et modicum ab extra res ponderare, non requirit loca, nec expectat tempora, ad habenda devota exercitia. homo internus cito se recolligit: quia numquam se totum ad exteriora effundit. non illi obest labor exterior, aut occupatio ad tempus necessaria: sed sicut res eveniunt, sic se illis accommodat. qui intus bene dispositus est et ordinatus, non curat mirabiles et perverfos hominum gestus. tantum homo impeditur et distrahitur, quantum sibi res attrahit. Si recte tibi esset, et bene purgatus esses, omnia tibi in bonum cederent, et profectum, ideo multa tibi displicent, et saepe conturbant; quia adhuc non es perfecte tibi ipsi mortuus, nec segregatus ab omniibus terrenis. nil sic maculat et implicat cor hominis, sicut impurus amor in creaturis. si renuis consolari exterius, poteris speculari caelestia, et frequenter jubilaré interius.

II. DE HUMILI SUBMISSIONE.

Non magni pendas, quis pro te, vel contra te sit; sed hoc age et cura, ut Deus tecum sit in omni re, quam facis. habeas conscientiam bonam, et Deus bene te defensabit. quem enim Deus adjuvare voluerit, nullius perversitas nocere poterit. si tu scis tacere et pati, videbis proculdubio auxilium Domini.

ipse novit tempus et modum liberandi te, et ideo te debes illi resignare. Dei est adjuvare, et ab omni confusione liberare. saepe valde prodest, ad majorem humilitatem servandam, quod defectus nostros alii sciunt, et redarguant. Quando homo pro defectibus suis se humiliat, tunc facilius alios placat, et leviter satisfacit sibi irascentibus. humilem Deus protegit, et liberat: humilem diligit, et consolatur: humili homini se inclinat: humili largitur gratiam magnam, et post suam depressionem, levat ad gloriam. humili sua secreta revelat, et ad se dulciter trahit et invitat. humilis, accepta confusione, satis bene est in pace: quia stat in Deo, et non in mundo. non reputes te aliquid profecisse, nisi omnibus inferiorem te esse sentias.

III. DE BONO PACIFICO HOMINE.

TENE te primo in pace, et tunc poteris alios pacificare. homo pacificus magis prodest, quam bene doctus. homo passionatus, etiam bonum in malum trahit, et facilius malum credit. bonus pacificus homo, omnia ad bonum convertit. qui bene in pace est, de nullo suspicatur; qui autem male contentus est et commotus, variis suspicionibus agitur: nec ipse quiescit, nec alios quiescere permittit. dicit saepe, quod dicere non deberet: et omittit, quod sibi magis facere expediret.

considerat, quid alii facere tenentur: et negligit, quod ipse teneatur. habet ergo primo zelum super te ipsum, et tunc iuste zelare poteris etiam proximum tuum. Tu bene scis facta tua excusare et colorare, et aliorum excusationes non vis recipere. iustius esset, ut te accusares, et fratrem tuum excusares. si portari vis, porta et alium. vide, quam longe es adhuc a vera caritate et humilitate: quae nulli novit irasci, vel indignari, nisi tantum sibi. non est magnum, cum bonis et mansuetis conversari (hoc enim omnibus naturaliter placet; et unusquisque libenter pacem habet, et secum sentientes magis diligit); sed cum duris et perversis, aut indisciplinatis, aut nobis contrariantibus, pacifice posse vivere, magna gratia est, et laudabile nimis virileque factum. Sunt, qui se ipsos in pace tenent, et cum aliis etiam pacem habent. et sunt, qui nec pacem habent, nec alios in pace dimitunt: aliis sunt graves, sed sibi semper graviores. et sunt, qui se ipsos in pace retinent, et ad pacem alios reducere student. est tamen tota pax nostra, in hac misera vita, potius in humili sufferentia ponenda, quam in non sentiendo contraria. qui melius scit pati, maiorem tenebit pacem. iste est victor sui, et dominus mundi, amicus Christi, et heres caeli.

IV. DE PURA MENTE, ET SIMPLICI INTENTIONE.

DUABUS alis homo sublevatur a terrenis, simplicitate scilicet, et puritate. simplicitas debet esse in intentione, puritas in affectione. simplicitas intendit Deum, puritas apprehendit, et gustat. nulla bona actio te impedit, si liber intus ab inordinato affectu fueris. si nihil aliud, quam Dei beneplacitum, et proximi utilitatem intendis et quaeris, interna libertate perfrueris. si rectum cor tuum esset, tunc omnis creatura speculum vitae, et liber sanctae doctrinae esset. non est creatura tam parva et vilis, quae Dei bonitatem non repraesentet. Si tu esses intus bonus et purus, tunc omnia sine impedimento videres, et bene caperes. cor purum, penetrat caelum et infernum. qualis unusquisque intus est, taliter judicat exterius. si est gaudium in mundo, hoc utique possidet puri cordis homo. et si est alicubi tribulatio et angustia, hoc melius novit mala conscientia. sicut ferrum missum in ignem amittit rubiginem, et totum candens efficitur: sic homo integre ad Deum se convertens, a torpore exuitur, et in novum hominem transmutatur. Quando homo incipit tepescere, tunc parvum metuit laborem, et libenter externam accipit consolationem. sed quando perfecte incipit se vincere.

et viriliter in via Dei ambulare, tunc minus ea reputat, quae sibi prius gravia esse sentiebat.

V. DE PROPRIA CONSIDERATIONE.

Non possumus nobis ipsis nimis credere, quia saepe gratia nobis deest, et sensus. modicum lumen est in nobis, et hoc cito per negligentiam amittimus. saepe etiam non advertimus, quod tam caeci latius sumus. saepe male agimus, et peius excusamus. passionibus interdum movemur, et zelum putamus. parva in aliis reprehendimus; et nostra maiora pertransimus. satis cito sentimus et ponderamus, quid ab aliis sustinemus; sed quantum alii de nobis sustinent, non advertimus, qui bene et recte sua ponderaret, non esset, quod de alio graviter iudicaret. Internus homo, sui ipsius curam omnibus curis anteponeit: et qui sibi ipsi diligenter intendit, facilliter de aliis tacet. numquam eris internus et devotus, nisi de alienis silueris, et ad te ipsum specialiter respexeris. si tibi et Deo totaliter intendis, modicum te movebit, quod foris percipis. ubi es, quando tibi ipsi praesens non es? et quando omnia percurristi, quid, te neglecto, profecisti? si debes habere pacem, et unionem veram, oportet, quod totum adhuc postponas, et te solum praec oculis habeas. Multum proinde proficies, si te fe-

riatum ab omni temporali cura conserves. valde deficiet, si aliquid temporale reputaveris. nil magnum, nil altum, nil gratum, nil acceptum tibi sit, nisi pure Deus, aut de Deo sit. totum vanum existima, quidquid consolationis occurrit de aliqua creatura. amans Deum anima, sub Deo despicit universa. solus Deus aeternus et immensus, implens omnia, solatium animae, et vera cordis laetitia.

VI. DE LAETITIA BONAE CONSCIENTIAE.

GLORIA boni hominis, testimonium bonae conscientiae. habe bonam conscientiam, et habebis semper laetitiam. bona conscientia valde multa potest portare, et valde laeta est inter adversa. mala conscientia semper timida est et inquieta. suaviter requiesces, si cor tuum te non reprehenderit. noli laetari, nisi cum benefeceris. mali numquam habent veram laetitiam, nec internam sentiunt pacem: quia non est pax impiis, dicit Dominus. et si dixerint: in pace sumus, non venient super nos mala: et quis nobis nocere audebit? ne credas eis: quoniam repente exsurgit ira Dei, et in nihilum rediguntur actus eorum, et cogitationes eorum peribunt. Gloriari in tribulatione, non est grave amanti: sic enim gloriari, est gloriari in cruce Domini. brevis gloria, quae ab hominibus datur, et accipitur.

mundi gloriam semper comitatur tristitia. bonorum gloria, in conscientiiis eorum, et non in ore hominum. iustorum laetitia, de Deo, et in Deo est; et gaudium eorum, de veritate. qui veram et aeternam gloriam desiderat, temporalem non curat. et qui temporalem requirit gloriam, aut non ex animo contemnit; minus amare convincitur caelestem. magnam habet cordis tranquillitatem, qui nec laudes curat, nec vituperia. Facile erit contentus et pacatus, cujus conscientia munda est. non es sanctior, si laudaris; nec vilior, si vituperaris. quod es, hoc es: nec major dici vales, quam Deo teste sis. si attendis, quid apud te sis intus; non curabis, quid de te loquantur homines. homo videt in facie, Deus autem in corde. homo considerat actus, Deus vero pensat intentiones. bene semper agere, et modicum de se tenere, humilis animae indicium est. nolle consolari ab aliqua creatura, magnae puritatis, et internae fiduciae, signum est. Qui nullum extrinsecus pro se testimonium quaerit, liquet quod totaliter se Deo commisit. non enim, qui se ipsum commendat, ille probatus est (ait B. Paulus); sed quem Deus commendat. ambulare cum Deo intus, nec aliqua affectione teneri foris, status est interni hominis.

VII. DE AMORE IESU SUPER OMNIA.

BRATUS, qui intelligit, quid sit amare Iesum, et contemnere se ipsum, propter Iesum. oportet dilectum pro dilecto relinquere, quia Iesus vult solus super omnia amari. dilectio creaturae, fallax et instabilis; dilectio Iesu, fidelis et perseverabilis. qui adhaeret creaturae, cadet cum labili: qui amplectitur Iesum, firmabitur in aevum. illum dilige, et amicum tibi retine: qui, omnibus recedentibus, te non relinquet, nec patietur in fine perire. ab omnibus oportet te aliquando separari, si ve-
lis, si nolis. Teneas te apud Iesum, vivens ac moriens: et illius fidelitati te committe, qui, omnibus deficientibus, solus te potest juvare. dilectus tuus, talis est naturae, ut alienum non velit admittere: sed solus vult cor tuum habere, et tamquam rex in proprio throno sedere. si scires te bene ab omni creatura evacuare, Iesus deberet libenter tecum habitare. pene totum perditum invenies, quidquid extra Iesum in hominibus posueris. non confidas, nec innitaris super calammum ventosum: quia omnis caro foenum, et omnis gloria ejus, ut flos foeni cadet. Cito decipieris, si ad externam hominum apparentiam tantum aspexeris. si enim tuum in aliis quaeris solatium et lucrum, senties saepius detrimentum. si quaeris in omnibus Iesum, inve-

58. DE IMITATIONE

nies utique Iesum ; si autem quaeris te ipsum, invenies etiam te ipsum, sed ad tuam perniciem. plus enim homo nocivior sibi, si Iesum non quaerit, quam totus mundus, et omnes sui adversarii.

VIII. DE FAMILIARI AMICITIA IESU.

QUANDO Iesus adest totum bonum est, nec quidquam difficile videtur : quando vero Iesus non adest, totum durum est. quando Iesus intus non loquitur, consolatio vilis est: si autem Iesus unum tantum verbum loquitur, magna consolatio sentitur. nonne Maria Magdalena statim surrexit de loco, in quo flevit, quando Martha illi dixit, Magister adest, et vocat te? felix hora, quando Iesus vocat de lacrymis ad gaudium spiritus! quam aridus et durus es sine Iesu! quam insipiens et vaneus, si cupis aliquid extra Iesum! nonne hoc est majus damnum, quam si totum perderes mundum? Quid potest tibi mundus conferre sine Iesu? esse sine Iesu, gravis est infernus; et esse cum Iesu, dulcis paradysus. si fuerit tecum Iesus, nullus poterit nocere inimicus. qui invenit Iesum, invenit thesaurum bonum, immo bonum super omne bonum; et qui perdit Iesum, perdit nimis multum, et plus quam totum mundum. pauperrimus est, qui vivit sine Iesu; et ditissimus, qui bene est cum Iesu. Magna ars est, scire cum Iesu conversa-

ri; et scire Iesum tenere, magna prudentia. esto humilis et pacificus, et erit tecum Iesus. sis devotus et quietus, et manebit tecum Iesus. potes cito fugare Iesum, et gratiam ejus perdere, si volueris ad exteriora declinare. et si illum effugaveris et perdideris, ad quem fugies, et quem tunc quaeres amicum? sine amico, non potes bene vivere: et si Iesus non fuerit tibi prae omnibus amicus, eris nimis tristis et desolatus. fatue igitur agis, si in aliquo altero confidis, aut laetaris. eligendum est magis, totum mundum habere contrarium, quam Iesum offensum. ex omnibus ergo caris, sit Iesus solus dilectus specialis. Diligantur omnes propter Iesum, Iesus autem propter se ipsum. solus Iesus Christus singulariter est amandus; qui solus bonus et fidelis, prae omnibus invenitur amicis. propter ipsum, et in ipso, tam amici, quam inimici, tibi sint cari: et pro omnibus his exorandus est, ut omnes ipsum cognoscant et diligant. numquam cupias singulariter laudari vel amari, quia hoc solius Dei est, qui similem sibi non habet. nec velis, quod aliquis tecum in corde suo occupetur, neque tu cum alicujus occuperis amore; sed sit Iesus in te, et in omni bono homine. Esto purus et liber ab intus, sine alicujus creaturae implicamento. oportet te esse nudum, et purum cor ad Deum gerere, si vis vacare et videre quam suavis sit Dominus. et revera ad hoc non pervenies, nisi

gratia ejus fueris praeventus et intractus: ut omnibus evacuatis et licentiatis, solus cum solo uniaris. quando enim gratia Dei venit ad hominem, tunc potens fit ad omnia: et quando recedit, tunc pauper et infirmus erit, et quasi tantum ad flagella relictus. in his non debet dejici, nec desperare; sed ad voluntatem Dei aequanimiter stare, et cuncta supervenientia sibi ad laudem Iesu Christi perpeti: quia post hiemem sequitur aestas; post noctem redit dies; et post tempestatem magna serenitas.

IX. DE CARENTIA OMNIS SOLATII.

Non est grave, humanum contemnere solatium, cum adest divinum. magnum est, et valde magnum, tam humano quam divino posse carere solatio; et, pro honore Dei, libenter exilium cordis velle sustinere; et in nullo se ipsum quaerere, nec ad proprium meritum respicere. quid magni est, si hilaris sis et devotus adveniente gratia? optabilis cunctis haec hora. satis suaviter equitat, quem gratia Dei portat. et quid mirum, si onus non sentit, qui portatur ab omnipotente, et ducitur a summo ductore? Libenter habemus aliquid pro solatio, et difficulter homo exuitur a se ipso. vicit sanctus martyr Laurentius seculum cum suo sacerdote: quia omne, quod in mundo delectabile videbatur, despexit:

et, summum Dei sacerdotem Sixtum, quem maxime diligebat, pro amore Christi, etiam a se tolli, clementer ferebat. amore igitur creatoris, amorem hominis superavit: et pro humano solatio, divinum beneplacitum magis elegit. ita et tu aliquem necessarium et dilectum amicum, pro amore Dei disce relinquere. nec graviter feras, cum ab amico derelictus fueris, sciens, quoniam oportet, nos omnes tandem ab invicem separari. Multum et diu oportet hominem in se ipso certare, antequam discat se ipsum plene superare, et totum affectum suum in Deum trahere. quando homo stat super se ipsum, facile labitur ad consolationes humanas. sed verus amator Christi, et studiosus sectator virtutum, non cadit super consolationes, nec quaerit tales sensibiles dulcedines; sed magis fortes exercitationes, et pro Christo duros sustinere labores. Cum igitur spiritualis a Deo consolatio datur, cum gratiarum actione accipe eam; sed Dei munus intellige esse, non tuum meritum. noli extolli, noli nimium gaudere, nec inaniter praesumere: sed esto magis humilior ex dono, cautior quoque et timoratio in cunctis actibus tuis: quoniam transibit hora illa, et sequetur tentatio. cum ablata fuerit consolatio, non statim desperes; sed cum humilitate, et patientia, expecta caelestem visitationem: quoniam potens est Deus amplius tibi redonare consolationem. istud non

est novum, nec alienum, viam Dei expertis: quia in magnis Sanctis, et in antiquis Prophetis, fuit saepe talis alternationis modus. Unde quidam, praesente jam gratia, dicebat: ego dixi in abundantia mea, non movebor in aeternum. absente vero gratia, quid in se fuerit expertus, adjungit, dicens: avertisti faciem tuam a me, et factus sum conturbatus. Inter haec tamen nequaquam desperat, sed instantius Dominum rogat, et dicit: ad te, Domine, clamabo, et ad Deum meum deprecabor. denique orationis suae fructum reportat, et se exauditum testatur, dicens: audivit Dominus, et misertus est mei: Dominus factus est adjutor meus. sed in quo? convertisti, inquit, planctum meum in gaudium mihi, et circumdediti me laetitia. si sic actum est cum magnis Sanctis, non est desperandum nobis infirmis et pauperibus, si interdum in fervore, et interdum in frigiditate sumus: quoniam spiritus venit et recedit, secundum suae beneplacitum voluntatis. unde beatus Job ait: visitas eum diluculo, et subito probas illum. Super quid igitur sperare possum, aut in quo confidere debeo, nisi in sola magna misericordia Dei, et in sola spe gratiae caelestis? sive enim adsint homines boni; sive devoti fratres, vel amici fideles; sive libri sancti, vel tractatus pulcri; sive dulcis cantus et hymni: omnia haec modicum juvant, modicum sapiunt, quando desertus sum

a gratia, et in propria paupertate relictus. tunc non est melius remedium, quam patientia, et abnegatio mei in voluntate Dei. Numquam inveni aliquem tam religiosum et devotum, qui non habuerit interdum gratias subtractionem, aut non senserit fervoris diminutionem. nullus sanctus fuit tam alteraptus et illuminatus, qui prius, vel postea, non fuit tentatus. non enim dignus est alta Dei contemplatione, qui pro Deo non est exercitatus aliqua tribulatione. solet enim sequentis consolationis, tentatio praecedens, esse signum. nam tentationibus probatis caelestis promittitur consolatio. qui vicerit, inquit, dabo ei edere de ligno vitae. Datur autem consolatio divina, ut homo fortior sit ad sustinendum adversa. sequitur etiam tentatio, ne se elevet de bono. non dormit diabolus, nec caro adhuc mortua est: ideo non cesses te praeparare ad certamen: quia a dextris et a sinistris hostes sunt, qui numquam quiescunt.

X. DE GRATITUDINE PRO GRATIA DEI.

CUR quaeris quietem, cum natus sis ad laborem? pone te ad patientiam magis, quam ad consolationes; et ad crucem portandam magis, quam ad laetitiam. quis enim secularium non libenter consolationem et laetitiam spirituales acciperet, si semper obtinere posset? excedunt enim spirituales consolationes,

omnes mundi delicias, et carnis voluptates, nam omnes deliciae mundanae, aut vanae sunt, aut turpes. spirituales vero deliciae, solae jucundae et honestae, ex virtutibus progentae, et a Deo puris mentibus infusae. sed istis divinis consolationibus nemo semper pro suo affectu frui valet; quia tempus tentationis non diu cessat. Multum autem contrariatur supernae visitationi falsa libertas animi, et magna confidentia sui. Deus bene facit, consolationis gratiam dando; sed homo male agit, non totum Deo, cum gratiarum actione, retribuendo. et ideo non possunt in nobis dona gratiae fluere, quia ingrati sumus auctori, nec totum refundimus fontali origini. semper enim debetur gratia, digne gratias referenti: et auferetur ab elato, quod dari solet humili. Nolo consolationem, quae mihi auferat compunctionem: nec affecto contemplationem, quae ducit in elationem. non enim omne altum, sanctum: nec omne dulce, bonum: nec omne desiderium, purum: nec omne carum, Deo gratum. libenter accepto gratiam, unde semper humilior et timorator inveniar, atque ad relinquendum me paratior fiam. doctus dono gratiae, et eruditus subtractionis verberare, non sibi audebit quidquam boni attribueret; sed potius se pauperem et nudum confitebitur. da Deo, quod Dei est; et tibi adscribe, quod tuum est; hoc est, Deo gratias pro gratia tribue; tibi autem soli cul-

pam, et dignam poenam pro culpa, deberi sentias. Pone te semper ad infimum, et dabitur tibi summum: nam summum, non stat sine infimo. summi sancti apud Deum, minimi sunt apud se: et quanto gloriosiores, tanto in se humiliores. pleni veritate et gloria caelesti, non sunt vanae gloriae cupidi. in Deo fundati et confirmati, nullo modo possunt esse elati. et qui totum Deo adscribunt, quidquid boni acceperunt, gloriam ab invicem non quaerunt; sed gloriam, quae a solo Deo est, volunt: et Deum in se et in omnibus Sanctis laudari super omnia cupiunt, et semper in id ipsum tendunt. Esto igitur gratus pro minimo, et eris dignus majora accipere. sit tibi minimum, etiam pro maximo; et magis contemptibile, pro speciali dono. si dignitas datoris inspicitur, nullum datum parvum, aut nimis vile videbitur. non enim parvum est, quod a summo Deo donatur. etiam si poenas et verbera dederit, gratum esse debet: quia semper pro salute nostra facit, quidquid nobis advenire permittit. qui gratiam Dei retinere desiderat, sit gratus pro gratia data, patiens pro sublata. oret ut redeat: cautus sit et humilis, ne amittat.

XI. DE PAUCITATE AMATORUM CRUCIS
IESU.

HABET Iesus nunc multos amatores regni sui caelestis, sed paucos bajulatores suae crucis. multos habet desideratores consolationis, sed paucos tribulationis; plures invenit socios mensae, sed paucos abstinentiae. omnes cupiunt cum eo gaudere, pauci volunt pro eo aliquid festinare. multi Iesum sequuntur usque ad fractionem panis; sed pauci usque ad bibendum calicem passionis. multi miracula ejus venerantur, pauci ignominiam crucis sequuntur. multi Iesum diligunt, quamdiu adversa non contingunt. multi illum laudant et benedicunt, quamdiu consolationes aliquas ab ipso percipiunt. si autem Iesus se absconderit, et modicum eos reliquerit: aut in querimoniam, vel in dejectionem nimiam, cadunt. Qui autem Iesum propter Iesum, et non propter suam propriam aliquam consolationem diligunt, ipsum in omni tribulatione et angustia cordis, sicut in summa consolatione, benedicunt. et si numquam eis consolationem dare vellet, ipsum tamen semper laudarent, et semper gratias agere vellent. O quantum potest amor Iesu purus, nullo proprio commodo vel amore permixtus! nonne omnes mercenarii sunt dicendi, qui consolationes semper quaerunt? nonne amatores sui

magis, quam Christi probantur, qui sua com-
moda et lucra semper meditantur? ubi inve-
niatur talis, qui velit Deo servire gratis? Ra-
ro invenitur tam spiritualis aliquis, qui om-
nibus sit nudatus. nam verum pauperem spi-
ritu, et ab omni creatura nudum, quis inve-
niat? procul et de ultimis finibus pretium sa-
jus. si dederit homo omnem substantiam su-
am, adhuc nihil est. et si fecerit poenitenti-
am magnam, adhuc exiguum est. et si appre-
henderit omnem scientiam, adhuc longe est.
et si habuerit virtutem magnam, et devotio-
nem nimis ardentem, adhuc multum sibi de-
est; scilicet unum, quod summe sibi necessi-
rium est. quid illud? ut omnibus relictis se
relinquat, et a se totaliter exeat, nihilque de
privato amore retineat. cumque omnia fece-
rit quae facienda noverit, nil se fecisse sentiat.
Non grande ponderet, quod grande aestimari
possit; sed in veritate servum inutilem se pro-
nuntiet, sicut Veritas ait: cum feceritis om-
nia, quae praecepta sunt vobis, dicit, Servi
inutiles sumus. tunc vere pauper, et nudus
spiritu esse poterit, et cum Propheta dicere:
quia unicus et pauper sum ego. nemo ta-
men isto ditior, nemo potentior, nemo libe-
rior, qui se et omnia relinquere scit, et ad in-
firmum se ponere.

XII. DE REGIA VIA SANCTAE CRUCIS.

DURUS multis videtur hic sermo: abnega te met ipsum: tolle crucem tuam, et sequere Iesum. sed multo durius erit, audire illud extremum verbum: discedite a me, maledicti, in ignem aeternum. qui enim modo libenter audiunt, et sequuntur verbum crucis, tunc non timebunt ab auditione aeternae damnationis. hoc signum crucis erit in caelo, cum Dominus ad iudicandum venerit. tunc omnes servi crucis, qui se Crucifixo conformaverunt in vita, accedent ad Christum iudicem cum magna fiducia. Quid igitur times tollere crucem, per quam itur ad regnum? in cruce salus, in cruce vita, in cruce protectio ab hostibus: in cruce infusio supernae suavitatis, in cruce robur mentis, in cruce gaudium spiritus: in cruce summa virtutis, in cruce perfectio sanctitatis. non est salus animae, nec spes aeternae vitae, nisi in cruce. tolle ergo crucem tuam, et sequere Iesum, et ibis in vitam aeternam. praecessit ille, bajulans sibi crucem, et mortuus est pro te in cruce; ut et tu tuam portes crucem, et mori affectes in cruce. quia, si commortuus fueris, etiam cum illo pariter vives. et si socius fueris poenae, eris et gloriae. Ecce in cruce totum constat, et in moriendo totum jacet: et non est alia via ad vitam, et ad veram inter-

nam pacem, nisi via sanctae crucis, et quotidianae mortificationis. ambula ubi vis, quaere quodcumque volueris: et non inuenies altiore viam supra, nec securiorem viam infra, nisi viam sanctae crucis. dispone et ordina omnia secundum tuum velle et videre: et non inuenies, nisi semper aliquid pati debere, aut sponte, aut invite; et ita crucem semper inuenies. aut enim in corpore dolorem senties: aut in anima spiritus tribulationem sustinebis. Interdum a Deo relinqueris, interdum a proximo exercitaberis, et quod amplius est, saepe tibi met ipsi gravis eris; nec tamen aliquo remedio vel solatio liberari seu alleviari poteris: sed donec Deus voluerit, oportet ut sustineas. vult enim Deus, ut tribulationem sine consolatione pati discas, et ut illi totaliter te subicias, et humilior ex tribulatione fias. nemo ita cordialiter sentit passionem Christi, sicut is, cui contigerit similia pati. crux ergo semper parata est, et ubique te exspectat. non potes effugere, ubicumque cucurreris: quia ubicumque veneris, te ipsum tecum portas, et semper te ipsum inuenies. converte te supra, converte te infra; converte te extra, converte te intra; et in his omnibus inuenies crucem: et necesse est te ubique tenere patientiam, si internam vis habere pacem, et perpetuam promereri coronam. Si libenter crucem portas, portabit te, et ducet ad desideratum finem, ubi sci-

licet finis patiendo erit, quamvis hic non erit. si invite portas, onus tibi facis, et te ipsum magis gravas: et tamen oportet ut sustineas. si abjicis unam crucem, aliam proculdubio invenies, et forsitan graviores. Credis tu evadere, quod nullus mortalium potuit praeterire? quis Sanctorum in mundo sine cruce et tribulatione fuit? nec enim Iesus Christus, Dominus noster, una hora sine dolore passionis fuit, quamdiu vixit. oportebat (ait) Christum pati, et resurgere a mortuis, et ita intrare in gloriam suam. et quomodo tu aliam viam quaeris, quam hanc regiam viam, quae est via sanctae crucis? Tota vita Christi, crux fuit et martyrium: et tu tibi quaeris requiem et gaudium? erras, erras, si aliud quaeris, quam pati tribulationes: quia tota ista vita mortalis plena est miseriis, et circumsignata crucibus. et quanto altius quis in spiritu profecerit, tanto graviores saepe crucces invenit: quia exilii sui poena, magis ex amore crescit. Sed tamen, iste sic multipliciter afflictus, non est sine levamine consolationis: quia fructum maximum sibi sentit accrescere ex sufferentia suae crucis. nam dum sponte se illi subicit, omne onus tribulationis in fiduciam divinae consolationis convertitur. et quanto caro magis per afflictionem atteritur, tanto spiritus amplius per internam gratiam roboratur. et nonnumquam in tantum confortatur ex affectu tribulationis et

adversitatis, ob amorem conformitatis crucis Christi, ut se sine dolore et tribulatione esse non vellet: quoniam tanto se acceptiorem Deo credit, quanto plura et graviora pro eo perferre potuerit. non est istud hominis virtus, sed gratia Christi, quae tanta potest et agit in carne fragili; ut quod naturaliter semper abhorret et fugit, hoc fervore spiritus aggre diatur et diligit. Non est secundum hominem crucem portare, crucem amare, corpus castigare et servituti subicere: honores fugere, contumelias libenter sustinere, se ipsum despiciere et despici optare: adversa quaeque cum damnis perpeti, et nihil prosperitatis in hoc mundo desiderare. si ad te ipsum respicis, nihil hujusmodi ex te poteris. sed si in Domino confidis, dabitur tibi fortitudo de caelo, et subicientur ditioni tuae mundus et caro. sed nec inimicum diabolium timebis, si fueris fide armatus, et cruce Christi signatus. Pone te ergo, sicut bonus et fidelis servus Christi, ad portandum viriliter crucem Domini tui, pro te ex amore crucifixi. praepara te ad toleranda multa adversa et varia incommoda, in hac misera vita: quia sic tecum erit, ubicumque fueris: et sic revera invenies, ubicumque laqueris. oportet ita esse: et non est remedium evadendi a tribulatione malorum et dolore, quam ut te patiaris. calicem Domini affectanter bibe, si amicus ejus esse, et partem cum eo habere, desideras. consola-

tiones Deo committe: faciat ipse cum tui-
bus, sicut sibi magis placuerit. tu vero, pone
te ad sustinendum tribulationes, et reputa eas
maximas consolationes: quia non sunt con-
dignae passionibus hujus temporis, ad futuram
gloriam promerendam, etiam si solus omnes
posses sustinere. Quando ad hoc veneris,
quod tribulatio tibi dulcis est, et sapit pro
Christo, tunc bene tecum esse aestima, quia
invenisti paradisum in terra. quamdiu pati
grave tibi est, et fugere quaeris; tamdiu male
habebis, et sequetur te ubique fuga tribulati-
onis. Si ponis te, ad quod esse debes, vide-
licet ad patiendum et moriendum, fiet cito
melius, et pacem invenies. etiam si raptus
fueris usque ad tertium caelum cum Paulo,
non es propterea securatus de nullo contra-
rio patiundo. ego (inquit Iesus) ostendam
illi, quanta oporteat eum pro nomine meo
pati. pati ergo tibi remanet, si Iesum dili-
gere, et perpetuo illi servire placet. Uti-
nam dignus esses aliquid pro nomine Iesu
pati! quam magna gloria remaneret tibi,
quanta exultatio omnibus Sanctis Dei, quan-
ta quoque aedificatio esset proximi! nam pa-
tientiam omnes recommendant, quamvis
pauci tamen pati velint. merito deberes li-
benter modicum pati pro Christo, cum mul-
ti graviora patiuntur pro mundo. Scias pro
certo, quia morientem te oportet ducere vi-
tam. et quanto quisque plus sibi moritur,

tanto magis Deo vivere incipit. nemo aptus est ad comprehendendum caelestia, nisi se submiserit ad portandum pro Christo adversa. nihil Deo acceptius, nihil tibi salubrius in mundo isto, quam libenter pati pro Christo. et si eligendum tibi esset, magis optare deberes, pro Christo adversa pati, quam multis consolationibus recreari: quia Christo similior esses, et omnibus Sanctis magis conformior. non enim stat meritum nostrum, et profectus status nostri, in multis suavitatibus et consolationibus: sed potius in magnis gravitatibus et tribulationibus perferendis. Si quidem aliquid melius et utilius saluti hominum, quam pati, fuisset; Christus utique verbo et exemplo ostendisset. nam et sequentes se discipulos, omnesque eum sequi cupientes, manifeste ad crucem portandam hortatur, et dicit: si quis vult venire post me, abneget semet ipsum, et tollat crucem suam, et sequatur me. omnibus ergo perlectis et scrutatis, sit haec conclusio finalis: quoniam per multas tribulationes oportet nos intrare in regnum Dei.

EXPLICIUNT ADMONITIONES AD INTER-
NA TRAHENTES.

D E
IMITATIONE
CHRISTI,
LIBER TERTIUS.

DE INTERNA CONSOLATIONE.

CAPUT I.

DE INTERNA CHRISTI LOCUTIONE AD
ANIMAM FIDELIEM.

AUDIAM, quid loquatur in me Dominus Deus. beata anima, quae Dominum in se loquentem audit; et de ore ejus, consolationis verbum accipit. beatae aures, quae venas divini susurri suscipiunt, et de mundi hujus susurrationibus nihil advertunt. beatae plane aures, quae non vocem foris sonantem, sed intus auscultant veritatem docentem. beati oculi, qui exterioribus clausi, interioribus autem sunt intenti. beati, qui interna penetrant, et ad capienda arcana caelestia magis ac magis per quotidiana exercitia se student praeparare. beati, qui Deo va-

care gestiunt, et ab omni impedimento seculi se excutiant. animadvertite haec, anima mea, et clande sensualitatis tuae ostia; ut possis audire, quid in te loquatur Dominus Deus tuus. Haec dicit dilectus tuus: salus tua ego sum, pax tua, et vita tua. serva te apud me, et pacem invenies. dimitte omnia transitoria, quaere aeterna. quid sunt omnia temporalia, nisi seductoria? et quid juvant omnes creaturae, si fueris a creatore deserta? omnibus ergo abdicatis, creatori tuo te redde placitam ac fidelem, ut veram valeas apprehendere beatitudinem.

II. QUOD VERITAS INTUS LOQUITUR SINE STREPITU VERBORUM.

LOQUERE, Domine, quia audit servus tuus. servus tuus sum ego: da mihi intellectum, ut sciam testimonia tua. inclina cor meum in verba oris tui; fluat ut ros eloquium tuum. dicebant olim filii Israël ad Moysen: loquere tu nobis; et audiemus: non loquatur nobis Dominus, ne forte moriamur. non sic, Domine, non sic oro; sed magis cum Samuele Propheta humiliter ac desideranter obsecro: loquere, Domine, quia audit servus tuus. non loquatur mihi Moyses, aut aliquis ex Prophetis, sed tu potius loquere, Domine Deus, inspirator et illuminator omnium Prophetarum: quia tu solus sine eis potes me per-

fecte imbuere, illi autem sine te nihil proficient. Possunt quidem verba sonare, sed spiritum non conferunt. pulcritè dicunt; sed, te tacente, cor non accendunt. literas tradunt, sed tu sensum aperis. mysteria proferunt, sed tu referas intellectum signatorum. mandata edicunt, sed tu iuvās ad perficiendum. viam ostendunt, sed tu confortas ad ambulandum. illi foris tantum agunt, sed tu corda instruis et illuminas. illi exterius rigant, sed tu fecunditatem donas. illi clamant verbis, sed tu auditui intelligentiam tribuis. Non ergo loquatur mihi Moyses, sed tu, Domine Deus meus, aeterna veritas, ne forte moriar, et sine fructu efficiar, si fuero tantum foris admonitus, et intus non accensus: ne sit mihi ad iudicium, verbum auditum, et non factum; cognitum, nec amatum; creditum, et non servatum. loquere igitur, Domine, quia audit servus tuus: verba enim vitae aeternae habes. loquere mihi, ad qualemcumque animae meae consolationem; et ad totius vitae meae emendationem; tibi autem ad laudem et gloriam, et perpetuum honorem.

III. QUOD VERBA DEI CUM HUMILITATE SUNT AUDIENDA; ET QUOD MULTI EA NON PONDERANT.

AUDI, fili, verba mea, verba suavissima,
omnem philosophorum et sapientium huius

mundi scientiam excedentia. verba mea spiritus et vita sunt, nec humano sensu pensanda. non sunt ad vanam complacentiam trahenda, sed in silentio audienda, et cum omni humilitate atque magno affectu suscipienda. Et dixi: beatus, quem tu erudieris, Domine, et de lege tua docueris eum: ut mitiges ei a diebus malis, et non desoletur in terra. Ego, inquit Dominus, docui Prophetas ab initio; et usque nunc non cesso omnibus loqui; sed multi ad vocem meam surdi sunt, et duri. plures mundum libentius audiunt, quam Deum: facilius sequuntur carnis suae appetitum, quam Dei beneplacitum. promittit mundus temporalia et parva, et servitur ei aviditate magna: ego promitto summa et aeterna, et torpescunt mortalium corda. quistanta cura mihi in omnibus servit et obedit, sicut mundo et dominis ejus servitur? erubescere, Sidon, ait mare. et, si causam quaeris, audi quare. pro modica praebenda, longa via curritur: pro aeterna vita, a multis vix pes semel a terra levatur. vile pretium quaeritur: pro uno numismate interdum turpiter litigatur: pro vana re et parva promissione, die noctuque fatigari non timetur. Sed, proh pudor! pro bono incommutabili, pro praemio inaeestimabili, pro summo honore et gloria interminabili, vel ad modicum fatigari pigritatur. erubescere ergo, serve piger et querulose, quod illi paratiores inveniuntur ad perditionem, quam tu

ad vitam. gaudent illi amplius ad vanitatem, quam tu ad veritatem. equidem a spe sua nonnumquam frustrantur: sed promissio mea neminem fallit, nec confidentem mihi dimittit inanem. quod promisi, dabo; quod dixi, implebo; si tamen usque in finem fidelis in dilectione mea quis permanserit. ego remunerator sum omnium bonorum, et fortis probator omnium devotorum. Scribe verba mea in corde tuo, et pertracta diligenter: erunt enim in tempore tentationis valde necessaria. quod non intelligis cum legis, cognosces in die visitationis. dupliciter soleo electos meos visitare, tentatione scilicet et consolatione. et duas lectiones eis quotidie lego: unam, increpando eorum vitia; alteram, exhortando ad virtutum incrementa. qui habet verba mea, et spernit ea, habet qui iudicet eum in novissimo die.

ORATIO AD IMPLORANDAM DEVOTIONIS GRATIAM.

DOMINE Deus, omnia bona mea tu es. et quis ego sum, ut audeam ad te loqui? ego sum pauperrimus servulus tuus, et abjectus vermiculus: multo pauperior et contemptibilior, quam scio, et dicere audeo. memento tamen, Domine, quia nihil sum, nihil habeo, nihilque valeo. tu solus bonus, iustus et sanctus; tu omnia potes, omnia praestas, omnia

imple, solum peccatorem inane relin-
quens. reminiscere miserationum tuarum, et
imple cor meum gratia tua, qui non vis esse
vacua opera tua. Quomodo possum me to-
lerare in hac misera vita, nisi me confortave-
rit misericordia et gratia tua? noli avertere
faciem tuam a me: noli visitationem tuam
prolongare: noli consolationem tuam abstra-
here, ne fiat anima mea, sicut terra sine aqua,
sibi. Domine, doce me facere voluntatem tu-
am; doce me coram te digne et humiliter
conversari: quia sapientia mea tu es, qui in
veritate me cognoscis, et cognovisti antequam
fieret mundus, et antequam natus essem in
mundo.

IV. QUOD IN VERITATE ET HUMILITA- TE CORAM DEO CONVERSANDUM EST.

FILI, ambula coram me in veritate, et in
simplicitate cordis tui quaere me semper. qui
ambulat coram me in veritate, tutabitur ab
incursibus malis, et veritas liberabit eum a
seductoribus, et detractionibus iniquorum. si
veritas te liberaverit, vere liber eris, et non
curabis de vanis hominum verbis. Domine,
verum est. sicut dicis, ita, quaeso, mecum
fiat. veritas tua me doceat; ipsa me custodi-
at, et usque ad salutarem finem conservet. ip-
sa me liberet ab omni affectione mala, et in-
ordinata dilectione: et ambulebo tecum in

magna cordis libertate. Ego te docebo (ait Veritas) quae recta sunt, et placita coram me. cogita peccata tua cum displicentia magna et moerore: et numquam reputes, te aliquid esse propter opera bona. revera peccator es, et multis passionibus obnoxius et implicatus. ex te semper ad nihil tendis; cito laberis, cito vinceris; cito turbaris, cito dissolveris. non habes quidquam unde possis gloriari, sed multa unde te debeas vilificare: quia multo infirmior es, quam vales comprehendere. Nil ergo magnum tibi videatur ex omnibus quae agis. nil grande, nil pretiosum et admirabile, nil reputatione appareat dignum, nil altum, nihil vere laudabile et desiderabile, nisi quod aeternum est. placeat tibi super omnia aeterna veritas, displiceat tibi semper tua maxima vilitas. nil sic timeas, sic vituperes et fugias, sicut vitia et peccata tua: quae magis displicere debent, quam quaelibet rerum damna. quidam non sincere coram me ambulant; sed quadam curiositate et arrogantia ducti, volunt secreta mea scire, et alta Dei intelligere, se et suam salutem negligentes. hi saepe in magnas tentationes et peccata, propter suam superbiam et curiositatem, me eis adversante, labuntur. Time judicia Dei, expavesce iram Omnipotentis. noli autem discutere opera Altissimi, sed tuas iniquitates perscrutare, in quantis deliquisti, et quam multa bona neglexisti.

quidam solum portant suam devotionem in libris, quidam in imaginibus, quidam autem in signis exterioribus et figuris. quidam habent me in ore, sed modicum est in corde. sunt alii, qui intellectu illuminati et affectu purgati, ad aeterna semper anhelant, de terrenis graviter audiunt, necessitatibus naturae dolenter inserviunt: et hi sentiunt, quid spiritus veritatis loquitur in eis. quia docet eos terrena despicere, et amare caelestia; mundum negligere, et caelum tota die ac nocte desiderare.

V. DE MIRABILI EFFECTU DIVINI
AMORIS.

BENEDICO te, Pater caelestis, Pater Domini mei Iesu Christi, quia mei pauperis dignatus es recordari. O Pater misericordiarum, et Deus totius consolationis, gratias tibi, qui me indignum omni consolatione; quandoque tua recreas consolatione. benedico te semper et glorifico, cum unigenito Filio tuo et Spiritu Sancto Paraclito, in secula seculorum. eia, Domine Deus, amator sancte meus, cum tu veneris in cor meum, exultabunt omnia interiora mea. tu es gloria mea, et exultatio cordis mei. tu spes mea et refugium meum, in die tribulationis meae. Sed quia adhuc debilis sum in amore, et imperfectus in virtute; ideo necesse habeo a te confortari et

consolari: propterea visita me saepius, et instrue disciplinis sanctis. libera me a passionibus malis, et sana cor meum ab omnibus affectionibus inordinatis, ut intus sanatus et bene purgatus, aptus efficiar ad amandum, fortis ad patiendum, stabilis ad perseverandum. Magna res est amor, magnum omnino bonum: quod solum, leve facit omne onerosum, et fert aequaliter omne inaequale. nam onus sine onere portat; et omne amarum, dulce ac sapidum efficit. amor Iesu nobilis, ad magna operanda impellit, et ad desideranda semper perfectiora excitat. amor vult esse sursum, nec ullis infimis rebus retineri. amor vult esse liber, et ab omni mundana affectione alienus: ne internus ejus impediatur aspectus: ne per aliquod commodum temporale implicationes sustineat, aut per incommodum succumbat. nihil dulcius est amore, nihil fortius, nihil altius, nihil latius, nihil jucundius, nihil plenius nec melius in caelo et in terra: quia amor ex Deo natus est, nec potest, nisi in Deo, super omnia creata quiescere. Amans volat, currit, et laetatur; liber est, et non tenetur. dat omnia pro omnibus, et habet omnia in omnibus; quia in uno summo super omnia quiescit, ex quo omne bonum fuit et procedit. non respicit ad dona, sed ad donantem se convertit super omnia bona. amor modum saepe nescit; sed super omnem modum fervescit. amor onus non

sentit, labores non reputat; plus affectat, quam valet: de impossibilitate non causatur, quia cuncta sibi posse et licere arbitratur. valet igitur ad omnia, et multa implet, et effectui mancipat, ubi non amans deficit et jacet. Amor vigilat, et dormiens non dormitat. fatigatus non lassatur, arctatus non coarctatur, ternius non conturbatur; sed, sicut vivax flamma et ardens facula, sursum erumpit, secureque pertransit. si quis amat, novit quid haec vox clamet. magnus clamor in auribus Dei est ipse ardens affectus animae, quae dicit: Deus meus, amor meus: tu totus meus, et ego totus tuus. Dilata me in amore, ut discam interiori cordis ore degustare, quam suave sit amare, et in amore liquefieri et natare. tenear amore, vadens supra me, praenimio fervore et stupore. cantem amoris canticum, sequar te dilectum meum in altum, deficiat in laude tua anima mea, jubilans ex amore. amem te plusquam me, nec me nisi propter te: et omnes in te, qui vere amant ac, sicut jubet lex amoris lucens ex te. Est amor velox, sincerus, pius, jucundus, et amoenus, fortis, patiens, fidelis, prudens, longanimis, virilis, et se ipsum numquam quaerens. ubi enim se ipsum aliquis quaerit, ibi ab amore cadit. est amor circumspectus, humilis, et rectus; non mollis, non levis, nec vanis intendens rebus; sobrius, castus, stabilis, quietus, et in cunctis sensibus custoditus.

84 DE IMITATIONE

est amor subiectus et obediens Praelatis, sibi vilis et despectus, Deo devotus et gratificus, fidens et sperans semper in eo, etiam cum sibi non sapit Deus: quia sine dolore non vivitur in amore. Qui non est paratus omnia pati, et ad voluntatem stare dilecti, non est dignus amator appellari. oportet amantem, omnia dura et amara, propter dilectum, libenter amplecti; nec ob contraria accidentia ab eo desecti.

VI. DE PROBATIONE VERI AMATORIS.

FILI, non es adhuc fortis et prudens amator. Quare, Domine? Quia propter modicam contrarietatem deficis a coeptis, et nimis avide consolationem quaeris. fortis amator stat in tentationibus, nec callidis credit persuasionibus inimici. sicut ei in prosperis placeo, ita nec in adversis displiceo. Prudens amator, non tam donum amantis considerat, quam dantis amorem. affectum potius attendit, quam censum: et infra dilectum, omnia data ponit. nobilis amator non quiescit in dono, sed in me super omne donum. non est ideo totum perditum, si quandoque minus bene de me, vel de Sanctis meis, sentis, quam velles. affectus ille bonus et dulcis, quem interdum percipis, effectus gratiae praesentis est, et quidam praegustus patriae caelestis: super quo non nimium innitendum,

quia vadit, et venit. certare autem adversus incidentes malos motus animi, suggestionemque spernere diaboli, insigne est virtutis, et magni meriti. Non ergo te conturbent alienae phantasiae, de quacumque materia ingestae. forte serva propositum, et intentionem rectam ad Deum. nec est illusio, quod aliquando in excessum subito raperis, et statim ad solitas ineptias cordis reverteris. illas enim invite magis pateris, quam agis: et quamdiu displicent et reniteris, meritum est et non perditio. Scito, quod antiquus inimicus omnino nititur impedire desiderium tuum in bono, et ab omni devoto exercitio evacuare; a Sanctorum scilicet cultu, a pia passionis meae memoria, a peccatorum utili recordatione, a proprii cordis custodia, et a firmo proposito proficiendi in virtute. multas malas cogitationes ingerit, ut taedium tibi faciat et horrorem: ut ab oratione revocet, et sacra lectione. displicet sibi humilis confessio, et (si posset) a communione cessare faceret. non credas ei, neque cures illum, licet saepius tibi deceptionis tetenderit laqueos. tibi imputat; cum mala inserit et immunda. dicito illi: vade, immunde spiritus; erubescere, miser; valde immundus es tu, qui talia inferis auribus meis. discede a me, seductor pessime, non habebis in me partem ullam: sed Iesus mecum erit tamquam bellator fortis, et tu stabis confusus. malo mori, et omnem poe-

nam subire, quam tibi consentire, tace et obmutescere, non audiam te amplius, licet plures mihi moliris molestias: Dominus illuminatio mea et salus mea; quem timebo? si consistant adversum me castra, non timebit cor meum. Dominus adiutor meus, et redemptor meus. Certa tanquam miles bonus: et si intendam ex fragilitate carnis, resume vires fortiores prioribus, confidens de ampliori gratia mea; et multum praecave a vana complacencia et superbia. propter hoc multi in errorem ducuntur, et in cecitatem pene incurribilem quandoque labuntur. sit tibi in cautelam et perpetuam humilitatem, ruina haec superborum de se stulte praesumentium.

VII. DE OCCULTANDA GRATIA SUB HUMILITATIS CUSTODIA.

FILI, utilius est tibi et securius, devotionis gratiam abscondere, nec in altum te efferre, nec multum inde loqui, neque multum ponderare; sed magis tmet ipsam despicere, et tanquam indigno datam timere. non est huic affectioni tenacius inhaerendum, quae citius potest mutari in contrarium. cogita in gratia, quam miser et inops esse soles sine gratia. nec est in eo tantum spiritualis vitae profectus, cum consolationis habueris gratiam: sed cum humiliter, et abnegate, patienterque tuleris ejus subtractionem; ita, quod

tunc ab orationis studio non torpeas, nec reliqua opera tua, ex usu facienda, omnino dilabis permittas: sed sicut melius potueris et intellexeris, libenter quod in te est, facias: nec propter fidelitatem, seu anxietatem mentis quam sentis, te totaliter negligas. multi enim sunt, qui cum non bene eis successerit, statim impatientes sunt aut desides. non enim semper est in potestate hominis via ejus; sed Dei est dare, et consolari, quando vult, et quantum vult, et cui vult, sicut sibi placuerit, et non amplius. quidam incauti, propter devotionis gratiam, se ipsos destruxerunt: quia plus agere voluerunt quam potuerunt, non pensantes suae parvitatæ mensuram, sed magis cordis affectum sequentes, quam rationis iudicium. et quia majora praesumerunt quam Deo placitum fuit, idcirco gratiam cito perdidērunt. facti sunt inopes, et viles selecti, qui in caelum posuerunt nidum sibi: ut humiliati, et depauperati, discant non in alis suis volare, sed sub pennis meis sperare. qui adhuc novi sunt et imperiti in via Domini, nisi consilio discretorum se regant, facilliter decipi possunt et elidi. Quod si suum sentire magis sequi, quam aliis exsecratis credere volunt, erit eis periculosus exitus, si tamen retrahi a proprio conceptu noluerint. raro sibi ipsis sapientes, ab aliis regi humiliter patiuntur. melius est, sapere modicum cum humilitate, et parva intelligentia, quam magni

scientiarum thesauri cum vana complacentia. melius est tibi, minus habere, quam multum unde posses superbire. non satis discrete agit, qui se totum laetitiae tradit, obliviscens pristinae inopiae suae, et casti timoris Domini, qui timet gratiam oblatam amittere. nec etiam satis virtuose sapit, qui tempore adversitatis et cujusque gravitatis, nimis desperate se gerit, et minus fidenter de me, quam oportet, recogitat ac sentit. Qui tempore pacis nimis securus esse voluerit, saepe tempore belli nimis dejectus et formidolosus reperietur. si scires semper humilis et modicus in te permanere, nec non spiritum tuum bene moderare et regere, non incideres tam cito in periculum, et offensam. consilium bonum est, ut, fervoris spiritu concepto, mediteris quid futurum sit abscedente lumine. quod dum contigerit, recogita et denuo lucem posse reverti, quam, ad cautelam tibi, mihi autem ad gloriam, ad tempus subtraxi. Utilior est saepe talis probatio, quam si semper prospera pro tua haberes voluntate. nam merita non sunt ex hoc existimanda, si quis plures visiones aut consolationes habeat; vel si peritus sit in Scripturis, aut in altiori ponatur gradu: sed si vera fuerit humilitate fundatus, et divina caritate repletus: si Dei honorem pure et integre semper quaerat: si se ipsum nihil reputet, et in veritate despiciat, atque ab aliis

etiam despici et humiliari magis gaudeat,
quam honorari.

VIII. DE VILI AESTIMATIONE SUI IPSI-
US, IN OCULIS DEI.

LOQUAR ad Dominum meum, cum sim
pulvis et cinis? si me amplius reputaverò,
ecce tu stas contra me: et dicunt testimonium
verum iniquitates meae, nec possum contra-
dicere. si autem me vilificaverò, et ad nihi-
lum redegero, et ab omni propria reputatione
defecero, atque (sicut sum) pulverizaverò,
erit mihi propitia gratia tua, et vicina cordi
meo lux tua: et omnis aestimatio, quantula-
cumque minima, in valle nihilitatis meae
submergetur, et peribit in aeternum. ibi o-
stendis me mihi, quid sum, quid fui, et quo
deveni: quia nihil sum, et nescivi. si mihi
ipsi relinquer, ecce nihil, et tota infirmitas: si
autem subito me respexeris, statim fortis effi-
cior, et novo repleor gaudio. et mirum valde,
quod sic repente sublevor, et tam benigne a
te complector, qui proprio pondere semper ad
ima feror. Facit hoc amor tuus, gratis prae-
veniens me, et in tam multis subveniens ne-
cessitatibus, a gravibus quoque custodiens me
periculis, et ab innumeris (ut vere dicam)
eripiens malis. me siquidem male amando,
me perdi; et te solum quaerendo, et pure
amando, me et te pariter inveni, atque ex a-

more profundius ad nihilum me redegi. quia tu, ô dulcissime, facis mecum supra meritum omne, et supra id quam audeo sperare vel rogare. Benedictus sis, Deus meus; quia, licet ego omnibus bonis sum indignus, tua tamen nobilitas et infinita bonitas numquam cessat benefacere etiam ingratis, et longe a te averſis. converte nos ad te, ut ſumus grati, humiles, et devoti: quia ſalus noſtra tu es, virtus, et fortitudo noſtra.

**IX. QUOD OMNIA AD DEUM, SICUT AD
FINEM ULTIMUM, SUNT RE-
FERENDA.**

FILI, ego debeo eſſe ſinis tuus ſupremus et ultimus, ſi vere deſideras eſſe beatus. ex hac intentione purificabitur affectus tuus, ſæpius ad ſe ipſum et ad creaturas male incurvatus. nam ſi te ipſum in aliquo quaeris, ſtatim in te deſicis et ardeſcis. omnia ergo ad me principaliter referas, quia ego ſum qui omnia dedi. ſic ſingula conſidera, ſicut ex ſumpſo bono manantia: et ideo ad me, tamquam ad ſuam originem, cuncta ſunt reducenda. Ex me puſillus et magnus, pauper et dives, tamquam ex fonte vivo, aquam vivam hauriunt: et qui mihi ſponte et libere deſerviunt, gratiam pro gratia accipient. qui autem extra me voluerit gloriari, vel in aliquo privato bono delectari, non ſtabilietur in

vero gaudio, neque in corde suo dilatabitur, sed multipliciter impediatur et angustabitur. nihil ergo tibi de bono adscribere debes, nec alicui homini virtutem attribuas: sed totum da Deo, sine quo nihil habet homo. ego totum dedi, ego totum te habere volo: et cum magna distractione gratiarum actiones requiro. Haec est veritas, qua fugatur gloriae vanitas. et si intraverit caelestis gratia, et vera caritas, non erit aliqua invidia, nec contractio cordis, neque privatus amor occupabit. vincit enim omnia divina caritas, et dilatat omnes animae vires. si recte sapias, in me solo gaudebis, in me solo sperabis: quia nemo bonus, nisi solus Deus, qui est super omnia laudandus, et in omnibus benedicendus.

**X. QUOD, SPRETO MUNDO, DULCE EST
SERVIRE DEO.**

NUNC iterum loquar, Domine, et non silebo; dicam in auribus Dei mei, Domini mei, et Regis mei, qui est in excelsis: O quam magna multitudo dulcedinis tuae, Domine, quam abscondisti timentibus te! sed quid es amantibus? quid toto corde tibi fervientibus? vere ineffabilis dulcedo contemplationis tuae, quam largiris amantibus te. in hoc maxime ostendisti mihi dulcedinem caritatis tuae, quia cum non essem, fecisti me: et cum errarem longe

a te, reduxisti me, ut servirem tibi, et praecepisti ut diligam te. O fons amoris perpetui, quid dicam de te? quomodo potero tui oblivisci, qui mei dignatus es recordari, etiam postquam contabui et perii? fecisti, ultra omnem spem, misericordiam cum servo tuo: et ultra omne meritum, gratiam et amicitiam exhibuisti. quid retribuam tibi pro gratia ista? non enim omnibus datum est, ut, omnibus abdicatis, seculo renuntient, et monasticam vitam assumant. numquid magnum est, ut tibi serviam, cui omnis creatura servire tenetur? non magnum mihi videri debet, servire tibi; sed hoc potius magnum mihi et mirandum apparet, quod tam pauperem et indignum dignaris in servum recipere, et dilectis servis tuis adunare. Ecce omnia tua sunt, quae habeo, et unde tibi servio. verumtamen vice versa, tu magis mihi servis, quam ego tibi. ecce, caelum et terra, quae in ministerium hominis creasti, praesto sunt, et faciunt quotidie quaecumque mandasti. et hoc parum est: quin etiam Angelos in ministerium hominis ordinasti. transcendit autem haec omnia, quia tu ipse homini servire dignatus es, et te ipsum daturum ei promissisti. Quid dabo tibi pro omnibus istis millibus bonis? utinam possem tibi servire cunctis diebus vitae meae! utinam vel uno die dignum servitium exhibere sufficerem! vere tu es dignus omni servitio, omni honore, et laude aeter-

na. vere Dominus meus es, et ego pauper servus tuus; qui totis viribus teneor tibi servire, nec umquam in laudibus tuis debeo fastidire. sic volo, sic desidero; et quidquid mihi deest, tu digneris supplere. Magnus honor, magna gloria, tibi servire, et omnia propter te contemnere. habebunt enim gratiam magnam, qui sponte se subjecerint tuae sanctissimae servituti. invenient suavissimam Spiritus sancti consolationem, qui pro amore tuo omnem carnalem abjecerint delectationem, consequentur magnam mentis libertatem, qui arctam pro nomine tuo ingrediuntur viam, et omnem mundanam neglexerint curam. O grata et jucunda Dei servitus, qua homo veraciter efficitur liber et sanctus! O sacer status religiosi famulatus, qui hominem Angelis reddit aequalem, Deo placabilem, daemonibus terribilem, et cunctis fidelibus commendabilem! O amplectendum, et semper optandum servitium, quo summum promeretur bonum, et gaudium acquiritur sine fine mansurum!

XI. QUOD DESIDERIA CORDIS EXAMINANDA SUNT, ET MODERANDA.

FILI, oportet te adhuc multa addiscere, quae necdum bene didicisti. Quae sunt haec, Domine? Ut desiderium tuum ponas totaliter secundum beneplacitum meum; et tui

ipſius amator non ſis, ſed meæ voluntatis cupidus æmulator. deſideria te ſæpe accendunt, et vehementer: ſed conſidera, an propter honorem meum, an propter tuum commodum magis movearis. ſi ego ſum in cauſa; bene conſentus eris, quomodocumque ordinaveſto: ſi autem de proprio quaſitu aliquid latet, ecce hoc eſt, quod te impedit et gravat. Cave ergo, ne nimium inſitatis ſuper deſiderio præconcepto, me non conſulto; ne forte poſtea poeniteat, aut diſpliceat, quod primo placuit, et quaſi pro meliore zelaſti. non enim omnis affectio, quæ videtur bona, ſtatim eſt ſequenda: ſed neque omnis contraria affectio ad primum fugienda. expedit interdum reſtrentione uti, etiam in bonis ſtudiis et deſideriis; ne per importunitatem, mentis diſtractionem incurras; ne aliis per indiſciplinam, ſcandalum generes; vel etiam per reſiſtentiam aliorum, ſubito turberis et corruas. Interdum vero oportet violentia uti, et viriliter appetitui ſenſitivo contrari, nec advertere quid velit caro, et quid non velit; ſed hoc magis ſatagere, ut ſubjecta ſit etiam nolens ſpiritu. et tamdiu caſtigari debet, et eogi ſervituti ſubefſe, donec parata ſit ad omnia, paucisque contentari diſcat, et ſimplicibus delectari, nec contra aliquod incôveniens muſſitare.

**XII. DE INFORMATIONE PATIENTIAE,
ET LUCTAMINE ADVERSUS CON-
CUPISCENTIAS.**

DOMINE Deus, ut video, patientia est mihi valde necessaria: multa enim in hac vita accidunt contraria. nam qualitercumque ordinavero de pace mea, non potest esse sine bello et dolore vita mea. Ita est, fili. sed volo te non talem querere pacem, quae tentationibus careat, aut contraria non sentiat; sed tunc etiam aestimare te pacem invenisse, cum fueris variis tribulationibus exercitatus, et in multis contrarietatibus probatus. si dixeris, te non posse multa pati, quomodo tunc sustinebis ignem purgatorii? de duobus malis, minus est semper eligendum: ut ergo aeterna futura supplicia possis evadere, mala praesentia studeas pro Deo aequanimiter tolerare. an putas, quod homines seculi hujus nihil vel parum patiantur? nec hoc invenies, etiam si delicatissimos quaesieris. sed habent, inquis, multas delectationes, et proprias sequuntur voluntates; ideoque parum ponderant suas tribulationes. Esto, ita sit, ut habeant quidquid voluerint: sed quamdiu, putas, durabit? ecce, quemadmodum fumus deficient abundantes in seculo, et nulla erit recordatio praeteritorum gaudiorum. sed et, cum adhuc vivunt, non sine amaritudine, et taedio ac ti-

more, in eis quiescunt. ex eadem namque re, unde sibi delectationem concipiunt, inde doloris poenam frequenter recipiunt. iuste illis fit; ut, quia inordinate delectationes quaerunt et sequuntur, non sine confusione et amaritudine eas expleant. O quam breves, quam falsae, quam inordinatae et turpes omnes sunt! verumtamen, praec ebrietate et cecitate non intelligunt; sed velut muta animalia, propter modicum corruptibilis vitae delectamentum, mortem animae incurrunt. tu ergo, fili, post concupiscentias tuas non eas, et a voluntate tua avertere. delectare in Domino, et dabit tibi petitiones cordis tui. Et enim si veraciter vis delectari, et abundantius a me consolari; ecce in contemptu omnium mundanorum, et in abscissione omnium infirmarum delectationum, erit benedictio tua, et copiosa tibi reddetur consolatio. et quanto te plus ab omni creaturarum solatio subtraxeris, tanto in me suaviores et potentiores consolationes invenies. sed primo, non sine quadam tristitia et labore certaminis, ad has pertinges. obsistet inolita consuetudo, sed meliori consuetudine devincetur. remurmurabit caro, sed fervore spiritus frenabitur. instigabit et exacerbabit te serpens antiquus, sed oratione fugabitur: insuper et labore utili aditus ei magnus obstruetur.

XIII. DE OBEDIENTIA HUMILIS SUBDITI,
AD EXEMPLUM IESU CHRISTI.

FILI, qui se subtrahere nititur ab obedientia, ipse se subtrahit a gratia: et qui quaerit habere privata, amittit communia. qui non libenter et sponte suo superiori se subdit, signum est quod caro sua necdum perfecte sibi obedit, sed saepe recalcitrat et remurmurat. disce ergo celeriter superiori tuo te submittere, si carnem propriam optas subjugare. citius namque exterior vincitur inimicus, si interior homo non fuerit devastatus. non est molestior et peior animae hostis, quam tu ipse tibi, non bene concordans spiritui. oportet omnino verum te assumere tui ipsius contemptum, si vis praevalere adversus carnem et sanguinem. quia adhuc nimis inordinate te diligis, ideo plene te resignare aliorum voluntati trepidas. Sed quid magnum, si tu, qui pulvis es et nihil, propter Deum te homini subdis, quando ego omnipotens et altissimus, qui cuncta creavi ex nihilo, me homini propter te humiliter subjeci? factus sum omnium humillimus et infimus, ut tuam superbiam mea humilitate vinceret. disce obtemperare, pulvis. disce te humiliare, terra et limus, et sub omnium pedibus incurvare. disce voluntates tuas frangere, et ad omnem subjectionem te dare. Exardesce contra te,

nec patiaris tumorem in te vivere: sed ita subiectum et parvulum te exhibe, ut omnes super te ambulare possint, et sicut lutum platearum conculcare. quid habes, homo inanis, conqueri? quid, sordide peccator, potes contradicere exprobrantibus tibi, qui toties Deum offendisti, et infernum multoties meruisti? sed pepercit tibi oculus meus, quia pretiosa fuit anima tua in conspectu meo; ut cognosceres dilectionem meam, et gratus semper beneficiis meis existeres; et ut ad veram subjectionem et humilitatem te jugiter dares, patienterque proprium contemptum ferres.

XIV. DE OCCULTIS DEI JUDICIIS CONSIDERANDIS, NE EXTOLLAMUR IN BONIS.

INTONAS super me judicia tua, Domine, et timore ac tremore concutis omnia ossa mea, et expavescit anima mea valde. sto attonitus, et considero; quia caeli non sunt mundi in conspectu tuo. si in angelis reperisti pravitatem, nec tamen pepercisti, quid fiet de me? ceciderunt stellae de caelo, et ego pulvis quid praesumo? quorum opera videbantur laudabilia, ceciderunt ad infima: et qui comedebant panem Angelorum, vidi siliquis delectari porcorum. Nulla est ergo sanctitas, si manum tuam, Domine, subtra-

has. nulla prodest sapientia, si gubernare desistas. nulla juvat fortitudo: si conservare desinas. nulla secura castitas, si eam non protegas. nulla propria prodest custodia, si non adsit tua sacra vigilantia. nam relictī, mergimur et perimus: visitati vero, erigimur et vivimus. instabiles quippe sumus, sed per te confirmamur: tepescimus, sed a te accendimur. O quam humiliter et abjecte mihi de me ipso sentiendum est! quam nihili pendendum, si quid boni videar habere! ô quam profunde submittere me debeo sub abyssalibus judiciis tuis, Domine; ubi nihil aliud me esse invenio, quam nihil et nihil! ô pondus immensum! ô pelagus intransnatabile; ubi nihil de me reperio, quam in toto nihil! ubi est ergo latebra gloriæ? ubi confidentia de virtute concepta? absorpta est omnis gloriatio vana, in profunditate judiciorum tuorum super me. Quid est omnis caro in conspectu tuo? numquid gloriabitur lutum contra formantem se? quomodo potest erigi vaniloquio; cujus cor in veritate subiectum est Deo? non eum totus mundus eriget, quem veritas sibi subjecit; nec omnium laudantium ore movebitur, qui totam spem suam in Deo firmavit. nam et ipsi, qui loquuntur, ecce omnes nihil; deficient enim cum sonitu verborum: veritas autem Domini manet in æternum.

XV. QUALITER STANDUM SIT AC DICENDUM, IN OMNI RE DESIDERABILI.

FILI, sic dicas in omni re: Domine, si tibi placitum fuerit, fiat hoc ita. Domine, si fuerit honor tuus, fiat hoc in nomine tuo. Domine, si mihi videris expedire, et utile esse probaveris; tunc dona mihi hoc uti ad honorem tuum. sed si mihi nocivum fore cognoveris, nec animae meae salutem prodesse, aufer a me tale desiderium. non enim omne desiderium est a Spiritu sancto, etiam si homini videatur rectum et bonum. difficile est pro vero judicare, utrum spiritus bonus, an alienus te impellat, ad desiderandum hoc vel illud; an etiam ex proprio movearis spiritu. multi in fine sunt decepti, qui primo bono spiritu videbantur inducti. Igitur semper cum timore Dei, et cordis humilitate desiderandum est et petendum, quidquid desiderabile menti occurrit; maximeque cum propria resignatione, mihi totum committendum est, atque dicendum: Domine, tu scis qualiter melius est: fiat hoc vel illud, sicut volueris. da quod vis, et quantum vis, et quando vis. fac mecum, sicut scis, et sicut tibi magis placuerit, et major honor tuus fuerit. pone me ubi vis, et libere age mecum in omnibus. in manu tua sum, gyra et reversa me per circuitum. en servus tuus ego, paratus ad omnia: quoniam

non desidero mihi vivere, sed tibi; utinam digne et perfecte!

ORATIO PRO BENEPLACITO DEI PERFICIENDO.

CONCEDE mihi, benignissime Iesu, gratiam tuam, ut tecum sit, et tecum laboret; tecumque usque in finem perseveret. da mihi hoc semper desiderare et velle, quod tibi magis acceptum est, et carius placet. tua voluntas, mea sit: et mea voluntas, tuam semper sequatur, et optime ei concordet. sit mihi unum velle et nolle tecum: nec aliud posse velle aut nolle, nisi quod tu vis et nolis. Da mihi omnibus mori, quae in mundo sunt; et propter te amare contemni, et nesciri in hoc seculo. da mihi super omnia desiderata, in te requiescere, et cor meum in te pacificare. tu vera pax cordis, tu sola requies: extra te dura sunt omnia et inquieta. in hac pace in idipsum, hoc est, in te uno summo aeterno bono, dormiam et requiescam. amen.

XVI. QUOD VERUM SOLATIUM IN SOLO DEO EST QUAERENDUM.

QUIDQUID desiderare possum, vel cogitare ad solatium meum, non hic exspecto, sed in posterum. quod si omnia solatia mundi solus haberem, et omnibus deliciis frui possem,

certum est, quod diu durare non possent. unde non poteris, anima mea, plene consolari, nec perfecte recreari, nisi in Deo, consolatore pauperum, ac susceptore humilium. exspecta modicum, anima mea, exspecta divinum promissum, et habebis abundantiam omnium bonorum in caelo. si nimis inordinate ista appetis praesentia, perdes aeterna, et caelestia. sint temporalia in usu, aeterna in desiderio. non potes aliquo bono temporali satiari, quia ad haec fruenda non es creata. Etiam si omnia creata bona haberes, non posses esse felix et beata: sed in Deo, qui cuncta creavit, tota beatitudo tua et felicitas consistit: non qualis videtur et laudatur a stultis mundi amatoribus: sed qualem exspectant boni Christi fideles, et praegustant interdum spirituales ac mundicordes, quorum conversatio est in caelis. vanum est, et breve, omne humanum solatium. beatum et verum solatium, quod intus a veritate percipitur. devotus homo ubique secum fert consolatorem suum Iesum, et dicit ad eum: adesto mihi, Domine Iesu, in omni loco et tempore. haec mihi sit consolatio, libenter velle carere omni humano solatio. et si tua defuerit consolatio, sit mihi tua voluntas et iusta probatio pro summo solatio. non enim in perpetuum irasce-
ris, neque in aeternum comminaberis.

XVII. QUOD OMNIS SOLICITUDO IN DEO
STATUENDA SIT.

FILI, sine me tecum agere quod volo ; ego scio, quid expedit tibi. tu cogitas sicut homo : tu sentis in multis, sicut humanus suadet affectus. Domine, verum est quod dicis. major est sollicitudo tua pro me, quam omnis cura quam ego gerere possum pro me. nimis enim casualiter stat, qui non projicit omnem sollicitudinem suam in te. Domine, dummodo voluntas mea recta et firma ad te permaneat, fac de me, quidquid tibi placuerit. non enim potest esse nisi bonum, quidquid de me feceris. si me vis esse in tenebris, sis benedictus : et si me vis esse in luce, sis iterum benedictus. si me dignaris consolari, sis benedictus : et si me vis tribulari, sis acque semper benedictus. Fili, sic oportet te stare, si mecum desideras ambulare. ita promptus esse debes ad patiendum, sicut ad gaudendum. ita libenter debes esse inops et pauper, sicut plenus et dives. Domine, libenter patiar pro te, quidquid volueris venire super me. indifferenter volo de manu tua bonum et malum, dulce et amarum, laetum et triste, suscipere : et pro omnibus mihi contingentibus gratias agere. custodi me ab omni peccato, et non timebo mortem nec infernum. dummodo in aeternum me non projicias, nec deleas de li-

bro vitae; non mihi nocebit, quidquid venerit tribulationis super me.

XVIII. QUOD TEMPORALES MISERIAE,
EXEMPLO CHRISTI, AEQUANIMI-
TER SUNT FERENDAE.

FILI, ego descendi de caelo pro tua salute: suscepi tuas misérias, non necessitate, sed caritate trahente: ut patientiam disceres, et temporales misérias non indignanter ferres. nam ab hora ortus mei, usque ad exitum in cruce, non defuit mihi tolerantia doloris. defectum rerum temporalium magnum habui: multas querimonias de me frequenter audiui: confusiones et opprobria benigne sustinui: pro beneficiis ingratitude recepi, pro miraculis blasphemias, pro doctrina reprehensiones. Domine, quia tu patiens fuisti in vita tua, in hoc maxime implendo praeceptum Patris tui; dignum est, ut ego misellus peccator, secundum voluntatem tuam patienter me sustineam: et, donec ipse volueris, onus corruptibilis vitae pro salute mea portem. nam etsi onerosa sentitur praesens vita, facta est tamen jam per gratiam tuam valde meritoria: atque exemplo tuo, et Sanctorum tuorum vestigiis, infirmis tolerabilior. sed et multo magis consolatoria, quam olim in lege veteri fuerat, cum porta caeli clausa persisteret: et obscurior etiam via ad caelum videbatur, quando

tam pauci regnum caelorum quaerere curabant. sed neque qui tunc iusti erant et salvandi, ante passionem tuam, et sacrae mortis debitum, caeleste regnum poterant introire. O quantas tibi gratias teneor referre, quod viam rectam et bonam dignatus es mihi, et cunctis fidelibus, ad aeternum regnum tuum ostendere! nam vita tua, via nostra: et per sanctam patientiam ambulamus ad te, qui es corona nostra. nisi tu nos praecessisses et docuisses, quis sequi curaret? heu, quanti longe retroque manerent, nisi tua praeclara exempla inspicerent! ecce, adhuc tepescimus, auditis tot signis tuis et doctrinis; quid fieret, si tantum lumen ad sequendum te non haberemus?

**XIX. DE TOLERANTIA INJURIARUM,
ET QUIS VERUS PATIENS PROBETUR.**

Quid est quod loqueris, fili? cessa conqueri, considerata mea et aliorum Sanctorum passione. nondum usque ad sanguinem restitisti. parum est quod tu pateris, in comparatione eorum qui tam multa passi sunt; tam fortiter tentati, tam graviter tribulati, tam multipliciter probati et exercitati. oportet te igitur aliorum graviora ad mentem reducere, ut levius feras tua minima. et, si tibi minima non videntur, vide ne et hoc tua faciat impatientia. sive tamen parva, sive magna sint, stude cuncta patienter sufferre. Quanto me-

lius ad patiendum te disponis, tanto sapientius agis, et amplius promereris: feres quoque levius, animo et usu ad hoc non segniter paratis. nec dicas: non valeo haec ab homine tali pati, nec huiusmodi mihi patienda sunt: grave enim intulit damnum, et impropere mihi, quae numquam cogitaveram: sed ab alio libenter patiar, et sicut patienda videro. insipiens est talis cogitatio, quae virtutem patientiae non considerat, nec a quo coronanda erit, sed magis personas et offensas sibi illatas perpendit. Non est verus patiens, qui pati non vult, nisi quantum sibi visum fuerit, et a quo sibi placuerit. verus autem patiens non attendit a quo homine, utrum a Praelato suo, an ab aliquo aequali, aut inferiori: utrum a bono et sancto viro, vel a perverso et indigno exerceatur. sed indifferenter ab omni creatura, quantumcumque, et quotiescumque ei aliquid adversi acciderit, totum hoc de manu Dei gratanter accipit, et ingens lucrum reputat: quia nil apud Deum, quantumlibet parvum, pro Deo tamen passum, poterit sine merito transire. Esto itaque expeditus ad pugnam, si vis habere victoriam. sine certamine non potes venire ad patientiae coronam. si pati non vis, recusas coronari. si autem coronari desideras, certa viriliter, sustine patienter. sine labore non tenditur ad requiem: nec sine pugna pervenitur ad victoriam. Fiat, Domine, mihi possibile

per gratiam, quod mihi impossibile videtur per naturam. tu scis: quod modicum possum pati, et quod cito dejicior, levi exsurgente adversitate. efficiatur mihi quaelibet exercitatio tribulationis pro nomine tuo amabilis, et optabilis: nam pati et vexari pro te, valde salubre est animae meae.

XX. DE CONFESSIONE PROPRIAE INFIRMITATIS, ET HUIUS VITAE MISERII.

CONFITEBOR adversum me injustitiam meam: confitebor tibi, Domine, infirmitatem meam. saepe parva res est, quae me dejicit et contristat. propono me fortiter acturum: sed cum modica tentatio venerit, magna mihi angustia fit. valde vilis quandoque res est, unde gravis tentatio provenit. et, dum puto me aliquantulum tutum, cum non sentio, invenio me nonnumquam pene devictum ex levi flatu. Vide ergo, Domine, humilitatem meam, et fragilitatem tibi undique notam. miserere, et eripe me de luto, ut non infigar, ne permaneam dejectus usquequaque. hoc est, quod me frequenter reverberat, et coram te confundit; quod tam labilis sum, et infirmus ad resistendum passionibus. etsi non omnino ad confessionem, tamen mihi etiam molesta et gravis est earum insectatio, et taedet valde sic quotidie vivere in lite. exhinc nota mihi fit infirmitas mea:

quia multo facilius irruunt abominandae semper phantasiae, quam discedunt. Utinam, fortissime Deus Israël, zelator animarum fidelium, respicias servi tui laborem et dolorem, assistasque illi in omnibus, ad quaecumque perrexerit. roboram me caelesti fortitudine, ne vetus homo, misera caro spiritui necdum plene subacta, praevaleat dominari: adversus quam certare oportebit, quamdiu spiratur in hac vita miserrima. heu, qualis est haec vita, ubi non desunt tribulationes et miseriae; ubi plena laqueis et hostibus sunt omnia! nam una tribulatione seu tentatione recedente, alia accedit: sed et; priore adhuc durante conflictu, alii plures superveniunt, et insperate. Et quomodo potest amari vita, tantas habens amaritudines, tot subiecta calamitatibus et miseriis? quomodo etiam dicitur vita, tot generans mortes et pestes? et tamen amatur, et delectari in ea a multis quaeritur, reprehenditur frequenter mundus, quod fallax sit et vanus, nec tamen facile relinquitur, quia concupiscentiae carnis nimis dominantur. sed alia trahunt ad amandum, alia ad contemnendum. trahunt ad amorem mundi, desiderium carnis, desiderium oculorum, et superbia vitae: sed poenae ac miseriae iuste sequentes ea, odium mundi pariunt et taedium. Sed vincit (proh dolor!) delectatio prava mentem mundo deditam, et esse sub sentibus delicias reputat: quia Dei suavitatem, et

internam virtutis amoenitatem, nec vidit, nec gustavit. qui autem mundum perfecte contemnunt, et Deo vivere sub sancta disciplina student, isti divinam dulcedinem, veris abrenuntiatoribus promissam, non ignorant; et quam graviter mundus errat, et varie fallitur, clarius vident.

**XXI. QUOD IN DEO SUPER OMNIA BONA
ET DONA REQUIESCENDUM EST.**

SUPER omnia, et in omnibus, requiesces, anima mea, in Domino semper, quia ipse Sanctorum aeterna requies. da mihi, dulcissime et amantissime Iesu, in te super omnem creaturam requiescere: super omnem salutem et pulcritudinem, super omnem gloriam et honorem, super omnem potentiam et dignitatem, super omnem scientiam et subtilitatem, super omnes divitias et artes, super omnem laetitiam et exultationem, super omnem famam et laudem, super omnem suavitatem et consolationem, super omnem spem et promissionem, super omne meritum et desiderium: super omnia dona et munera, quae potes dare et infundere: super omne gaudium et jubilationem, quam potest mens capere et sentire: denique super Angelos et Archangelos, et super omnem exercitum caeli: super omnia visibilia et invisibilia, et super omne quod tu Deus meus non es. Quia tu, Do-

mine Deus meus, super omnia optimus es: tu solus altissimus: tu solus potentissimus: tu solus sufficientissimus et plenissimus: tu solus suavissimus et solatiofissimus: tu solus pulcherrimus et amantissimus: tu solus nobilissimus et gloriosissimus super omnia: in quocuncta bona simul et perfecte sunt, et semper fuerunt, et erunt: atque ideo minus est et insufficiens, quidquid praeter te ipsum mihi donas, aut de te ipso revelas, vel promittis, te non viso, nec plene adepto: quoniam quidem non potest cor meum veraciter requiescere, nec totaliter contentari, nisi in te requiescat, et omnia dona omnemque creaturam transcendat. O mi dilectissime sponse Iesu Christe, amator purissime, dominator universae creaturae: quis mihi det pennas verae libertatis, ad volandum et pausandum in te? Quando ad plenum dabitur mihi vacare et videre, quam suavis es, Domine Deus meus? quando ad plenum me recolligam in te, ut praec amore tuo, non sentiam me; sed te solum, supra omnem sensum et modum, in modo non omnibus noto? nunc autem frequenter gemo, et infelicitatem meam cum dolore porto. quia multa mala in hac valle miseriarum occurrunt, quae me saepius conturbant, contristant, et obnubilant: saepius impediunt et distrahunt, alliciunt et implicent, ne liberum habeam accessum ad te, et ne iucundis fruar amplexibus, praesto semper

beatissimis spiritibus. moveat te suspirium meum, et desolatio multiplex in terra. O Iesu, splendor aeternae gloriae, solamen peregrinantis animae: apud te est os meum sine voce, et silentium meum loquitur tibi. usquequo tardat venire Dominus meus? veniat ad me pauperculum suum, et lactum faciat. mittat manum suam, et miserum eripiat de omni angustia. veni, veni: quia sine te, nulla erit laeta dies aut hora, quia tua laetitia mea: et sine te, vacua est mensa mea. miser sum, et quodammodo incarceratus, et compedibus gravatus; donec luce praesentiae tuae me reficias, ac libertati dones, vultumque amabilem demonstres. Quaeant alii pro te aliud, quodcumque libuerit: mihi aliud interim nil placet, nec placebit, nisi tu, Deus meus, spes mea, salus aeterna. non reticebo, nec deprecari cessabo: donec gratia tua revertatur, mihi que tu intus loquaris. Ecce adsum. ecce ego ad te, quia invocasti me. lacrymae tuae, et desiderium animae tuae, humiliatio tua et contritio cordis, inclinaverunt me et adduxerunt ad te. Et dixi: Domine, vocavi te, et desideravi frui te, paratus omnia respuere propter te. tu enim prior excitasti me, ut quaererem te. sis ergo benedictus, Domine, qui fecisti hanc bonitatem cum servo tuo, secundum multitudinem misericordiae tuae. quid habet ultra dicere servus tuus coram te, nisi ut humiliet se valde ante te,

memor semper propriae iniquitatis et vilitatis? non enim est similis tui, in cunctis mirabilibus caeli et terrae. sunt opera tua bona valde, judicia vera; et providentia tua reguntur universa. laus ergo tibi et gloria, ô Patris Sapientia: te laudet et benedicat os meum, anima mea, et cuncta creata simul.

XXII. DE RECORDATIONE MULTIPLICIUM BENEFICIORUM DEI.

APERI, Domine, cor meum in lege tua, et in præceptis tuis doce me ambulare. da mihi intelligere voluntatem tuam, et, cum magna reverentia ac diligenti consideratione, beneficia tua, tam in generali quam in speciali, memorari; ut digne tibi exhinc valeam gratias referre. verum scio et confiteor, nec pro minimo puncto me posse debitas gratiarum laudes persolvere. minor ego sum omnibus bonis mihi præstitis: et cum tuam nobilitatem attendo, deficit prae magnitudine spiritus meus. Omnia quae in anima habemus et corpore, et quaecumque exterius vel interius, naturaliter vel supernaturaliter possidemus, tua sunt beneficia, et te beneficum, pium ac bonum, commendant, a quo bona cuncta accepimus. etsi alius plura, alius pauciora accepit, omnia tamen tua sunt: et sine te, nec minimum potest haberi. ille, qui majora accepit, non potest merito suo gloriari,

neque super alios extolli, nec minori insultare: quia ille major et melior, qui sibi minus adscribit, et in regratiando humilior est, atque devotior. et qui omnibus viliores se existimat, et indigniores se judicat, aptior est ad percipienda majora. Qui autem pauciora accepit, contristari non debet, nec indignanter ferre, neque ditiori invidere; sed te potius attendere, et tuam bonitatem maxime laudare, quod tam affluenter, tam gratis et libenter, sine personarum acceptione, tua munera largiris. omnia ex te, et ideo in omnibus es laudandus. tu scis, quid unicuique donari expediat: et cur iste minus, et ille amplius habeat: non nostrum, sed tuum est hoc discernere, apud quem singulorum definita sunt merita. Unde, Domine Deus, pro magno etiam reputo beneficio, non multa habere, unde exterius et secundum homines laus et gloria apparet: ita ut considerata quis paupertate et vilitate personae suae, non modo gravitatem aut tristitiam vel dejectionem inde concipiat, sed potius consolationem et hilaritatem magnam: quia tu Deus pauperes et humiles, atque huic mundo despectos, tibi elegisti in familiares et domesticos. testes sunt ipsi Apostoli tui, quos principes super omnem terram constituisti. fuerunt tamen sine querela conversati in mundo, tam humiles et simplices, sine omni malitia et dolo, ut etiam pati contumelias gauderent pro

nomine tuo; et quae mundus abhorret, ipsi amplecterentur affectu magno. Nihil ergo amatorem tuum, et cognitorem beneficiorum tuorum, ita lactificare debet, sicut voluntas tua in eo, et beneplacitum aeternae dispositionis tuae: de qua tantum contentari debet et consolari, ut ita libenter velit esse minimus, sicut aliquis optaret esse maximus: et ita pacificus et contentus in novissimo, sicut in loco primo: atque ita libenter despicibilis et abjectus, nullius quoque nominis et famae, sicut ceteris honorabilior et major in mundo. nam voluntas tua, et amor honoris tui, omnia excedere debet; et plus cum consolari, magisque placere, quam omnia beneficia sibi data vel danda.

XXIII. DE QUATUOR MAGNAM IMPORTANTIBUS PACEM.

FILI, nunc docebo te viam pacis, et verae libertatis. Fac, Domine, quod dicis, quia hoc mihi gratum est audire. Stude, fili, alterius potius facere voluntatem, quam tuam. elige semper minus, quam plus habere. quaere semper inferiorem locum, et omnibus subesse. opta semper et ora, ut voluntas Dei integre in te fiat. ecce talis homo ingreditur fines pacis et quietis. Domine, sermo tuus iste brevis, multum in se continet perfectionis. parvus est dictu, sed plenus sensu, et u-

ber in fructu. nam si posset a me fideliter custodiri, non deberet tam facilis in me turbatio oriri. nam quoties me impacatum sentio et gravatum, ab hac doctrina me recessisse invenio. sed tu, qui omnia potes, et animae profectum semper diligis, adauge majorem gratiam: ut possim tuum complere sermonem, et meam perficere salutem.

ORATIO CONTRA COGITATIONES
MALAS.

DOMINE Deus meus, ne elongeris a me: Deus meus, in auxilium meum respice, quoniam insurrexerunt in me variae cogitationes, et timores magni, affligentes animam meam. quomodo pertransibo illaesus? quomodo perfringam eas? Ego, inquit, ante te ibo, et gloriosos terrae humiliabo. aperiam januas carceris, et arcana secretorum revelabo tibi. Fac, Domine, ut loqueris: et fugiant a facie tua omnes iniquae cogitationes. haec spes et unica consolatio mea, ad te in omni tribulatione confugere, tibi confidere, ex intimo invocare, et patienter consolationem tuam exspectare.

ORATIO PRO ILLUMINATIONE MENTIS.

CLARIFICA me, Iesu bone, claritate interni luminis: et educ de habitaculo cordis mei tenebras universas. cohibe evagationes multas, et vim facientes elide tentationes. pugna fortiter pro me, et expugna malas bestias, concupiscentias dico illecebrosas: ut fiat pax in virtute tua, et abundantia laudis tue resonet in aula sancta, hoc est, in conscientia pura. impera ventis et tempestatibus: dic mari, quiesce; et Aquiloni, ne flaveris; et erit tranquillitas magna. Emitte lucem tuam et veritatem, ut luceant super terram: quia terra sum inanis et vacua, donec illumines me. effunde gratiam desuper: perfunde cor meum rore caelesti: ministra devotionis aquas, ad irrigandam faciem terrae, ad producendum fructum bonum et optimum. eleva mentem pressam mole peccatorum, et ad caelestia totum desiderium meum suspende: ut, gustata suavitate supernae felicitatis, pigeat de terrenis cogitare. Rape me, et eripe ab omni creaturarum indurabili consolatione: quia nulla res creata, appetitum meum valet plenarie quietare et consolari. junge me tibi, inseparabili dilectionis vinculo: quoniam tu solus sufficis amanti, et absque te frivola sunt universa.

XXIV. DE EVITATIONE CURIOSAE IN-
QUISITIONIS SUPER ALTERIUS
VITA.

FILI, noli esse curiosus, nec vacuas gerere sollicitudines. quid hoc, vel illud, ad te? tu me sequere. quid enim ad te, utrum ille sit talis vel talis, aut iste sic et sic agit vel loquitur? tu non indiges respondere pro aliis, sed pro te ipso rationem reddes. quid ergo te implicas? ecce, ego omnes cognosco: et cuncta, quae sub sole fiunt, video: et scio, qualiter cum unoquoque sit, quid cogitet, quid velit, et ad quem finem tendat ejus intentio. mihi igitur committenda sunt: tu vero serva te in bona pace, et dimitte agitantem agitare, quantum voluerit. veniet super eum, quidquid fecerit vel dixerit, quia me fallere non potest. Non sit tibi curae de magni nominis umbra, non de multorum familiaritate, nec de privata hominum dilectione. ista enim generant distractiones, et magnas in corde obscuritates. libenter loquerer tibi verbum meum, et abscondita revelarem, si adventum meum diligenter observares, et ostium cordis mihi aperires. esto providus, et vigila in orationibus, et humilia te in omnibus.

XXV. IN QUIBUS FIRMA PAX CORDIS,
ET VERUS PROPECTUS CONSISTIT.

FILI, ego locutus sum : pacem relinquo vobis, pacem meam do vobis : non quomodo mundus dat, ego do vobis. pacem omnes desiderant; sed quae ad veram pacem pertinent, non omnes curant. pax mea, cum humilibus et mansuetis corde. pax tua, erit in multa patientia. si me audieris, et vocem meam secutus fueris, poteris multa pace frui. Quid igitur faciam? In omni re attende tibi, quid facias, et quid dicas : et omnem intentionem tuam ad hoc dirige, ut mihi soli placeas, et extra me nihil cupias vel quaeras. sed et de aliorum dictis vel factis nil temere iudices : nec cum rebus, tibi non commissis, te implices ; et poterit fieri, ut parum vel raro turberis. numquam autem sentire aliquamurbationem, nec aliquam pati cordis vel corporis molestiam, non est praesentis temporis, sed status aeternae quietis. non ergo aestimes te veram pacem invenisse, si nullam senseris gravitatem : nec tunc totum esse bonum, si neminem pateris adversarium : nec hoc esse perfectum, si cuncta fiant secundum tuum affectum. neque tunc aliquid magni te reputes, aut specialiter dilectum existimes, si in magna fueris devotione atque dulcedine : quia in istis non cognoscitur verus amator virtutis :

nec in istis consistit profectus et perfectio hominis. In quo ergo, Domine? In offrendo te ex toto corde tuo voluntati divinae, non quaerendo quae tua sunt, nec in parvo, nec in magno, nec in tempore, nec in aeternitate: ita ut una aequali facie, in gratiarum actione permancas, inter prospera et contraria, omnia aequa lance pensando. si fueris tam fortis et longanimus in spe, ut subtracta interiori consolatione, etiam ad ampliora sustinenda cor tuum praeparaveris, nec te justificaveris, quasi haec tantaque pati non deberes; sed me in omnibus dispositionibus justificaveris, et sanctum laudaveris: tunc in vera et recta via pacis ambulas; et spes indubitata erit, quod rursus in jubilo faciem meam sis visurus. quod si ad plenum tui ipsius contemptum perveneris, scito quod tunc abundantia pacis perfrueris, secundum possibilitatem tui incolatus.

**XXVI. DE EMINENTIA LIBERAE MENTIS,
QUAM SUPPLEX ORATIO MAGIS
MERETUR, QUAM LECTIO.**

DOMINE, hoc opus est perfecti viri, numquam ab intentione caelestium animum relaxare: et inter multas curas, quasi sine cura transire, non more torpentis, sed praerogativa quadam liberae mentis, nulli creaturae inordinata affectione adhaerendo. Obsecro te, pi-

issime Deus meus, praeserva me a curis hujus vitae, ne nimis implicer; a multis necessitatibus corporis, ne voluptate capiatur; ab universis animae obstaculis, ne molestiis fractus deiciatur. non dico ab his rebus, quas toto affectu ambit vanitas mundana; sed ab his miseriis, quae animam servi tui, communi maledicto mortalitatis, poenaliter gravant et retardant; ne in libertatem spiritus, quoties libuerit, valeat introire. O Deus meus, dulcedo ineffabilis, verte mihi in amaritudinem, omnem consolationem carnalem, ab aeternorum amore me abstrahentem: et ad se, intuitu cuiusdam boni delectabilis praesentis, male allicientem. non me vincat, Deus meus, non vincat caro et sanguis: non me decipiat mundus, et brevis gloria ejus: non me supplantet diabolus, et astutia illius. da mihi fortitudinem resistendi, patientiam tolerandi, constantiam perseverandi. da, pro omnibus mundi consolationibus, suavissimam spiritus tui unctionem: et pro carnali amore, tui nominis infunde amorem. Ecce cibus, potus, vestis, ac cetera utensilia, ad corporis sustentaculum pertinentia, ferventi spiritui sunt onerosa. tribue, talibus fomentis temperate uti, non desiderio nimio implicari. abjicere omnia non licet, quia natura sustentanda est: requirere autem superflua, et quae magis delectant, lex sancta prohibet: nam alias caro adversus spiritum insolesceret. inter haec, quaeso,

manus tua me regat et doceat, ne quid nimium fiat.

XXVII. QUOD PRIVATUS AMOR A SUMMO BONO MAXIME RETARDAT.

FILI, oportet te dare totum pro toto, et nihil tui ipsius esse. scito, quod amor tui ipsius magis nocet tibi, quam aliqua res mundi. secundum amorem et affectum, quem geris, quaelibet res plus vel minus adhaeret. si fuerit amor tuus purus, simplex, et bene ordinatus, eris sine captivitate rerum. noli concupiscere, quod non licet habere : noli habere, quod te potest impedire, et libertate interiori privare. mirum, quod non ex toto fundo cordis te ipsum mihi committis, cum omnibus quae desiderare potes vel habere. Quare vane moerore consumeris? cur superfluis curis fatigaris? sta ad beneplacitum meum, et nullum patieris detrimentum. si quaeris hoc vel illud, et volueris esse ibi vel ibi, propter tuum commodum, et proprium beneplacitum magis habendum : numquam eris in quietudine, nec liber a solitudine, quia in omni re reperietur aliquis defectus, et in omni loco erit qui adversetur. Juvat igitur, non quaelibet res adepta, vel multiplicata exterius; sed potius contempta, et decisa ex corde radicitus. quod non tantum de censu aeris et divitiarum intelliges, sed de honoris

etiam ambitu, ac vanae laudationis desiderio; quae omnia transeunt cum mundo. munus parum locus, si deest spiritus fervoris: nec diu stabit pax illa quaesita forissecus, si vacat a vero fundamento status cordis, hoc est, nisi steteris in me; permutare te potes, sed non meliorare. nam occasione orta et accepta, invenies quod fugisti, et amplius.

ORATIO PRO PURGATIONE CORDIS, ET
CAELESTI SAPIENTIA.

CONFIRMA me, Deus, per gratiam sancti Spiritus. da virtutem corroborari in interiori homine, et cor meum ab omni inutili sollicitudine et angore evacuare, nec variis desideriiis trahi cujuscumque rei, vilis aut pretiosae; sed omnia inspicere sicut transeuntia, et me pariter cum illis transiturum: quia nihil permanens sub sole, ubi omnia vanitas, et afflictio spiritus. ô quam sapiens qui ita considerat! Da mihi, Domine, caelestem sapientiam, ut discam te super omnia quærere et invenire, super omnia sapere et diligere; et cetera, secundum ordinem sapientiae tuae, prout sunt, intelligere. da prudenter declinare blandientem, et patienter ferre adversantem: quia haec magna sapientia, non moveri omni vento verborum, nec aurem male blandienti praeberere Sirenæ: sic enim incepta pergitur via secure.

XXVIII. CONTRA LINGUAS OBSEC-
TATORUM.

FILI, non aegre feras, si quidam de te male senserint et dixerint, quod non libenter audias. tu deteriora de te ipso sentire debes, et neminem infirmiora te credere. si ambulas ab intra, non multum ponderabis volantia verba. est non parva prudentia, silere in tempore malo, et introrsus ad me converti: nec humano iudicio disturbari. Non sit pax tua in ore hominum: siue enim bene siue male interpretati fuerint, non es ideo alter homo. ubi est vera pax, et vera gloria? nonne in me? et qui non appetit hominibus placere, nec timet displicere, multa perfruetur pace. ex inordinato amore, et vano timore, oritur omnis inquietudo cordis, et distractio sensuum.

XXIX. QUALITER, INSTANTE TRIBULATIONE, DEUS INVOCANDUS EST
ET BENEDICENDUS.

SIT nomen tuum, Domine, benedictum in secula, qui voluisti hanc tentationem et tribulationem venire super me. non possum eam effugere, sed necesse habeo ad te confugere; ut me adjuves, et in bonum mihi convertas. Domine, modo sum in tribulatione,

et non est cordi meo bene, sed multum vexor a praesenti passione. et nunc, Pater dilecte, quid dicam? deprehensus sum inter angustias. salvifica me ex hora hac. sed propterea veni in hanc horam, ut tu clarificeris, cum fuero valide humiliatus, et per te liberatus. complaceat tibi, Domine, ut eruas me: nam ego pauper quid agere possum, et quo ibo sine te? da patientiam, Domine, etiam hac vice. adjuva me, Deus meus, et non timebo quantumcumque gravatus fuero. Et nunc inter haec quid dicam? Domine, fiat voluntas tua. ego bene merui tribulari, et gravari. oportet utique ut sustineam; et utinam patienter, donec transeat tempestas, et melius fiat! potens est autem omnipotens manus tua, etiam hanc tentationem a me auferre, et ejus impetum mitigare, ne penitus succumbam; quemadmodum et prius saepius egisti mecum, Deus meus, misericordia mea. et quanto mihi difficilius, tanto tibi facilior est haec mutatio dexteræ Excelsi.

**XXX. DE DIVINO PETENDO AUXILIO, ET
CONFIDENTIA RECUPERANDÆ
GRATIAE.**

FILI, ego Dominus, confortans in die tribulationis. venias ad me, cum tibi non fuerit bene. hoc est quod maxime consolationem impedit caelestem, quia tardius te con-

vertis ad orationem. nam antequam me intente roges, multa interim solatia quaeris, et recreas te in externis, ideoque fit, ut parum omnia profint, donec advertas, quia ego sum qui eruo sperantes in me: nec est extra me valens auxilium, neque utile consilium, sed neque durable remedium. sed jam resumpto spiritu post tempestatem, reconvalesce in luce miserationum mearum: quia prope sum (dicit Dominus) ut restaurem universa non solum integre, sed et abundanter ac cumulate. Numquid mihi quidquam est difficile; aut ero similis dicenti, et non facienti? ubi est fides tua? ita firmiter, et perseveranter. esto longanimis, et vir fortis; veniet tibi consolatio in tempore suo. exspecta me, exspecta: veniam, et curabo te. tentatio est, quae te vexat: et formido varia, quae te exterret. quid importat sollicitudo de futuris contingentibus, nisi ut tristitiam super tristitiam habeas? sufficit dici malitia sua. vanum est et inutile, de futuris conturbari vel gratulari, quae forte numquam evenient. Sed humanum est, hujusmodi imaginationibus illudi: et parvi adhuc animi signum, tam leviter trahi ad suggestionem inimici. ipse enim non curat, utrum veris an falsis illudat et decipiat: utrum praesentium amore, aut futurorum formidine, prosternat. non ergo turbetur cor tuum, neque formidet. crede in me, et in misericordia mea habeto

fiduciam. quando tu putas te elongatum a me, saepe sum propinquior. quando tu aestimas penè totum perditum, tunc saepe majus merendi instat lucrum. non est totum perditum, quando res accidit in contrarium. non debes judicare secundum praesens sentire: nec sic gravitati alicui, undecumque venienti, inhaerere et accipere, tamquam omnis spes sit ablata emergendi. Noli putare te relictum ex toto, quamvis ad tempus tibi miseriam aliquam tribulationem, vel etiam optatam subtraxerim consolationem: sic enim transitur ad regnum caelorum. et hoc sine dubio magis expedit tibi, et ceteris servis meis, ut exercitemini adversis, quam si cuncta ad libitum haberetis. ego novi cogitationes absconditas; quia multum expedit pro salute tua, ut interdum sine sapore relinquare; ne forte eleveris in bono successu, et tibi ipsi placere velis in eo, quod non es. quod dedi, auferre possum; et restituero, cum mihi placuerit. Cum dederò, meum est: cum retraxerò, tuum non tuli: quia meum est omne datum bonum, et omne donum perfectum. si tibi admiserò gravitatem, aut quamlibet contrarietatem, ne indigneris, neque concedat cor tuum; ego cito sublevare possum, et omne onus in gaudium transmutare. verumtamen iustus sum et commendabilis multum, cum sic facio tecum. Si recte sapias, et in veritate aspicias, numquam debes propter

adversa tam dejecte contristari, sed magis gaudere, et gratias agere: imo hoc unicum reputare gaudium, quod affligens te doloribus, non parco tibi. sicut dilexit me Pater, et ego vos diligo, dixi dilectis discipulis meis: quos utique non misi ad gaudia temporalis, sed ad magna certamina; non ad honores, sed ad despectiones; non ad otium, sed ad labores; non ad requiem, sed ad asserendum fructum multum in patientia. horum memento, fili mi, verborum.

XXXI. DE NEGLECTU OMNIS CREATURAE, UT CREATOR POSSIT INVENIRI.

DOMINE, bene indigeo adhuc majori gratia, si debeam illuc pervenire, ubi me nemo poterit, nec ulla creatura, impedire. nam, quam diu res aliqua me retinet, non possum libere ad te volare. cupiebat libere volare, qui dicebat: quis dabit mihi pennas sicut columbae, et volabo, et requiescam? quid simpliciori oculo quietius! et quid liberius, nil desiderante in terris? oportet igitur omnem supertransire creaturam, et se ipsum perfecte deserere, ac in excessu mentis stare, et videre, te omnium conditorem cum creaturis nil simile habere. et nisi quis ab omnibus creaturis fuerit expeditus, non poterit libere intendere divinis. ideo enim pauci inveniuntur

contemplativi, quia pauci sciunt se a perituris et creaturis ad plenum sequestrari. Ad hoc magna requiritur gratia, quae animam levet, et supra semet ipsam rapiat. et nisi homo sit in spiritu elevatus, et ab omnibus creaturis liberatus, ac Deo totus unitus, quidquid scit, quidquid etiam habet, non est magni ponderis. diu parvus erit, et infra jacebit, qui aliquid magnum aestimat, nisi solum unum immensum, aeternum bonum. et quidquid Deus non est, nihil est, et pro nihilo computari debet. est magna differentia, sapientia illuminati et devoti viri, et scientia litterati atque studiosi clerici. multo nobilior est illa doctrina, quae de sursum ex divina influentia manat; quam quae laboriose humano acquiritur ingenio. Plures reperiuntur contemplationem desiderare; sed quae ad eum requiruntur, non student exercere. est magnum impedimentum, quia in signis et sensibilibus rebus statur, et parum de perfecta mortificatione habetur. nescio quid est, quo spiritu ducimur, et quid praetendimus, qui spirituales dici videmur; quod tantum laborem, et ampliore sollicitudinem, pro transitoriis et vilibus rebus agimus, et de interioribus nostris vix raro, plene recollectis sensibus, cogitamus. Proh dolor! statim post modicam recollectionem foris erumpimus: nec opera nostra, districta examinatione trutinamus. ubi jacent affectus nostri, non attendimus: et

quam impura sint omnia, non deploramus. omnis quippe caro corruerat viam suam, et ideo sequebatur diluvium magnum. cum ergo interior affectus noster multum corruptus sit, necesse est, ut actio sequens, index carentiae interioris vigoris, corrumpatur. ex puro corde procedit fructus bonae vitae. Quantum quis fecerit, quaeritur; sed ex quanta virtute agit, non tam studiose pensatur. si fuerit fortis, dives, pulcher, habilis, vel bonus scriptor, bonus cantor, bonus laborator, investigatur; quam pauper sit spiritu, quam patiens et mitis, quam devotus et internus, a multis tacetur. natura exteriora hominis respicit, gratia ad interiora se convertit. illa frequenter fallitur, ista in Deo sperat, ut non decipiatur.

XXXII. DE ABNEGATIONE SUI, ET ABDICATIONE OMNIS CUPIDITATIS.

FILI, non potes perfectam possidere libertatem, nisi totaliter abneges temet ipsum: compediti sunt omnes proprietarii, et sui ipsius amatores, cupidi, curiosi, gyrovagi, quærentes semper mollia, non quæ Iesu Christi, sed hoc sæpe fingentes et componentes, quod non stabit. peribit enim totum, quod non est ex Deo ortum. tene breve et consummatum verbum: dimitte omnia, et invenies omnia: relinque cupidinem, et reperies requiem. hoc

mente pertracta: et cum impleveris, intelliges omnia. Domine, hoc non est opus unius diei, nec ludus parvulorum: imo in hoc brevi includitur omnis perfectio Religiosorum. Fili, non debes averti, nec statim deijci, audita via perfectorum, sed magis ad sublimiora provocari; et ad minus ad haec ex desiderio suspirare. utinam sic tecum esset, et ad hoc pervenisses, ut tui ipsius amator non esses, sed ad nutum meum pure stares, et ejus quem tibi praeposui, Patris: tunc mihi valde placeres, et tota vita tua in gaudio et pace transiret. adhuc multa habes ad relinquendum: quae nisi mihi ex integro resignaveris, non acquires quod postulas. suadeo tibi emere a me aurum ignitum, ut locuples fias, id est, caelestem sapientiam, omnia infima conculcantem. postpone terrenam sapientiam, omnem humanam et propriam complacentiam. Dixi, viliora tibi emenda pro pretiosis et altis, in rebus humanis. nam valde vilis et parva, ac pene oblivioni tradita videtur, vera caelestis sapientia; non sapiens alta de se, nec magnificari quaerens in terra: quam multi ore tenus praedicant, sed vita longe dissentiunt: ipsa tamen est pretiosa margarita, a multis abscondita.

XXXIII. DE INSTABILITATE CORDIS,
ET DE INTENTIONE FINALI AD
DEUM HABENDA.

FILI, noli credere affectui tuo: qui nunc est, cito mutabitur in aliud. quamdiu vixeris, mutabilitati subjectus es, etiam nolens: ut modo laetus, modo tristis; modo pacatus, modo turbatus; nunc devotus, nunc indevotus; nunc studiosus, nunc acediosus; nunc gravis, nunc levis inveniaris. sed stat super haec mutabilia sapiens et bene doctus in spiritu; non attendens, quid in se sentiat, vel qua parte flet ventus instabilitatis; sed ut tota intentio mentis ejus ad debitum et optatum proficiat finem. nam sic poterit unus et idem inconcussusque permanere, simplici intentionis oculo, per tot varios eventus, ad me impraetermisse directo. Quanto autem purior fuerit intentionis oculus, tanto constansius inter diversas itur procellas. sed in multis caligat oculus purae intentionis: respicitur enim cito in aliquod delectabile, quod occurrat. nam et raro totus liber quis invenitur a naevo propriae exquisiitionis. sic Judaei olim venerant in Bethaniam, ad Martham et Mariam: non propter Iesum tantum, sed et ut Lazarum viderent. mundandus est ergo intentionis oculus, ut sit simplex et rectus,

atque ultra omnia varia media ad me dirigendus.

XXXIV. QUOD AMANTI SAPIT DEUS
SUPER OMNIA, ET IN OMNIBUS.

ECCE Deus meus, et omnia. quid volo amplius, et quid felicius desiderare possum? ô sapidum et dulce verbum! sed amanti verbum, non mundum, nec ea quae in mundo sunt. Deus meus, et omnia. intelligenti, satis dictum est: et saepe repetere, jucundum est amanti. te siquidem praesente, jucunda sunt omnia: te autem absente, fastidiunt cuncta. tu facis cor tranquillum, et pacem magnam, laetitiamque festivam. tu facis bene sentire de omnibus, et in omnibus te laudare: nec potest aliquid sine te diu placere; sed si debet gratum esse et bene sapere, oportet gratiam tuam adesse, et condimento tuae sapientiae condiri. Cui tu sapis, quid ei recte non sapiet? et cui tu non sapis, quid ei ad jucunditatem esse poterit? sed deficiunt in sapientia tua mundi sapientes, et qui carnem sapiunt: quia ibi plurima vanitas, et hic mors invenitur. qui autem te per contemptum mundanorum, et carnis mortificationem sequuntur, vere sapientes esse cognoscuntur: quia de vanitate ad veritatem, de carne ad spiritum transferuntur. istis sapit Deus: et quidquid boni invenitur in creaturis, totum ad laudem

referunt sui conditoris. dissimilis tamen, et multum dissimilis sapor creatoris et creaturae, aeternitatis et temporis, lucis increatae et lucis illuminatae. O lux perpetua, cuncta creata transcendens lumina, fulgura coruscationem de sublimi, penetrantem omnia cordis mei intima. purifica, lactifica, clarifica, et vivifica spiritum meum, cum suis potentiis, ad inhaerendum tibi jubilosis excessibus. O quando veniet haec beata et desiderabilis hora, ut tua me saties praesentia, et sis mihi omnia in omnibus? quamdiu hoc datum non fuerit, nec plenum gaudium erit. adhuc (proh dolor!) vivit in me vetus homo, non est totus crucifixus, non est perfecte mortuus. adhuc concupiscit fortiter contra spiritum, bella movet intestina, nec regnum animae patitur esse quietum. Sed tu, qui dominaris potestati maris, et motum fluctuum ejus mitigas, exsurge, adjuva me. dissipa gentes quae bella volunt: contere eas in virtute tua. ostende, quaeso, magnalia tua, et glorificetur dextera tua: quia non est spes alia, nec refugium mihi, nisi in te, Domine Deus meus.

XXXV. QUOD NON EST SECURITAS A
TENTATIONE IN HAC VITA.

FILI, numquam securus es in hac vita: sed quoad vixeris, semper arma spiritualia tibi sunt necessaria. inter hostes versaris, et

a dextris et a sinistris impugnaris. si ergo non uteris utriusque scuto patientiae, non eris diu sine vulnere. insuper, si non ponis cor tuum fixe in me, cum mera voluntate cuncta patiendi propter me, non poteris ardorem istum sustinere, nec ad palmam pertingere beatorum, oportet te ergo viriliter omnia pertransire, et potenti manu uti adversus objecta. nam vincenti datur manna, et torpenti reliquitur multa miseria. Si quaeris in hac vita requiem, quomodo tunc pervenies ad aeternam requiem? non ponas te ad multam requiem, sed ad magnam patientiam. quare veram pacem, non in terris, sed in caelis, non in hominibus, nec in ceteris creaturis, sed in Deo solo. pro amore Dei debes omnia libenter subire, labores scilicet, et dolores, tentationes, vexationes, anxietates, necessitates, infirmitates, injurias, oblocutiones, reprehensiones, humiliaiones, confusiones, correctiones et despectiones. haec juvant ad virtutem, haec probant Christi tironem; haec fabricant caelestem coronam. ego reddam mercedem aeternam pro brevi labore, et infinitam gloriam pro transitoria confusione. Putas tu, quod semper habebis pro tua voluntate consolationes spirituales? Sancti mei non semper habuerunt tales, sed multas gravitates, et tentationes varias, magnasque desolationes. sed patienter sustinuerunt se in omnibus, et magis confisi sunt Deo, quam sibi;

scientes quia non sunt condignae passionem huius temporis, ad futuram gloriam promerendam. vis tu statim habere, quod multi post multas lacrymas et magnos labores vix obtinuerunt? exspecta Dominum; viriliter age, et confortare: noli diffidere, noli discedere; sed corpus et animam expone constanter pro gloria Dei. ego reddam plenissime; ego tecum ero in omni tribulatione.

XXXVI. CONTRA VANA HOMINUM JUDICIA.

FILI, iacta cor tuum firmiter in Domino, et humanum ne metuas iudicium, ubi te conscientia pium reddit et infontem. bonum est et beatum taliter pati, nec hoc erit grave humili cordi, et Deo magis quam sibi ipsi confidenti. multi multa loquuntur, et ideo parva fides est adhibenda. sed et omnibus satis esse, non est possibile, etsi Paulus omnibus studuit in Domino placere, et omnibus omnia factus est; tamen etiam pro minimo duxit, quod ab humano die iudicatus fuit. Egit satis pro aliorum aedificatione et salute, quantum in se erat et poterat: sed ne ab aliis aliquando iudicaretur, vel non despiceretur, cohibere non potuit. ideo totum Deo commisit, qui totum noverat: et patientia ac humilitate, contra ora loquentium iniqua, aut etiam vana ac mendosa cogitantium, atque pro libitu suo

136 DE IMITATIONE

quaeque jactantium, se defendit. respondit tamen interdum, ne infirmis ex sua taciturnitate generaretur scandalum. Quis tu, ut timeas a mortali homine? hodie est, et cras non comparet. Deum time, et hominum terrores non expavesces. quid potest aliquis in te verbis, aut injuriis? sibi potius nocet, quam tibi: nec poterit judicium Dei effugere, quicumque est ille. tu habes Deum prae oculis, et noli contendere verbis querulosis. quod si ad praesens tu videris succumbi, et confusionem pati, quam non meruisti: ne indigneris ex hoc, neque per impatientiam minuas coronam tuam; sed ad me potius respice in caelum, qui potens sum eripere ab omni confusione et injuria, et unicuique reddere secundum opera sua.

XXXVII. DE PURA ET INTEGRA RESIGNATIONE SUI, AD OBTINENDAM CORDIS LIBERTATEM.

FILI, relinque te, et invenies me. Ita sine electione, et omni proprietate; et lucraberis semper. nam et adjicietur tibi amplior gratia, statim ut te resignaveris, nec resumpseris. Domine, quoties me resignabo, et in quibus me relinquam? Semper, et omni hora: sicut in parvo; sic et in magno. nihil excipio, sed in omnibus te nudatum inveniri volo. alioquin, quomodo poteris esse meus,

et ego tuus; nisi fueris ab omni propria voluntate intus et foris spoliatus? quanto celerius hoc agis, tanto melius habebis: et quanto plenius et sincerius, tanto mihi plus placebis, et amplius lucraberis. Quidam se resignant, sed cum aliqua exceptione: non enim plene Deo confidunt, ideo sibi providere satagunt. quidam etiam primo totum offerunt, sed postea tentatione pulsati, ad propria redeunt, ideo minime in virtute proficiunt. hi ad veram puri cordis libertatem, et jucundae familiaritatis meae gratiam, non pertingent; nisi integra resignatione, et quotidiana sui immolatione prius facta; sine qua non stat, nec stabit unio fructiva. Dixi tibi saepissime, et nunc iterum dico: relinque te, resigna te, et frueris magna interna pace. da totum pro toto; nil exquire, nil repete: sta pure et inhaesitanter in me, et habebis me. eris liber in corde, et tenebrae non conculcabunt te. ad hoc conare, hoc ora, hoc desidera; ut ab omni proprietate possis exspoliari, et nudus nudum Iesum sequi; tibi mori, et mihi aeternaliter vivere. tunc deficient omnes vanae phantasiae, conturbationes iniquae, et curae superfluae. tunc etiam recedet immoderatus timor, et inordinatus amor morietur.

**XXXVIII. DE BONO REGIMINE IN EX-
TERNIS, ET RECURSU AD DEUM
IN PERICULIS.**

FILI, ad istud diligenter tendere debes, ut in omni loco, et actione, seu occupatione externa, sis intus liber et tui ipsius potens, et sint omnia sub te, et tu non sub eis: ut sis dominus actionum tuarum et rector, non servus, nec emptitius, sed magis exemptus verusque Hebraeus, in sortem ac libertatem transiens filiorum Dei: qui stant super praesentia, et speculantur aeterna: qui transitoria sinistro intuentur oculo, et dextro caelestia: quos temporalia non trahunt ad inhaerendum, sed trahunt ipsi magis ea ad bene servendum: prout ordinata sunt a Deo, et instituta a summo opifice, qui nil inordinatum in sua reliquit creatura. Si etiam in omni eventu stas, non in apparentia externa, nec oculo carnali lustras visa vel audita: sed mox in qualibet causa intras cum Moyse in tabernaculum, ad consulendum Dominum: audies nonnumquam divinum responsum, et redies instructus de multis praesentibus et futuris. semper enim Moyses recursum habuit ad tabernaculum, pro dubiis et quaestionibus solvendis; fugitque ad orationis adjutorium, pro periculis et improbitatibus hominum sublevandis. sic et tu confugere debes in cordis

tui secretarium, divinum intentius implorando suffragium. propterea namque Josue et filii Israël a Gabaonitis leguntur decepti: quia os Domini prius non interrogaverunt, sed nimium creduli dulcibus sermonibus, falsa pietate delusi sunt.

XXXIX. QUOD HOMO NON SIT IMPORTUNUS IN NEGOTIIS.

FILI, committe mihi semper causam tuam, ego bene disponam in tempore suo. expecta ordinationem meam, et senties inde profectum. Domine, fatis libenter tibi omnes res committo; quia parum potest cogitatione mea proficere. utinam non multum adhaererem futuris eventibus, sed ad beneplacitum tuum incunctanter me offerrem! Fili, saepe homo rem aliquam vehementer agitat, quam desiderat; sed cum ad eam pervenerit, aliter sentire incipit: quia affectiones circa idem, non sunt durabiles, sed magis de uno ad aliud impellunt. non est ergo minimum, etiam in minimis se ipsum relinquere. Verus profectus hominis, est abnegatio sui ipsius: et homo abnegatus, valde liber est et securus. sed antiquus hostis omnibus bonis adversans, a tentatione non cessat, sed die noctuque graves molitur insidias, si forte in laqueum deceptionis possit praecipitare incau-

tum. vigilate, et orate, dicit Dominus, ut non intretis in tentationem.

**XL. QUOD HOMO NIHIL BONI EX SE
HABET, ET DE NULLO GLORI-
ARI POTEST.**

DOMINE, quid est homo, quod memor es ejus; aut filius hominis, quia visitas eum? quid promeruit homo, ut dares illi gratiam tuam? Domine, quid possum conqueri, si me deseris? aut quid juste obtendere possum, si quod peto, non feceris? certe hoc in veritate cogitare possum, et dicere: Domine, nihil sum, nihil possum, nihil boni ex me habeo; sed in omnibus deficio, et ad nihil semper tendo. et nisi a te fuero adjutus, et interius informatus, totus efficior tepidus et dissolutus. Tu autem, Domine, semper idem ipse es, et permanes in aeternum semper bonus, justus, et sanctus, bene, juste, ac sancte agens omnia, et disponens in sapientia. sed ego, qui ad defectum sum magis pronus, quam ad profectum, non sum semper in uno statu perdurans: quia septem tempora mutantur super me. verumtamen cito melius fit, cum tibi placuerit, et manum porrexeris adjutricem: quia tu solus sine humano suffragio poteris auxiliari; et in tantum confirmare, ut vultus meus amplius in diversa non mutetur, sed in te uno cor meum convertatur, et quiescat. Unde,

si bene scirem omnem humanam consolationem abjicere, sive propter devotionem adipiscendam, sive propter necessitatem, qua compellor, te quaerere, quia non est homo qui me consoletur; tunc possem merito de gratia tua sperare, et de dono novae consolationis exultare. Gratias tibi, unde totum venit, quotiescumque mihi bene succedit. ego autem vanitas et nihilum ante te, inconstans homo et infirmus. unde ergo possum gloriari, aut cur appeto reputari? numquid de nihilo? et hoc vanissimum est. vere inanis gloria, mala pestis, vanitas maxima: quia a vera trahit gloria, et caelesti spoliatur gratia. dum enim homo complacet sibi, displicet tibi; dum inhiat laudibus humanis, privatur veris virtutibus. Est autem vera gloria et exultatio sancta, gloriari in te, et non in se: gaudere in nomine tuo, non in propria virtute, nec in aliqua creatura delectari, nisi propter te. laudetur nomen tuum, non meum: magnificetur opus tuum, non meum: benedicatur nomen sanctum tuum, nihil mihi autem attribuat de laudibus hominum. tu gloria mea, tu exultatio cordis mei. in te gloriabor et exultabo tota die; pro me autem nihil, nisi in infirmitatibus meis. Quaeant Judaei gloriam, quae ab invicem est: ego hanc requiram, quae a solo Deo est. omnis quidem gloria humana, omnis homo temporalis, omnis altitudo mundana, aeternae gloriae tuae

comparata, vanitas est et stultitia. *ô* veritas mea et misericordia mea, Deus meus, Trinitas beata! tibi soli laus, honor, virtus, et gloria, per infinita seculorum secula.

XLI. DE CONTEMPTU OMNIS TEMPORALIS HONORIS.

FILI, noli tibi attrahere, si videas alios honorari et elevari, te autem despici et humiliari. erige cor tuum ad me in caelum, et non contristabit te contemptus hominum in terris. Domine, in caecitate sumus, et vanitate cito seducimur. si recte me inspicio, numquam mihi facta est injuria ab aliqua creatura, unde nec juxte habeo conqueri adversum te. quia autem frequenter et graviter peccavi tibi, merito armatur contra me omnis creatura. mihi igitur juxte debetur confusio et contemptus; tibi autem laus, honor, et gloria. et nisi me ad hoc præparavero, quod velim libenter ab omni creatura despici et relinqui, atque penitus nihil videri, non possum interius pacificari et stabiliri, nec spiritualiter illuminari, neque plene tibi uniri.

XLII. QUOD PAX NON EST PONENDA
IN HOMINIBUS.

FILII, si ponis pacem tuam cum aliqua persona, propter tuum sentire et convivere, instabilis eris et implicatus. sed si recursum habes ad semper viventem et manentem veritatem, non contristabit amicus recedens aut moriens. in me debet amici dilectio stare: et propter me diligendus est, quisquis tibi bonus visus est, et multum carus in hac vita. sine me non valet, nec durabit amicitia: nec est vera et munda dilectio, quam ego non copulo. ita mortuus debes esse talibus affectionibus dilectorum hominum, ut (quantum ad te pertinet) sine omni humano optares esse consortio. tanto homo Deo magis appropinquat, quanto ab omni solatio terreno longius recedit. tanto etiam altius ad Deum ascendit, quanto profundius in se descendit; et plus sibi ipsi vilescit. Qui autem sibi aliquid boni attribuit, gratiam Dei in se venire impedit: quia gratia Spiritus sancti, cor humile semper quaerit. si scires te perfecte annihilare, atque ab omni creato amore evacuare, tunc deberem in te cum magna gratia emanare. quando tu respicis ad creaturas, subtrahitur tibi adspectus Creatoris. disce te in omnibus propter Creatorem vincere, tunc ad divinam valebis cognitionem pertingere.

quantumcumque modicum sit, si inordinate diligitur et respicitur, retardat a summo, et vitiat.

XLIII. CONTRA VANAM ET SECLAREM SCIENTIAM.

FILI, non te moveant pulcra et subtilia hominum dicta. non enim est regnum Dei in sermone, sed in virtute. attende verba mea, quae corda accendunt, et mentes illuminant; inducunt compunctionem, et variam ingerunt consolationem. numquam ad hoc legas verbum, ut doctior aut sapientior possis videri. stude mortificationi vitiorum, quia hoc amplius tibi proderit, quam notitia multarum difficilium quaestionum. Cum multa legeris et cognoveris, ad unum semper oportet redire principium. ego sum, qui doceo hominem scientiam: et clariorem intelligentiam parvulis tribuo, quam ab homine possit doceri. cui ego loquor, cito sapiens erit, et multum in spiritu proficiet. vac eis qui multa curiosa ab hominibus inquirunt, et de via mihi serviendi parum curant. veniet tempus, quando apparebit Magister magistrorum Christus, Dominus Angelorum, cunctorum auditurus lectiones, hoc est, singulorum examinaturus conscientias. et tunc scrutabitur Jerusalem in lucernis, et manifesta erunt abscondita tenebrarum, tacebuntque argumenta lingua-

rum. Ego sum, qui humilem in puncto elevo mentem: ut plures aeternae veritatis capiat rationes, quam si quis decem annis studisset in scholis. ego doceo sine strepitu verborum, sine confusione opinionum, sine fastu honoris, sine pugnatione argumentorum. ego sum qui doceo terrena despiciere, praesentia fastidire, aeterna quaerere, aeterna sapere, honores fugere, scandala sufferre, omnem spem in me ponere, extra me nil cupere, et super omnia me ardentem amare. Nam quidam, amando me intime, didicit divina, et loquebatur mirabilia. plus profecit in relinquendo omnia, quam in studendo subtilia. sed aliis loquor communia, aliis specialia: aliquibus in signis et figuris dulciter appaereo, quibusdam vero in multo lumine revelo mysteria. una vox librorum, sed non omnes aequae informat: quia intus sum doctor veritatis, scrutator cordis, cogitationum intellectus, actionum promotor, distribuens singulis, sicut dignum judicavero.

XLIV. DE NON ATTRAHENDO SIBI RES EXTERIORES.

FILI, in multis oportet te esse inscium, et aestimare te tamquam mortuum super terram, et cui totus mundus crucifixus sit. multa etiam oportet surda aure pertransire, et quae tuae pacis sunt, magis cogitare. utilius est o-

culos a rebus displicentibus avertere, et unicuique suum sentire relinquere, quam contentiosis sermonibus deservire. si bene steteris cum Deo, et ejus judicium adspexeris, facilius te victum portabis. O Domine, quousque venimus? ecce damnum defletur temporale, pro modico quaestu laboratur et curritur, et spirituale detrimentum in oblivionem transit, et vix sero reditur. quod parum vel nihil prodest, attenditur; et quod summe necessarium est, negligenter praeteritur: quia totus homo ad externa defluit, et, nisi cito resipiscat, libens in exterioribus jacet.

**XLV. QUOD OMNIBUS NON EST CRE-
DENDUM: ET DE FACILI LAP-
SU VERBORUM.**

DA mihi auxilium, Domine, de tribulatione, quia vana salus hominis. quam saepe ibi non inveni fidem, ubi me habere putavi? quoties etiam ibi reperi, ubi minus praesumpsi? vana ergo spes in hominibus, salus autem iustorum in te, Deus. benedictus sis, Domine Deus meus, in omnibus, quae accidunt nobis. infirmi sumus et instabiles, cito fallimur et permutamur. Quis est homo, qui ita caute et circumspecte in omnibus se custodire valet, ut aliquando in aliquam deceptionem vel perplexitatem non veniat? sed qui in te, Domine, confidit, ac simplici ex corde quaerit

non tam facile labitur. et si inciderit aliquam tribulationem, quocumque modo fuerit etiam implicatus, citius per te eruetur, aut a te consolabitur: quia tu non deserēs in te sperantem usque in finem. rarus fidus amicus, in cunctis amici perseverans pressuris. tu, Domine, tu solus es fidelissimus in omnibus, et praeter te non est alter talis. O quam bene sapuit sancta illa anima, quae dixit: mens mea solidata est, et in Christo fundata! si ita mecum foret, non tam facile timor humanus me sollicitaret, nec verborum jacula moverent. quis omnia praevidere, quis praecavere futura mala sufficit? si praevisa saepe etiam laedunt, quid improvisa nisi graviter feriunt? sed quare mihi misero non melius providi? cur etiam tam facile aliis credidi? sed homines sumus, nec aliud quam fragiles homines sumus, etiamsi angeli a multis aestimamur et dicimur. cui credam, Domine? cui, nisi tibi? veritas es, quae non fallis nec falli potes. et rursus: omnis homo mendax, infirmus, instabilis, et labilis maxime in verbis; ita ut statim vix credi debeat, quod rectum in facie sonare videtur. Quam prudenter praemonuisti, cavendum ab hominibus: et quia inimici hominis, domestici ejus: nec credendum, si quis dixerit: ecce hic, aut ecce illic. doctus sum damno meo, et utinam ad cautelam majorem, et non ad insipientiam mihi, cautus esto (ait quidam) cautus

esto, serva apud te quod dico. et dum ego sileo, et absconditum credo, nec ille silere potest quod silendum petiit, sed statim prodit me et se, et abiit. ab hujusmodi fabulis et incautis hominibus protege me, Domine, ne in manus eorum incidam, nec umquam talia committam. verbum verum et stabile da in os meum, et linguam callidam fac a me. quod pati nolo, omnimodo cavere debeo. O quam bonum et pacificum de aliis silere, nec indifferenter omnia credere, neque de facili ulterius effari; paucis se ipsum revelare, te semper inspectorem cordis quaerere; nec omni vento verborum circumferri, sed omnia intima et externa, secundum placitum tuae voluntatis, optare perfici! quam tutum, pro conservatione caelestis gratiae, humanam fugere apparentiam, nec appetere quae foris admirationem videntur praebere; sed ea, tota sedulitate sectari, quae vitae emendationem dant et fervorem! quam multis nocuit virtus scita, ac praepropere laudata! quam sane profuit gratia silentio servata in hac fragili vita, quae tota tentatio fertur et militia!

XLVI. DE CONFIDENTIA IN DEO HABENDA, QUANDO INSURGUNT VERBORUM JACULA.

FILI, sta firmiter; et spera in me. quid enim sunt verba, nisi verba? per aërem vo-

lant, sed lapidem non laedunt. si reus es, cogita quod libenter emendare te velis: si nihil tibi conscius es, pensa quod velis libenter pro Deo hoc sustinere. parum satis est, ut vel verba interdum sustineas, qui necdum fortia verbera tolerare vales. et quare tam parva tibi ad cor transeunt, nisi quia adhuc carnalis es, et homines, magis quam oportet, attendis? nam quia despici metuis, reprehendi pro excessibus non vis, et excusationum umbracula quaeris. Sed inspicere te melius, et agnosces, quia vivit adhuc in te mundus, et vanus amor placendi hominibus. cum enim bassari refugis, et confundi pro defectibus, constat utique, quod nec verus humilis sis, nec vere mundo mortuus, nec mundus tibi crucifixus. sed audi verbum meum, et non curabis decem millia verba hominum. ecce, si cuncta contra te dicerentur, quae fingi malitiosissime possent: quid tibi nocerent, si omnino transire permitteres, nec plusquam festucam perpenderes? numquid vel unum capillum tibi extrahere possent? Sed qui cor intus non habet, nec Deum prae oculis, facilliter verbo movetur vituperationis. qui autem in me confidit, nec proprio iudicio stare appetit, absque humano terrore erit. ego enim sum iudex, et cognitor omnium secretorum: ego scio, qualiter res acta est; ego injuriantem novi, et sustinentem. a me exiit verbum istud, me permittente hoc accidit, ut

revelentur ex multis cordibus cogitationes. ego reum et innocentem judicabo, sed occulto iudicio utrumque ante probare volui. Testimonium hominum saepe fallit: meum iudicium verum est, stabit, et non subvertetur. latet plerumque, et paucis ad singula patet: numquam tamen errat, nec errare potest, etiam si oculis insipientium non rectum videatur. ad me ergo currendum est in omni iudicio, nec proprio innitendum arbitrio. justus enim non conturbabitur, quidquid a Deo ei acciderit. etiam si injuste aliquid contra eum prolatum fuerit, non multum curabit. sed nec vane exultabit, si per alios rationabiliter excusetur. pensat namque, quia ego sum scrutans corda et renes, qui non iudico secundum faciem et humanam apparentiam. nam saepe in oculis meis reperitur culpabile, quod hominum iudicio creditur laudabile. Domine Deus, iudex iuste, fortis et patiens, qui hominum nosti fragilitatem et pravitatem; esto robur meum, et tota fiducia mea: non enim mihi sufficit conscientia mea. tu nosti, quod ego non novi: et ideo in omni reprehensione humiliare me debui, et mansuete sustinere. ignosce quoque mihi propitius, quoties sic non egi, et dona iterum gratiam amplioris sufferentiae. melior est enim mihi tua copiosa misericordia, ad consecutionem indulgentiae; quam mea opinata iustitia, pro defensione latentis conscientiae. et si

nihil mihi conscius sum, tamen in hoc justificare me non possum: quia remota misericordia tua, non justificabitur in conspectu tuo omnis vivens.

XLVII. QUOD OMNIA GRAVIA PRO AETERNA VITA SUNT TOLERANDA.

FILI, non te frangent labores quos assumpsisti propter me, nec tribulationes te decedant usquequaque; sed mea promissio, in omni eventu te roborat et consoletur. ego sufficiens sum ad reddendum supra omnem modum et mensuram. non diu hic laborabis, nec semper gravaberis doloribus. exspecta paulisper, et videbis celerem finem malorum. veniet una hora, quando cessabit omnis labor et tumultus. modicum est, et breve, omne quod transit cum tempore. Age, quod agis: fideliter labora in vinea mea, ego ero merces tua. scribe, lege, canta, gemit, tace, ora, sustine viriliter contraria: digna est his omnibus et majoribus praeliis vita aeterna. veniet pax in die una, quae nota est Domino: et erit non dies neque nox hujus scilicet temporis, sed lux perpetua, claritas infinita, pax firma, et requies secura. non dices tunc: quis me liberabit de corpore mortis hujus? neque clamabis: heu mihi, quia incolatus meus prolongatus est! quoniam praecipitabitur mors, et salus erit indefectiva; anxietas nulla, ju-

cunctitas beata, societas dulcis et decora. O si vidisses Sanctorum in caelo coronas perpetuas, quanta quoque nunc exultant gloria, qui huic mundo olim contemptibiles, et quasi vita ipsa indigni putabantur: profecto te statim humiliares usque ad terram, et affectares potius omnibus subesse, quam uni praeesse: nec hujus vitae laetos dies concupisceres, sed magis pro Deo tribulari gauderes: et pro nihilo inter homines computari, maximum lucrum duceres. O si tibi haec saperent, et profunde ad cor transirent, quomodo auderes vel semel conqueri? nonne pro vita aeterna, cuncta laboriosa sunt toleranda? non est parvum quid, perdere aut lucrari regnum Dei. Ileva igitur faciem tuam in caelum. ecce ego, et omnes Sancti mei mecum, qui in hoc seculo magnum habuere certamen, modo gaudent, modo consolantur, modo securi sunt, modo requiescunt, et sine fine mecum in regno Patris mei permanebunt.

XLVIII. DE DIE AETERNITATIS, ET
HUIUS VITAE ANGUSTIIS.

O SUPERNAE civitatis mansio beatissima! ô dies aeternitatis clarissima; quam nox non obscurat, sed summa veritas semper irradiat; dies semper laeta, semper secunda, et numquam statum mutans in contraria! ô utinam dies illa illuxisset, et cuncta haec temporalia finem

accepissent! lucet quidem Sanctis perpetua claritate splendida, sed non nisi a longe, et per speculum, peregrinantibus in terra. Norunt caeli cives, quam gaudiosa sit illa: gemunt exules filii Hevae, quod amara et taediosa sit ista. dies hujus temporis parvi et mali, pleni doloribus et angustiis: ubi homo multis peccatis inquinatur, multis passionibus irretitur, multis timoribus stringitur, multis curis distenditur, multis curiositatibus distrahitur, multis vanitatibus implicatur, multis erroribus circumfunditur, multis laboribus atteritur, tentationibus gravatur, deliciis enervatur, egestate cruciatur. O quando finis horum malorum? quando liberabor a misera servitute vitiorum? quando memorabor, Domine, tui solius? quando ad plenum laetabor in te? quando ero sine omni impedimento in vera libertate, sine omni gravamine mentis et corporis? quando erit pax solida, pax imperturbabilis et secunda, pax intus et foris, pax ex omni parte firma? Iesu bone, quando stabo ad videndum te? quando contemplabor gloriam regni tui? quando eris mihi omnia in omnibus? O quando ero tecum in regno tuo, quod praeparasti dilectis tuis ab aeterno? relictus sum pauper et exulans in terra hostili, ubi bella quotidiana, et infortunia maxima. Consolare exilium meum, mitiga dolorem meum, quia ad te suspirat omne desiderium meum. nam onus mihi totum est,

quidquid hic mundus offert ad solatium. desidero te intime frui, sed nequeo apprehendere. opto inhaerere caelestibus, sed deprimunt res temporales, et immortificatae passionēs. mente omnibus rebus superesse volo, carne autem invite subesse cogor. sic ego homo infelix mecum pugno, et factus sum mihi met ipsi gravis, dum spiritus sursum, et caro quaerit esse deorsum. O quid intus patior, dum mente caelestia tracto, et mox carnalium turba occurrit oranti! Deus meus, ne elongeris a me, neque declines in ira a servo tuo. fulgura coruscationem tuam, et dissipa eas; emitte sagittas tuas, et conturbentur omnes phantasiae inimici. recollige sensus meos ad te: fac me oblivisci omnium mundanorum: da cito abjicere et contemnere phantasmata vitiorum. succurre mihi, aeterna veritas, ut nulla me moveat vanitas. adveni, caelestis suavitas, et fugiat a facie tua omnis impuritas. ignosce quoque mihi, et misericorditer indulge, quoties praeter te aliud in oratione revolve. confiteor etenim vere, quia valde distracte me habere consuevi. nam ibi multoties non sum, ubi corporaliter sto aut sedeo; sed ibi magis sum, quo cogitationibus feror. ibi sum, ubi cogitatio mea est. ibi est frequenter cogitatio mea, ubi est quod amo. hoc mihi cito occurrit, quod naturaliter delectat, aut ex usu placet. Unde tu, veritas, aperte dixisti: ubi enim est thesaurus tuus,

ibi est et cor tuum. si caelum diligo, libenter de caelestibus penso. si mundum amo, mundi felicitatibus congaudeo, et de adversitatibus ejus tristor. si carnem diligo, quae carnis sunt, saepe imaginor. si spiritum amo, de spiritualibus cogitare delector. quaecumque enim diligo, de his libenter loquor, et audio, atque talium imagines mecum ad domum reporto. sed beatus ille homo, qui propter te, Domine, omnibus creaturis licentiam abundi tribuit: qui naturae vim facit, et concupiscentias carnis fervore spiritus crucifigit: ut serenata conscientia puram tibi orationem offerat, dignusque sit angelicis interesse choris, omnibus terrenis foris et intus exclusis.

**XLIX. DE DESIDERIO AETERNAE VITAE:
ET QUANTA SINT CERTANTIBUS
BONA PROMISSA.**

FILI, cum tibi desiderium aeternae beatitudinis desuper infundi sentis, et de tabernaculo corporis exire concupiscis, ut claritatem meam sine vicissitudinis umbra contemplari possis; dilata cor tuum, et omni desiderio hanc sanctam inspirationem suscipe. redde amplissimas supernae bonitati gratias, quae tecum sic dignanter agit, clementer visitat, ardentem excitat, potenter sublevat, ne proprio pondere ad terrena labaris, neque enim

hoc cogitatu tuo aut conatu accipis, sed sola dignatione supernae gratiae et divini respectus: quatenus in virtutibus et majori humilitate proficias, et ad futura certamina te praepares, mihiq; toto cordis affectu adhaerere, ac ferventi voluntate studeas deservire. Fili, saepe ignis ardet, sed sine fumo flamma non ascendit. sic et aliquorum desideria ad caelestia flagrant, et tamen a tentatione carnis affectus liberi non sunt. idcirco nec omnino pure pro honore Dei agunt, quod tam desideranter ab eo petunt. tale est et tuum saepe desiderium, quod insinuasti fore tam importunum. non enim est hoc purum et perfectum, quod propria commoditate est infectum. Pete, non quod tibi est delectabile et commodum, sed quod mihi est acceptabile atque honorificum: quia si recte judicas, meam ordinationem tuo desiderio et omni desiderato praeferre debes, ac sequi. novi desiderium tuum, et frequentes gemitus audiivi. jam velles esse in libertate gloriae filiorum Dei: jam te delectat domus aeterna et caelestis patria gaudio plena: sed nondum venit hora ista: sed est adhuc aliud tempus, scilicet tempus belli, tempus laboris et probationis. optas summo repleti bono: sed non potes hoc assequi modo. ego sum; expecta me (dicit Dominus), donec veniat regnum Dei. Probandus es adhuc in terris, et in multis exercitandus. consolatio tibi interdum dabitur,

sed copiosa satietas non concedetur. confortare igitur, et esto robustus, tam in agendo quam in patiendo naturae contraria. oportet te novum induere hominem, et in alterum virum mutari. oportet te saepe agere, quod non vis; et quod vis, oportet relinquere. quod aliis placet, processum habebit: quod tibi placet, ultra non proficiet. quod alii dicunt, audietur: quod tu dicis, pro nihilo computabitur. petent alii, et accipient: tu petes, nec impetrabis. Erunt alii magni in ore hominum, de te autem tacebitur. aliis hoc vel illud committetur, tu autem ad nihil utile judicaberis. propter hoc natura quandoque contristabitur; et magnum, si silens portaveris. in his et similibus multis, probari solet fidelis Domini servus, qualiter se abnegare, et in omnibus frangere quiverit. vix est aliquid tale, in quo tantumdem mori indiges, sicut videre et pati quae voluntati tuae adversa sunt: maxime autem, cum disconvenientia, et quae minus utilia tibi apparent, fieri jubentur. et quia non audes resistere altiori potestati, sub dominio constitutus; ideo durum tibi videtur, ad nutum alterius ambulare, et omne proprium sentire omittere. Sed pensa, fili, horum fructum laborum, celerem finem, atque praemium nimis magnum: et non habebis inde gravamen, sed fortissimum patientiae tuae solamen. nam et pro modica hac voluntate, quam nunc sponte

deseris, habebis semper voluntatem tuam in caelis. ibi quippe invenies omne quod volueris, omne quod desiderare poteris. ibi aderit tibi totius facultas boni, sine timore amittendi. ibi voluntas tua una semper mecum, nil cupiet extraneum vel privatum. ibi nullus resistet tibi, nemo de te conqueretur, nemo impedit, nihil obviabit; sed cuncta desiderata simul erunt praesentia, totumque affectum tuum reficient, et adimplebunt usque ad summum. ibi reddam gloriam pro contumelia perpeffa; pallium laudis, pro moerore; pro loco novissimo, sedem regni in secula. ibi apparebit fructus obedientiae, gaudebit labor poenitentiae, et humilis subjectio coronabitur gloriose. Nunc ergo inclina te humiliter sub omnium manibus: nec sit tibi curae, quis hoc dixerit vel jusserit. sed hoc magnopere curato, ut sive Praelatus, seu junior, aut aequalis, aliquid a te exposcerit vel innuerit, pro bono totum accipias, et sincera voluntate studeas adimplere. quaeret alius hoc, alius illud: gloriatur ille in illo, et iste in isto, laudeturque millies mille: tu autem nec in isto, nec in illo, sed in tui ipsius gaude contemptu, et in mei solius beneplacito ac honore. hoc optandum est tibi, ut, sive per vitam, sive per mortem, Deus semper in te glorificetur.

**L. QUALITER HOMO DESOLATUS SE DE-
BET IN MANUS DEO OFFERRE.**

Domine Deus, sancte Pater, sis nunc et in aeternum benedictus; quia sicut vis, sic factum est: et quod facis, bonum est. laetetur in te servus tuus, non in se, nec in aliquo alio: quia tu solus laetitia vera, tu spes mea et corona mea, tu gaudium meum et honor meus, Domine. quid habet servus tuus, nisi quod a te accepit, etiam sine merito suo? tua sunt omnia, quae dedisti et quae fecisti. pauper sum, et in laboribus meis a juventute mea: et contristatur anima mea nonnumquam usque ad lacrymas, quandoque etiam conturbatur ad se, propter imminentes passionem. Desidero pacis gaudium, pacem filiorum tuorum flagito, qui in lumine consolationis a te pascuntur: si das pacem, si gaudium sanctum infundis, erit anima servi tui plena modulatione, et devota in laude tua: sed si te subtraxeris, sicut saepissime soles, non poterit currere viam mandatorum tuorum; sed magis ad tundendum pectus genua ejus incurvantur: quia non est illi sicut heri et nudius tertius, quando splendebat lucerna tua super caput ejus, et sub umbra alarum tuarum protegobatur a tentationibus irruentibus. Pater juste et semper laudande, venit hora, ut probetur servus tuus. Pater amande, dignum

est, ut hac hora patiatur pro te aliquid servus tuus. Pater perpetue venerande, venit hora, quam ab aeterno praesciebas affuturam: ut ad modicum tempus succumbat foris servus tuus, vivat vero semper apud te intus: paululum vilipendatur, humilietur, et deficiat coram hominibus, passionibus conteratur et languoribus: ut iterum tecum in aurora novae lucis resurgat, et in caelestibus clarificetur. Pater sancte, tu sic ordinasti, et sic voluisti: et hoc factum est, quod ipse praecepisti. Haec est enim gratia ad amicum tuum, pati et tribulari in mundo pro amore tuo, quotiescumque, et a quocumque, id permiseris fieri. sine consilio et providentia tua, et sine causa, nihil fit in terra. bonum mihi, Domine, quod humiliasti me: ut discam justificationes tuas, et omnes elationes cordis atque praesumptiones abjiciam. utile mihi, quod confusio cooperuit faciem meam: ut te potius, quam homines, ad consolandum requiram. didici etiam ex hoc, inscrutabile iudicium tuum expavescere: qui affligis justum cum impio, sed non sine aequitate et iustitia. Gratias tibi ago, quia non pepercisti malis meis, sed attrivisti me verberibus amaris, infligens dolores, et immittens angustias foris et intus. non est qui me consoletur, ex omnibus quae sub caelo sunt, nisi tu, Domine Deus meus, caelestis medicus animarum: qui percutis et sanas, deducis ad inferos et reducis. disci-

plina tua super me, et virga tua ipsa me docebit. Ecce, Pater dilecte, in manibus tuis sum ego, sub virga correctionis tuae me inclino. percutere dorsum meum, et collum meum, ut incurvem ad voluntatem tuam, tortuositatem meam. fac me pium et humilem discipulum, sicut bene facere consuevisti; ut ambulem ad omnem nutum tuum. tibi me, et omnia mea, ad corrigendum commendo: melius est, hic corripui, quam in futuro. tu scis omnia et singula, et nil te latet in humana conscientia. antequam fiant, nosti ventura; et non opus est tibi, ut quis te doceat, aut admoneat de his quae geruntur in terra. tu scis, quid expedit ad profectum meum, et quantum deservit tribulatio ad rubiginem vitiorum purgandam. fac mecum desideratum beneplacitum tuum, et ne despicias peccaminosam vitam meam, nulli melius, nec clarius, quam tibi soli notam. Da mihi, Domine, scire, quod sciendum est; hoc amare, quod amandum est; hoc laudare, quod tibi summe placet; hoc reputare, quod tibi pretiosum apparet; hoc vituperare, quod oculis tuis fordescit. non me sinas secundum visionem oculorum exteriorum judicare, neque secundum auditum aurium hominum imperitorum sententiare: sed in iudicio vero de visibilibus et spiritualibus discernere, atque super omnia voluntatem beneplaciti tui semper inquirere. Falluntur saepe hominum sensus

in iudicando: falluntur et amatores seculi, visibilia tantummodo amando. quid est homo inde melior, quia reputatur ab homine maior? fallax fallacem, vanus vanum, caecus caecum, infirmus infirmum decipit, dum exaltat: et veraciter magis confundit, dum inaniter laudat. nam quantum unusquisque est in oculis tuis, tantum est, et non amplius, ait humilis sanctus Franciscus.

**LI. QUOD HUMILIBUS INSISTENDUM EST
OPERIBUS, CUM DEFICITUR A
SUMMIS.**

FILI, non vales semper in ferventiori desiderio virtutum stare, nec in altiori gradu contemplationis consistere; sed necesse habes interdum, ob originalem corruptelam, ad inferiora descendere; et onus corruptibilis vitae, etiam invite, et cum taedio, portare. quamdiu mortale corpus geris, taedium senties, et gravamen cordis. oportet ergo saepe in carne de carnis onere gemere: eo quod non vales spiritualibus studiis et divinae contemplationi indefinenter inhacere. Tunc expedit tibi ad humilia et exteriora opera confugere, et in bonis actibus te recreare: adventum meum et supernam visitationem firma confidentia expectare: exilium tuum, et ariditatem mentis patienter sufferre, donec iterum a me visiteris, et ab omnibus anxie.

tatibus libereris. nam faciam te laborum oblivisci, et interna quiete perfrui. expandam coram te prata scripturarum; ut, dilatato corde, currere incipias viam mandatorum meorum. et dices; non sunt condignae passionnes hujus temporis, ad futuram gloriam, quae revelabitur in nobis.

LII. QUOD HOMO NON REPUTET SE CONSOLATIONE DIGNUM, SED MAGIS VERBERIBUS REUM.

DOMINE, non sum dignus consolatione tua, nec aliqua spiritali visitatione: et ideo juste mecum agis, quando me inopem et desolatum relinquis. si enim ad instar maris lacrymas fundere possem, adhuc consolatione tua dignus non essem. unde nihil dignus sum, quam flagellari et puniri: quia graviter et saepe te offendi, et in multis valde deliqui. ergo vera pensata ratione, nec minima sum dignus consolatione. sed tu clemens et misericors Deus, qui non vis petire opera tua, ad ostendendum divitias bonitatis tuae in vasa misericordiae, etiam praeter omne proprium meritum dignaris consolari servum tuum supra humanum modum. tuae enim consolationes, non sunt sicut humanae confabulationes. Quidēgi, Domine, ut mihi conferres aliquam caelestem consolationem? ego nihil boni me egisse recolo, sed semper ad

vitia pronum, et ad emendationem pigrum fuisse. verum est, et negare non possum. si aliter dicerem, tu stares contra me, et non esset qui defenderet. quid merui pro peccatis meis, nisi infernum, et ignem aeternum? in veritate confiteor, quoniam dignus sum omni ludibrio et contemptu, nec decet me inter tuos devotos commemorari. et licet hoc aegre audiam; tamen adversum me, pro veritate, peccata mea arguam, ut facilius misericordiam tuam merear impetrare. * Quid dicam reus, et omni confusione plenus? non habeo os loquendi, nisi hoc tantum verbum: peccavi, Domine, peccavi; miserere mei, ignosce mihi. sine me paululum, ut plangam dolorem meum, antequam vadam ad terram tenebrosam, et opertam mortis caligine. quid tam maxime a reo et misero peccatore requiris, nisi ut conteratur, et humiliet se pro delictis suis? in vera contritione et cordis humiliatione nascitur spes veniae, reconciliatur perturbata conscientia, reparatur gratia perditam, tuetur homo a futura ira; et occurrunt sibi mutuo, in osculo sancto, Deus et poenitens anima. Humilis peccatorum contritio, acceptabile tibi est, Domine, sacrificium; longe suavius odorans in conspectu tuo, quam thuris incensum. haec est gratum etiam unguentum, quod sacris pedibus tuis infundi voluisti: quia cor contritum et humiliatum numquam despexisti. ibi est locus refugii a

facie irae inimici. ibi emendatur et abluitur, quidquid aliunde contractum est et inquinatum.

LIII. QUOD GRATIA DEI NON MISCETUR TERRENA SAPIENTIBUS.

FILI, pretiosa est gratia mea, non patitur se misceri extraneis rebus nec consolationibus terrenis. abjicere ergo oportet omnia impedimenta gratiae, si optas ejus infusionem suscipere. pete secretum tibi, ama solus habitare tecum, nullius require confabulationem; sed magis ad Deum devotam effunde precem, ut compunctam teneas mentem, et puram conscientiam. totum mundum nihil aestima; Dei vacationem omnibus exterioribus antepone. non enim poteris mihi vacare, et in transitoriis pariter delectari. a notis et a caris oportet elongari, et ab omni temporali solatio mentem tenere privatam. sic obsecrat B. Apostolus Petrus, ut tamquam advenas et peregrinos in hoc mundo se contineant Christi fideles. O quanta fiducia erit morituro, quem nullius rei affectus detinet in mundo! sed sic segregatum cor habere ab omnibus, aeger necdum capit animus; nec animalis homo novit interni hominis libertatem. at tamen si vere velit esse spiritualis, oportet eum renuntiare tam remotis quam propinquis; et a nemine magis cavere, quam a se

ipso. si temet ipsum perfecte viceris, cetera facilius subjugabis. perfecta victoria est, de semet ipso triumphare. qui enim semetipsum subiectum tenet, ut sensualitas rationi, et ratio in cunctis obediat mihi; hic vere victor est sui, et dominus mundi. Si ad hunc apicem scandere gliscis, oportet viriliter incipere, et securim ad radicem ponere, ut evellas et destruas occultam inordinatam inclinationem ad te ipsum, et ad omne privatum et materiale bonum. ex hoc vitio, quod homo semet ipsum nimis inordinate diligit, pene totum pendet, quidquid radicaliter vincendum est: quo devicto et subacto malo, pax magna et tranquillitas erit continuo. sed quia pauci sibi ipsis perfecte mori laborant, nec plene extra se tendunt, propterea in se implicati remanent, nec supra se in spiritu elevari possunt. qui autem libere mecum ambulare desiderat, necesse est, ut omnes pravas et inordinatas affectiones suas mortificet, atque nulli creaturae, privato amore, concupiscenter inhaereat.

LIV. DE DIVERSIS MOTIBUS NATURAE ET GRATIAE.

FILI, diligenter adverte motus naturae et gratiae, quia valde contrarie et subtiliter moventur: et vix, nisi a spiritali et intimo illuminato homine, discernuntur. omnes qui-

dem bonum appetunt, et aliquid boni in suis dictis vel factis praetendunt; ideo sub specie boni multi falluntur. Natura callida est, et multos trahit, illaqueat, et decipit, et se semper pro fine habet: sed Gratia simpliciter ambulat, ab omni specie mala declinat, fallacias non praetendit, et omnia pure propter Deum agit, in quo et finaliter requiescit. Natura invite vult mori, nec premi, nec superari, nec subesse, nec sponte subjugari: Gratia vero studet mortificationi propriae, resistit sensualitati, quaerit subjici, appetit vinci, nec propria vult libertate fungi; sub disciplina amat teneri, nec alicui cupit dominari, sed sub Deo semper vivere, stare, et esse; atque propter Deum omni humanae creaturae humiliter parata est inclinari. Natura pro suo commodo laborat; et quid lucri ex alio sibi proveniat, attendit: Gratia autem, non quid sibi utile et commodum sit, sed quod multis proficiat, magis considerat. Natura libenter honorem et reverentiam accipit: Gratia vero omnem honorem et gloriam Deo fideliter attribuit. Natura confusionem timet et contemptum: Gratia autem gaudet pro nomine Iesu pati contumeliam. Natura otium amat et quietem corporalem: Gratia vero vacua esse non potest, sed libenter amplectitur laborem. Natura quaerit habere curiosa et pulchra, abhorret vilia et grossa: Gratia vero simplicibus delectatur et humilibus, aspera non

aspernatur, nec vetustis refugit indui pannis. Natura respicit temporalia, gaudet ad lucra terrena, tristatur de damno, irritatur levi injuriae verbo: sed Gratia attendit aeterna, non inhaeret temporalibus, nec in perditione rerum turbatur, neque verbis durioribus acerbatur; quia thesaurum suum et gaudium in caelo, ubi nil perit, constituit. Natura cupida est, et libentius accipit quam donat, amat propria et privata: Gratia autem pia est et communis, vitat singularia, contentatur paucis, beatius dare judicat, quam accipere. Natura inclinatur ad creaturas, ad carnem propriam, ad vanitates et discursus: sed Gratia trahit ad Deum et ad virtutes, renuntiat creaturis, fugit mundum, odit carnis desideria, restringit evagationes, erubescit in publico apparere. Natura libenter aliquod solatium habet externum, in quo delectetur ad sensum: sed Gratia in solo Deo quaerit consolari, et in summo bono super omnia visibilia delectari. Natura totum agit propter lucrum et commodum proprium, nihil gratis facere potest, sed aut aequale, aut melius, aut laudem, vel favorem, pro benefactis consequi sperat; et multum ponderari sua gesta et dona concupiscit: Gratia vero nil temporale quaerit; nec aliud praemium, quam Deum solum pro mercede postulat; nec amplius de temporalibus necessariis desiderat, nisi quantum haec sibi ad affecutionem aeternorum valeant de-

servire. Natura gaudet de amicis multis et propinquis, gloriatur de nobili loco, et ortu generis; arridet potentibus, blanditur divitibus, applaudit sibi similibus: Gratia autem et inimicos diligit, nec de amicorum turba extollitur, nec locum, nec ortum natalium reputat, nisi virtus major ibi fuerit; favet magis pauperi quam diviti, compatitur plus innocenti quam potenti; congaudet veraci, non fallaci; exhortatur semper bonos meliora charismata aemulari, et Filio Dei per virtutes assimilari. Natura de defectu et molestia cito conqueritur: Gratia constanter fert inopiam. Natura omnia ad se reflectit, pro se certat et arguit: Gratia autem ad Deum cuncta reducit, unde originaliter emanant: nihil boni sibi adscribit, nec arroganter praesumit; non contendit, nec suam sententiam aliis praefert; sed in omni sensu et intellectu, aeternae sapientiae ac divino examini se submittit. natura appetit scire secreta, et nova audire; vult exterius apparere, et multa per sensus experiri; desiderat agnosci, et agere unde laus et admiratio procedit: sed Gratia non curat nova nec curiosa percipere; quia totum hoc de vetustate corruptionis est ortum, cum nihil novum et durable sit super terram. docet itaque sensus restringere, vanam complacentiam et ostentationem devitare, laudanda et digne miranda humiliter abscondere, et de omni re, et in omni scientia, utilitatis fructum, atque Dei laudem et ho-

norem quaerere. non vult se nec sua praedicari, sed Deum in donis suis optat benedici, qui cuncta ex mera caritate largitur. Haec Gratia supernaturale lumen, et quoddam Dei speciale donum est, et proprie electorum signaculum, et pignus salutis aeternae: quae hominem de terrenis ad caelestia amanda sustollit, et de carnali spiritualem efficit. quanto igitur Natura amplius premitur et vincitur, tanto major Gratia infunditur; et quotidie novis visitationibus interior homo, secundum imaginem Dei, reformatur.

LV. DE CORRUPTIONE NATURAE, ET
EFFICACIA GRATIAE DIVINAE.

DOMINE Deus meus, qui me creasti ad imaginem et similitudinem tuam, concede mihi hanc gratiam, quam ostendisti tam magnam, et necessariam ad salutem, ut vincam pessimam naturam meam, trahentem ad peccata, et in perditionem. sentio enim in carne mea legem peccati, contradicentem legi mentis meae, et captivum me ducentem ad obediendum sensualitati in multis: nec possum resistere passionibus ejus, nisi assistat tua sanctissima gratia, cordi meo ardentem infusa. Opus est gratia tua, et magna gratia, ut vincatur natura, ad malum semper prona ab adolescentia sua: nam per primum hominem Adam lapsa, et vitiata per peccatum, in omnes

homines poena hujus maculae descendit: ut ipsa natura, quae bene et recta a te condita fuit, pro vitio jam et infirmitate corruptae naturae ponatur, eo quod motus ejus sibi relictus, ad malum et inferiora trahit. nam modica vis, quae remansit, est tamquam scintilla quaedam latens in cinere. haec est ipsa ratio naturalis, circumfusa magna caligine, adhuc judicium habens boni et mali, veri falsique distantiam, licet impotens sit adimplere omne quod approbat, nec pleno jam lumine veritatis, nec sanitate affectionum suarum, potiatur. Hinc est, Deus meus, quod condelector legi tuae secundum interiorem hominem, sciens mandatum tuum fore bonum, justum et sanctum, arguens etiam omne malum, et peccatum fugiendum. carne autem servo legi peccati, dum magis sensualitati obedio, quam rationi: quod velle bonum mihi adjacet, perficere autem non invenio. hinc saepe multa bona propono, sed quia gratia deest ad adjuvandum infirmitatem meam, ex levi resistantia resilio et deficio. hinc accidit, quod viam perfectionis agnosco, et qualiter agere debeam, clare satis video; sed propriae corruptionis pondere pressus, ad perfectiora non assurgo. O quam maxime est mihi necessaria, Domine, tua gratia, ad inchoandum bonum, ad proficiendum, et ad perficiendum! nam sine ea nihil possum facere: omnia autem possum in te, confortante me gratia. O vere

cacelsis gratia, sine qua nulla sunt propria merita, nulla quoque dona naturae ponderanda! nihil artes, nihil divitiae, nihil pulcritudo vel fortitudo, nihil ingenium vel eloquentia; valent apud te, Domine, sine gratia. nam dona naturae, bonis et malis sunt communia: electorum autem proprium donum est gratia sive dilectio; qua insigniti, digni habentur vita aeterna. tantum eminet haec gratia, ut nec donum prophetiae, nec signorum operatio, nec quantalibet alta speculatio, aliquid aestimentur sine ea. sed neque fides, neque spes, neque aliae virtutes, tibi acceptae sunt sine caritate et gratia. O beatissima gratia, quae pauperem spiritu, virtutibus divitem facis; et divitem multis bonis, humilem corde reddis! veni, descende ad me, reple me mane consolatione tua, ne deficiat praefatitudine et ariditate mentis anima mea. obsecro, Domine, ut inveniam gratiam in oculis tuis: sufficit enim mihi gratia tua, ceteris non obtentis, quae desiderat natura. si fuero tentatus et vexatus tribulationibus multis, non timebo mala, dum mecum fuerit gratia tua. ipsa fortitudo mea, ipsa consilium confert et auxilium. cunctis hostibus potentior est, et sapientior universis sapientibus. Magistra est veritatis, doctrix disciplinae, lumen cordis, solamen pressurae, fugatrix tristitiae, ablatrice timoris, nutrix devotionis, productrix lacrymarum. quid sum sine ea,

nisi aridum lignum, et stipes inutilis ad ejiciendum? tua ergo me, Domine, gratia semper et praeveniat et sequatur, ac bonis operibus jugiter praestet esse intentum, per Iesum Christum Filium tuum. amen.

LVI. QUOD NOS IPSOS ABNEGARE, ET
CHRISTUM IMITARI DEBEMUS
PER CRUCEM.

FILI, quantum a te vales exire, tantum in me poteris transire. sicut nihil foris concupiscere, internam pacem facit; sic se interius relinquere, Deo conjungit. volo te addiscere perfectam abnegationem tui in voluntate mea, sine contradictione et querela. sequere me: ego sum via, veritas, et vita. sine via, non itur; sine veritate, non cognoscitur; sine vita, non vivitur. ego sum via, quam sequi debes; veritas, cui credere debes; vita, quam sperare debes. ego sum via inviolabilis, veritas infallibilis, vita interminabilis. ego sum via rectissima, veritas suprema, vita vera, vita beata, vita increata. si manseris in via mea, cognosces veritatem; et veritas liberabit te, et apprehendes vitam aeternam. si vis ad vitam ingredi, serva mandata. si vis veritatem cognoscere; crede mihi. si vis perfectus esse, vende omnia. si vis esse discipulus meus, abnega temet ipsum. si vis beatam vitam possidere, praesentem vitam contemne.

si vis exaltari in caelo, humilia te in mundo.
 si vis regnare mecum, porta crucem mecum.
 soli enim servi crucis inveniunt viam beati-
 tudinis, et verae lucis. Domine Iesu, quia
 arcta erat vita tua, et mundo despecta, dona
 mihi te cum mundi despectu imitari. non e-
 nim major est servus domino suo, nec disci-
 pulus supra magistrum. exerceatur servus
 tuus in vita tua, quia ibi est salus mea, et
 sanctitas vera. quidquid extra eam lego, vel
 audio, non me recreat, nec delectat plene.
 Fili, quia haec scis, et legisti omnia; beatus
 eris, si feceris ea. qui habet mandata mea, et
 servat ea, ipse est qui diligit me; et ego di-
 ligam eum, et manifestabo ei me ipsum; et
 faciam eum confedere mecum in regno Pa-
 tris mei. Domine Iesu, sicut dixisti et pro-
 misisti, sic utique fiat, et mihi promereri con-
 tingat. suscepi, suscepi de manu tua crucem;
 portabo, et portabo eam usque ad mortem, si-
 cut imposuisti mihi. vere, vita boni mona-
 chi, crux est, sed dux paradisi. inceptum est,
 retro abire non licet, nec relinquere oportet.
 Eia, fratres, pergamus simul, Iesus erit no-
 biscum. propter Iesum suscepimus hanc cru-
 cem: propter Iesum perseveremus in cruce.
 erit adiutor noster, qui est dux noster, et prae-
 cessor. en rex noster ingreditur ante nos, qui
 pugnabit pro nobis. sequamur viriliter, ne-
 mo metuat terrores; simus parati mori forti-

ter in bello, nec inferamus crimen gloriae nostrae, ut fugiamus a cruce.

LVII. QUOD HOMO NON SIT NIMIS DE-
JECTUS, QUANDO IN ALIQUOS
LABITUR DEFECTUS.

FILI, magis placent mihi patientia et humilitas in adversis, quam multa consolatio et devotio in prosperis. ut quid te contristat parvum factum contra te dictum? si amplius fuisset, commoveri non debuisses. sed nunc permitte transire; non est primum, nec novum; nec ultimum erit, si diu vixeris. satis virilis es, quamdiu nil obviat adversi. bene etiam consulis, et alios nosti roborare verbis; sed cum ad januam tuam venit repentina tribulatio, deficis consilio et robore. attende magnam fragilitatem tuam, quam saepius experiris in modicis objectis: tamen pro salute tua ista fiunt, cum haec et similia contingunt. Pone, ut melius nosti, ex corde: et si te tetigit, non tamen dejiciat, nec diu implicet. ad minus sustine patienter, si non potes gaudenter. etiam si minus libenter audis, et indignationem sentis, reprime te, nec patiaris aliquid inordinatum ex ore tuo exire, unde parvuli scandalizentur. cito conquiescet commotio excitata, et dolor internus reverte dulcorabitur gratia. adhuc vivo ego (dicit Dominus) juvare te paratus, et solito

amplius consolari; si confusus fueris mihi, et devote invocaveris. Animae aequior esto, et ad maiorem sustentiam accingere. non est totum frustratum, si te saepius percipis tribulatum, vel graviter tentatum. homo es, et non Deus: caro es, non Angelus. quomodo tu posses semper in eodem statu virtutis permanere, quando hoc defuit angelo in caelo, et primo homini in paradiso? ego sum qui moerentes erigo sospitate: et suam cognoscentes infirmitatem, ad meam proveho divinitatem. Domine, benedictum sit verbum tuum, dulce super mel et favum ori meo. quid facerem in tantis tribulationibus et angustis meis, nisi me confortares tuis sanctis sermonibus? dummodo tandem ad portum salutis perveniam, quid curae est, quae et quanta passus fuero? da finem bonum: da felicem ex hoc mundo transitum. memento mei, Deus meus, et dirige me recto in itinere in regnum tuum. amen.

LVIII. DE ALTIORIBUS REBUS ET OCCULTIS JUDICIIS DEI NON SCRUTANDIS.

FILI, caveas disputare de altis materiis, et de occultis Dei judiciis: cur iste sic relinquitur, et ille ad tantam gratiam assumitur: cur etiam iste tantum affligitur, et ille tam eximie exaltatur. ista omnem humanam fa-

cultatem excedunt: nec ad investigandum
 judicium divinum, ulla ratio praevalet, vel
 disputatio. quando ergo haec tibi suggerit ini-
 micus, vel etiam quidam curiosi inquirunt
 homines, responde illud Prophetæ: justus
 es, Domine, et rectum judicium tuum; et il-
 lud; judicia Domini vera, justificata in se-
 met ipsa. judicia mea metuenda sunt, non
 discutienda; quia humano intellectui sunt in-
 comprehensibilia. Noli etiam inquirere, nec
 disputare de meritis Sanctorum, quis alio sit
 sanctior, aut quis major fuerit in regno celo-
 rum. talia generant saepe lites et contentio-
 nes inutiles: nutriunt quoque superbiam et
 vanam gloriam: unde oriuntur invidiae et
 dissensiones, dum iste illum Sanctum, et alius
 alium conatur superbe praeferre. talia autem
 velle scire et investigare, nullum fructum af-
 ferunt, sed magis Sanctis displicent: quia non
 sum Deus dissensionis, sed pacis; quae pax
 magis in humilitate vera, quam in propria
 exaltatione consistit. Quidam zelo dilectio-
 nis trahuntur ad hos vel ad illos ampliori af-
 fectu, sed humano potius quam divino. ego
 sum qui cunctos condidi Sanctos; ego do-
 navi gratiam, ego praestiti gloriam. ego no-
 vi singulorum merita; ego praeveni eos in
 benedictionibus dulcedinis meae. ego prae-
 scivi dilectos ante secula; ego eos elegi de
 mundo, non ipsi me praelegerunt. ego vo-
 cavi per gratiam, attraxi per misericordiam.

ego perduxī eos per tentationes varias. ego infudi consolationes magnificas, ego dedi perseverantiam, ego coronavi eorum patientiam. Ego primum et novissimum agnosco : ego omnes inaeſtimabili dilectione amplector. ego laudandus sum in omnibus Sanctis meis ; ego super omnia benedicendus sum, et honorandus in singulis, quos sic gloriose magnificavi et praedestinavi, sine ullis praecedentibus propriis meritis. qui ergo unum de minimis meis contempserit, nec magnum honorat ; quia pusillum et magnum ego feci. et qui derogat alicui Sanctorum, derogat et mihi, et ceteris omnibus in regno caelorum. omnes unum sunt per caritatis vinculum : idem sentiunt, idem volunt, et omnes in unum se diligunt. Adhuc autem (quod multo altius est) plus me, quam se et sua merita, diligunt. nam supra se rapti, et extra propriam dilectionem tracti, toti in amorem mei pergunt, in quo et fruitive quiescunt. nihil est, quod eos avertere possit aut deprimere : quippe qui aeterna veritate pleni, igne ardeſcunt inextinguibilis caritatis. taceant igitur carnales et animales homines de Sanctorum statu differere, qui non norunt nisi privata gaudia diligere. demunt et addunt, pro sua inclinatione, non prout placet aeternae veritati. In multis est ignorantia ; eorum maxime, qui parum illuminati, raro aliquem perfecta dilectione spiritali diligere norant.

multum adhuc naturali affectu, et humana amicitia, ad hos vel ad illos trahuntur: et sicut in inferioribus se habent, ita et de caelestibus imaginantur. sed est distantia incomparabilis, quae imperfecti cogitant, et quae illuminati viri per revelationem supernam speculantur. Cave ergo, fili, de istis curiose tractare, quae tuam scientiam excedunt: sed hoc magis satage et intende, ut vel minimus in regno Dei queas inveniri. et si quispiam sciret, quis alio sanctior esset, vel major haberetur in regno caelorum: quid ei haec notitia prodesset, nisi se ex hac cogitatione coram me humiliaret, et in maiorem nominis mei laudem exurgeret? multo acceptius Deo facit, qui de peccatorum suorum magnitudine, et virtutum suarum parvitate cogitat, et quam longe a perfectione Sanctorum distat: quam is, qui de eorum majoritate vel parvitate disputat. melius est, Sanctos devotis precibus et lacrymis exorare, et eorum gloriosa suffragia humili mente implorare, quam eorum secreta vana inquisitione perscrutari. Illi bene et optime contentantur; si homines scirent contentari, et vaniloquia sua compescere. non gloriantur de propriis meritis, quippe qui sibi nihil bonitatis adscribunt, sed totum mihi, quoniam ipsis cuncta ex infinita caritate mea donavi. tanto amore divinitatis, et gaudio superfluenti replentur; ut nihil eis desit gloriae, nihilque possit deesse felicitatis.

omnes Sancti, quanto altiores in gloria, tanto humiliores in se ipsis, et mihi viciniore et dilectiores existunt. ideoque habes scriptum: quia mittebant coronas suas ante Deum, et ceciderunt in facies suas coram Agno, et adoraverunt viventem in secula seculorum. Multi quaerunt, quis major sit in regno Dei; qui ignorant, an cum minimis erunt digni computari. magnum est, vel minimum esse in caelo, ubi omnes magni sunt: quia omnes filii Dei vocabuntur et erunt. minimus erit in mille, et peccator centum annorum morietur. cum enim quaererent discipuli, quis major esset in regno caelorum; tale audierunt responsum: nisi conversi fueritis, et efficiamini sicut parvuli, non intrabitis in regnum caelorum. quicumque ergo humiliaverit se, sicut parvulus iste, hic major est in regno caelorum. Vae eis, qui cum parvulis humiliare se sponte dedignantur: quoniam humilis janua regni caelestis, eos non admittet intrare. vae etiam divitibus, qui habent hic consolationes suas: quia pauperibus intrantibus in regnum Dei, ipsi stabunt foris ejulantes: gaudete humiles, et exultate pauperes, quia vestrum est regnum Dei; si tamen in veritate ambulatis.

LIX. QUOD OMNIS SPES ET FIDUCIA IN SOLO DEO EST FIDENDA.

DOMINE, quae est fiducia mea, quam in hac vita habeo? aut quod majus solatium meum, ex omnibus apparentibus sub caelo? nonne tu, Domine Deus meus, cujus misericordiae non est numerus? ubi mihi bene fuit sine te? aut quando male esse potuit praesente te? malo pauper esse propter te, quam dives sine te. eligo potius tecum in terra peregrinari, quam sine te caelum possidere. ubi tu, ibi caelum: atque ibi mors et infernus, ubi tu non es. tu mihi in desiderio es: et ideo post te gemere, clamare et exorare necesse est. in nullo denique possum plene confidere, qui in necessitatibus auxiliatur opportunius, nisi in te solo Deo meo. tu es spes mea, tu fiducia mea; tu consolator meus, et fidelissimus in omnibus. Omnes, quae sua sunt, quacrunt: tu salutem meam, et profectum meum, solummodo praetendis, et omnia in bonum mihi convertis. etiam si variis tentationibus et adversitatibus exponas, hoc totum ad utilitatem meam ordinas, qui mille dilectos tuos probare consuevisti. in qua probatione non minus diligere debes et laudari, quam si cae-

lestibus consolationibus me repleres. In te
 ergo, Domine Deus, pono totam spem meam
 et refugium: in te omnem tribulationem
 et angustiam meam constituo; quia totum
 infirmum et instabile invenio, quidquid ex-
 tra te conspicio. non enim proderunt mul-
 ti amici, neque fortes auxiliarii adjuvare po-
 terunt, nec prudentes consilarii responsum
 utile dare, neque libri doctorum consolari,
 nec aliqua pretiosa substantia liberare, nec
 locus aliquis secretus et amoenus contuta-
 ri; si tu ipse non assistas, juves, confortes,
 consolaberis, instruas, et custodias. Omnia
 namque, quae ad pacem videntur esse, et
 felicitatem habendam, te absente nihil sunt,
 nihilque felicitatis in veritate conferunt.
 finis ergo omnium bonorum, et altitudo vi-
 tae, et profunditas eloquiorum tu es: et in
 te super omnia sperare, fortissimum solati-
 um servorum tuorum. ad te sunt oculi
 mei, in te confido, Deus meus, misericordi-
 arum Pater. benedic et sanctifica animam
 meam benedictione caelesti, ut fiat habita-
 tio sancta tua, et sedes aeternae gloriae
 tuae, nihilque in templo tuae dignitatis in-
 veniatur, quod oculos tuae majestatis offen-
 dat. secundum magnitudinem bonitatis tuae,
 et multitudinem miserationum tuarum, re-
 spice in me, et exaudi orationem paupe-
 ris servi tui, longe exulantis in regione
 umbrac mortis. protege et conserva animam

servuli tui, inter tot discrimina vitae incorruptibilis; ac comitante gratia tua, dirige per viam pacis, ad patriam perpetuae claritatis, amen.

EXPLICIT LIBER DE INTERNA CON-
SOLATIONE.

D E
 IMITATIONE
 CHRISTI
 LIBER QUARTUS.

DE SACRAMENTO.

DEVOTA EXHORTATIO AD SACRAM
 COMMUNIONEM.

V O X C H R I S T I.

VENITE ad me omnes qui laboratis et onerati estis, et ego reficiam vos, dicit Dominus. panis, quem ego dabo, caro mea est, pro mundi vita. accipite et comedite, hoc est Corpus meum, quod pro vobis tradetur: hoc facite in meam commemorationem. qui manducat meam carnem, et bibit meum sanguinem, in me manet, et ego in illo. verba, quae ego locutus sum vobis, spiritus et vita sunt.

CAPUT I.

CUM QUANTA REVERENTIA CHRISTUS
SIT SUSCIPENDUS.

V O X D I S C I P U L I.

HÆC sunt verba tua, Christi veritas æterna, quamvis non uno tempore prolata, nec uno in loco conscripta. quia ergo tua sunt, et vera, gratanter mihi et fideliter cuncta sunt accipienda. tua sunt, et tu ea protulisti: et mea quoque sunt, quia pro salute mea ea edidisti. libenter suscipio ea ex ore tuo, ut arctius inserantur cordi meo. excitant me verba tantæ pietatis, plena dulcedinis et dilectionis: sed terrent me delicta propria, et ad capienda tanta mysteria, me reverberat impura conscientia. provocat me dulcedo verborum tuorum, sed onerat multitudo vitiorum. Jubes, ut fiducialiter ad te accedam, si tecum velim habere partem: et ut immortalitatis accipiam alimoniam, si æternam cupiam obtinere vitam et gloriam. Venite, inquis, ad me omnes qui laboratis et onerati estis, et ego reficiam vos. Ô dulce et amicabile verbum in aure peccatoris, quod tu, Domine Deus meus, egenum et pauperem invitas ad Communionem tui sanctissimi Corporis! sed quis ego sum, Domine, ut ad

te praesumam accedere? ecce, caeli caelorum te non capiunt; et tu dicis, Venite ad me omnes. Quid sibi vult ista piissima dignatio, et tam amicabilis invitatio? quomodo ausus ero venire, qui nihil boni mihi conscius sum, unde possim praesumere? quomodo te introducā in domum meam, qui saepius offendi benignissimam faciem tuam? reverentur Angeli et Archangeli, metuunt sancti et iusti: et tu dicis, Venite ad me omnes! nisi tu, Domine, hoc diceres, quis verum esse crederet? et nisi tu juberet, quis accedere attentaret? Ecce, Noë, vir iustus, in arcae fabrica centum annis laboravit, ut cum paucis salvaretur: et ego quomodo me potero una hora praeparare, ut mundi fabricatorem cum reverentia sumam? Moyse, famulus tuus magnus, et specialis amicus tuus, arcam ex lignis imputribilibus fecit, quam et mundissimo vestivit auro, ut tabulas Legis in ea reponeret: et ego putrida creatura, audebo te conditorem legis, ac vitae datorem, tam facile suscipere? Salomon, sapientissimus Regum Israël, templum magnificum septem annis in laudem nominis tui aedificavit: et octo diebus festum dedicationis ejus celebravit: mille hostias pacificas obtulit: et Arcam foederis, in clangore buccinae, et jubilo, in locum sibi praeparatum, solenniter collocavit. et ego infelix et pauperrimus hominum, quomodo te in domum meam introducā, qui vix mediam expen-

dere devote novi horam? et utinam vel semel digne fere mediam! O mi Deus, quantum illi, ad placendum tibi, agere studuerunt! heu, quam pusillum est quod ago! quam breve expleo tempus, cum me ad communicandum dispono! raro totus collectus, rarissime ab omni distractione purgatus. et certe in tua salutari Deitatis praesentia, nulla deberet occurrere indecens cogitatio, nulla etiam occupare creatura: quia non Angelum, sed Angelorum Dominum, suscepturus sum hospitio. Est tamen valde magna distantia inter Arcam foederis cum suis reliquiis, et mundissimum Corpus tuum cum suis ineffabilibus virtutibus; inter legalia illa sacrificia, futurorum praefigurativa, et veram Corporis tui hostiam, omnium antiquorum sacrificiorum completivam. Quare igitur non magis ad tuam venerabilem inardesco praesentiam? cur non majori me praeparo sollicitudine ad tua sancta sumenda: quando illi antiqui sancti Patriarchae et Prophetae, Reges quoque et Principes, cum universo populo, tantum devotionis demonstrarunt affectum erga cultum divinum? Saltavit devotissimus Rex David coram Arca Dei totis viribus, recolens beneficia olim indulta Patribus: fecit diversi generis organa, Psalmos edidit, et cantari instituit cum laetitia, cecinit et ipse frequenter in cithara, Spiritus sancti afflatus gratia; docuit populum Israël toto corde Deum laudare, et

ore consono diebus singulis benedicere et praedicare. si tanta agebatur tunc devotio, ac divinae laudis exstitit recordatio, coram Arca testamenti; quanta nunc mihi, et omni populo Christiano, habenda est reverentia et devotio in praesentia Sacramenti, in sumptione excellentissimi Corporis Christi! Currunt multi ad diversa loca, pro visitandis reliquiis Sanctorum: et mirantur auditis gestis eorum, ampla aedificia templorum inspiciunt, et osculantur sericis et auro involuta sacra ossa ipsorum. et ecce, tu praesens es hic apud me in altari, Deus meus, Sanctus sanctorum, creator hominum, et Dominus Angelorum. saepe in talibus videndis curiositas est hominum, et novitas invisorum, et modicus reportatur emendationis fructus, maxime ubi est tam levis, sine vera contritione, discursus. hic autem in Sacramento altaris totus praesens es, Deus meus, homo Christus Iesus: ubi et copiosus percipitur aeternae salutis fructus, quotiescumque fueris digne ac devote susceptus. ad istud vero non trahit levitas aliqua, nec curiositas, aut sensualitas; sed firma fides, devota spes, et sincera caritas. O invisibilis conditor mundi Deus, quam mirabiliter agis nobiscum! quam suaviter et gratiose cum electis tuis disponis, quibus temet ipsum in Sacramento sumendum proponis! hoc namque omnem intellectum superat: hoc specialiter devotorum corda trahit, et

accendit affectum. ipsi enim veri fideles tui, qui totam vitam suam ad emendationem disponunt, ex hoc dignissimo Sacramento magnam devotionis gratiam, et virtutis amorem, frequenter recipiunt. O admirabilis et abscondita gratia Sacramenti! quam norunt tantum Christi fideles: infideles autem, et peccatis fervientes, experiri non possunt. in hoc Sacramento confertur spiritualis gratia, et reparatur in anima virtus amissa: et per peccatum deformata, redit pulcritudo. tanta est aliquando haec gratia, ut ex plenitudine collatae devotionis, non tantum mens, sed et debile corpus, vires sibi praestitas sentiat ampliores. Dolendum tamen valde et miserandum super tepiditate et negligentia nostra, quod non majori affectione trahimur ad Christum sumendum: in quo tota spes salvandorum consistit, et meritum. ipse enim est sanctificatio nostra, et redemptio: ipse consolatio viatorum, et Sanctorum aeterna fruitio. dolendum itaque valde, quod multi tam parum hoc salutare mysterium advertunt, quod caelum laetificat, et mundum conservat universum. heu caecitas, et duritia cordis humani, tam ineffabile donum non magis attendere, et ex quotidiano usu etiam ad inadvertentiam defluere! Si enim hoc sanctissimum Sacramentum in uno tantum celebraretur loco, et ab uno tantum consecraretur sacerdote in mundo; quanto putas desi-

derio ad illum locum, et ad talem Dei sacerdotem homines afficerentur, ut divina mysteria celebrari viderent? nunc autem multi facti sunt sacerdotes, et in multis locis offertur Christus; ut tanto major appareat gratia, et dilectio Dei ad hominem, quanto latius est sacra Communio diffusa per orbem. gratias tibi, Iesu bone, pastor aeternae, qui nos pauperes et exules dignatus es pretioso Corpore et Sanguine tuo reficere: et ad haec mysteria percipienda, etiam proprii oris tui alloquio invitare, dicendo; Venite ad me omnes qui laboratis et onerati estis, et ego reficiam vos.

II. QUOD MAGNA BONITAS ET CARITAS DEI IN SACRAMENTO HOMINI EXHIBETUR.

VOX DISCIPULI.

SUPER bonitate tua et magna misericordia tua, Domine, confusus, accedo aeger ad Salvatorem, esuriens et sitiens ad fontem vitae, egenus ad Regem caeli, servus ad Dominum, creatura ad Creatorem, desolatus ad meum pium consolatorem. sed unde hoc mihi, ut venias ad me? quid ego sum, ut praestes mihi te ipsum? quomodo audet peccator coram te apparere? et tu quomodo dignaris ad peccatorem venire? tu nosti servum

tuum, et scis, quia nil boni in se habet, unde
 hoc illi praestes. confiteor igitur vilitatem
 meam, agnosco tuam bonitatem, laudo pie-
 tatem, et gratias ago propter nimiam cari-
 tatem. propter temet ipsum enim hoc fa-
 cis, non propter mea merita; ut bonitas tua
 mihi magis innotescat, caritas amplior ingera-
 tur, et humilitas perfectius commendetur.
 quia ergo tibi hoc placet, et tu sic fieri iussisti,
 placet et mihi dignatio tua; et utinam ini-
 quitas mea non obsistat! O dulcissime et
 benignissime Iesu! quanta tibi reverentia et
 gratiarum actio cum perpetua laude, pro sus-
 ceptione sacri Corporis tui debetur, cujus
 dignitatem nullus hominum explicare potens
 invenitur? sed quid cogitabo in hac Commu-
 nione, in accessu ad Dominum meum, quem
 debite venerari nequeo, et tamen devote sus-
 cipere desidero? quid cogitabo melius et fa-
 lubrius, nisi me ipsum totaliter humiliando
 coram te, et tuam infinitam bonitatem exal-
 tando supra me? laudo te, Deus meus, et ex-
 alto in aeternum. despicio me, et subjicio
 tibi, in profundum vilitatis meae. Ecce, tu
 Sanctus sanctorum, et ego sordes peccatorum,
 ecce tu inclinas te ad me, qui non sum dig-
 nus ad te respicere. ecce tu venis ad me, tu
 vis esse mecum, tu invitas ad convivium tuum.
 tu mihi dare vis caelestem cibum, et panem
 Angelorum, ad manducandum; non alium
 sane, quam te ipsum; panem vivum, qui de

caelo descendisti, et das vitam mundo. Ecce, unde dilectio procedit; qualis dignatio illucescit! quam magnae gratiarum actiones et laudes tibi pro his debentur! ô quam salutare et utile consilium tuum, cum istud instituisti! quam suave et jucundum convivium, cum te ipsum in cibum donasti! ô quam admirabilis operatio tua, Domine! quam potens virtus tua! quam ineffabilis veritas tua! dixisti enim, et facta sunt omnia: et hoc factum est, quod ipse iussisti. Mira res, et fide digna, ac humanum vincens intellectum! quod tu, Domine Deus meus, verus Deus et homo, sub modica specie panis et vini integer contineris, et sine consumptione a fumente manducaris. tu, Domine universorum, qui nullius habes indigentiam, voluisti per Sacramentum tuum habitare in nobis: conserva cor meum et corpus immaculatum; ut laeta et pura conscientia saepius tua valeam celebrare mysteria, et ad meam perpetuam accipere salutem; quae ad tuum praecipue honorem, et memoriale perenne, sanxisti et instituisti. Lactare, anima mea, et gratias age Deo, pro tam nobili munere et solatio singulari, in hac lacrymarum valle tibi relicto. nam quoties hoc mysterium recolis, et Christi Corpus accipis; toties tuae redemptionis opus agis, et participes omnium meritorum Christi efficeris. caritas etenim Christi numquam minuitur, et magnitudo propitiationis ejus numquam ex-

hauritur, ideo nova semper mentis renovatione ad hoc disponere te debes, et magnum salutis mysterium attenta consideratione pensare. ita magnum, novum, et jucundum, tibi videri debet, cum celebras, aut Missam audis; ac si eodem die Christus primum in uterum Virginis descendens, homo factus esset; aut in cruce pendens, pro salute hominum pateretur et moreretur.

III. QUOD UTILE SIT SAEPE COMMUNICARE.

VOX DISCIPULI.

Ecce, ego ad te venio, Domine, ut bene mihi sit ex munere tuo, et lactificer in convivio sancto tuo, quod parasti in dulcedine tua pauperi, Deus. ecce, in te est totum, quod desiderare possum et debeo; et tu salus mea et redemptio, spes et fortitudo, decus et gloria. lactifica ergo hodie animam servi tui, quoniam ad te, Domine Iesu, animam meam levavi. desidero te nunc devote ac reverenter suscipere; cupio te in domum meam inducere, quatenus cum Zachaeo merear a te benedici, ac inter filios Abrahae computari. anima mea Corpus tuum concupiscit, cor meum tecum uniri desiderat. Trade te mihi, et sufficit. nam praeter te, nulla consolatio valet. sine te esse nequeo; et sine visitatione tua

vivere non valco. ideoque oportet me frequenter ad te accedere, et in remedium salutis meae recipere; ne forte deficiam in via, si fuero caelesti frandatus alimonia. sic enim tu, misericordissime Iesu, praedicans populis, et varios curans languores, aliquando dixisti: nolo eos jejunos dimittere in domum suam, ne deficiant in via. age igitur hoc mecum modo, qui te pro fidelium consolatione in Sacramento reliquisti. tu es enim suavis refectio animae: et qui te digne manduca-verit, particeps et heres erit aeternae gloriae. necessarium quidem mihi est, qui tam saepe labor et pecco, tam cito torpesco et deficio, ut per frequentes orationes, et confessiones, ac sacram Corporis tui perceptionem, me renovem, mundem, et accendam; ne forte diutius abstinendo, a sancto proposito defluam. Proni enim sunt sensus hominis ad malum ab adolescentia sua; et nisi succurrat divina medicina, labitur homo mox ad peiora. retrahit ergo sancta Communio a malo: et confortat in bono. si enim modo tam saepe negligens sum et tepidus, quando communico aut celebros; quid fieret, si medellam non sumerem, et tam grande juvamen non quacerem? et licet omni die non sum aptus, nec ad celebrandum bene dispositus; dabo tamen operam, congruis temporibus divina percipere mysteria, ac tantae gratiae participem me praebere. nam haec est una principalis fidelis

animae consolatio, quam diu peregrinatur a te in mortali corpore, ut saepius memor Dei sui, dilectum suum devota suscipiat mente. O mira circa nos tuae pietatis dignatio, quod tu, Domine Deus, creator et vivificator omnium spirituum, ad pauperculam dignaris venire animam, et cum tota divinitate tua ac humanitate, ejus impinguare esuriam! ô felix mens, et beata anima, quae te Dominum Deum suum meretur devote suscipere, et in tua susceptione spirituali gaudio repleri! ô quam magnum suscipit Dominum, quam dilectum inducit hospitem, quam jucundum recipit socium, quam fidelem acceptat amicum, quam speciosum et nobilem amplectitur sponsum prae omnibus dilectis, et super omnia desiderabilia amandum! silcant a facie tua (dulcissime dilecte meus) caelum et terra, et omnis ornatus eorum; quoniam quicquid laudis habent ac decoris, ex dignatione tuae est largitatis, nec ad decorem tui perveniunt nominis, cujus sapientiae non est numerus.

IV. QUOD MULTA BONA PRAESTANTUR DEVOTE COMMUNICANTIBUS.

VOX DISCIPULI.

DOMINE Deus meus, praeveni servum tuum benedictionibus dulcedinis tuae, ut ad tuum magnificum Sacramentum digne ac devote merear accedere. excita cor meum in te, et a gravi corpore exue me. visita me in salutari tuo, ad gustandum in spiritu suavitatem tuam, quae in hoc Sacramento, tamquam in fonte, plenarie latet. illumina quoque oculos meos, ad intuendum tantum mysterium: et ad credendum illud indubitata fide, me roboras. est enim operatio tua, non humana potentia; tua sacra institutio, non hominis adinventio. non enim ad haec capienda et intelligenda aliquis idoneus per se reperitur, quae Angelicam etiam subtilitatem transcendunt. quid ergo ego peccator indignus, terra et cinis, de tam alto sacro secreto potero investigare et capere? Domine, in simplicitate cordis mei, in bona firma fide, et in tua iussione, ad te cum spe ac reverentia accedo: et vere credo, quia tu praesens es hic in Sacramento, Deus et homo. vis ergo, ut te suscipiam, et me ipsum tibi in caritate uniam. unde tuam precor clementiam, et specialem

ad hoc imploro mihi donari gratiam ; ut totus in te liquefiam et amore pereffluam, atque de nulla aliena consolatione amplius me intromittam. est enim hoc altissimum et dignissimum Sacramentum, salus animae et corporis, medicina omnis spiritualis languoris; in quo vitia mea curantur, passionēs frenantur, tentationes vincuntur aut minuuntur; gratia major infunditur; virtus incepta augeatur, firmatur fides, spes roboratur, et caritas ignescit ac dilatatur. Multa namque bona largitus es, et adhuc saepius largiris in Sacramento, dilectis tuis devote communicantibus, Deus meus, susceptor animae meae, reparator infirmitatis humanae, et totius dator consolationis internae. nam multam ipsis consolationem adversus variam tribulationem infundis, et de imo dejectionis propriae ad spem tuae protectionis erigis, atque nova quadam gratia eos intus recreas et illustras: ut, qui anxii primum, et sine affectione se ante Communionem senserant; postea refecti cibo potuque caelesti, in melius se mutatos inveniant. quod idcirco cum electis tuis dispensanter agis, ut veraciter agnoscant, et patenter experiantur, quantum infirmitatis ex se ipsis habeant, et quid bonitatis ac gratiae ex te consequantur. quia ex semet ipsis frigidi, duri, et indevoti; ex te autem ferventes, alacres, et devoti esse merentur. quis enim ad fontem suavitatis humiliter accedens,

non modicum suavitatis inde reportat? aut quis juxta copiosum ignem stans, non parum caloris inde percipit? et tu fons es semper plenus et superabundans, ignis jugiter ardens, et numquam deficiens. Unde si mihi non licet haurire de plenitudine fontis, nec usque ad satietatem potare, apponam tamen os meum ad foramen caelestis fistulae: ut saltem modicam inde guttulam capiam ad refocillandam sitim meam, et non penitus exarescam. etsi necdum totus caelestis, et tam ignitus, ut Cherubim et Seraphim, esse possum; conabor tamen devotioni insistere, et cor meum praeparare, ut vel modicam divini incendii flammam, ex humili sumptione vivifici Sacramenti, conquiram. quidquid autem mihi deest, Iesu bone, Salvator sanctissime, tu pro me supple benigne ac gratiose, qui omnes ad te dignatus es vocare, dicens, Venite ad me omnes qui laboratis et onerati estis, et ego reficiam vos. Ego quidem laboro in sudore vultus mei, dolore cordis torquor, peccatis oneror, temptationibus inquietor, multis malis passionibus implicor et premor; et non est qui adjuvet, non est qui liberet, et salvum faciat, nisi tu, Domine Deus, Salvator meus; cui committo me et omnia mea, ut me custodias, et perducas in vitam aeternam. suscipe me in laudem et gloriam nominis tui, qui Corpus tuum et Sanguinem in cibum et potum mihi paraisti.

praesta, Domine Deus, salutaris meus, ut cum frequentatione mysteriorum tui, crescat meae devotionis affectus,

V. DE DIGNITATE SACRAMENTI, ET STATU SACERDOTALI.

VOX DILECTI.

Si haberes Angelicam puritatem, et sancti Joannis Baptistae sanctitatem; non esses dignus hoc Sacramentum accipere, nec tractare. non enim hoc meritis debetur hominum, quod homo consecret et tractet Christi Sacramentum, et sumat in cibum panem Angelorum. grande mysterium, et magna dignitas Sacerdotum: quibus datum est, quod Angelis non est concessum! soli namque Sacerdotes rite in Ecclesia ordinati, potestatem habent celebrandi, et Corpus Christi consecrandi. Sacerdos quidem minister est Dei; utens verbo Dei, per iussione[m] et institutionem Dei: Deus autem ibi principalis est auctor, et invisibilis operator, cui subest omne quod voluerit, et paret omne quod iusserit. Plus ergo credere debes Deo omnipotenti, in hoc excellentissimo Sacramento, quam proprio sensui, aut alicui signo visibili. ideoque cum timore et reverentia ad hoc opus est accedendum. attende tibi, et vide cujus ministerium tibi traditum est per impositionem manus Ec-

piscopi. ecce, Sacerdos factus es, et ad celebrandum consecratus ; vide nunc, ut fideliter et devote, in suo tempore, Deo sacrificium offeras, et teipsum irreprehensibilem exhibeas. non alleviasti onus tuum, sed arctiori jam alligatus es vinculo disciplinae, et ad maiorem teneris perfectionem sanctitatis. Sacerdos omnibus virtutibus debet esse ornatus, et aliis bonae vitae exemplum praebere. ejus conversatio non cum popularibus et communibus hominum viis, sed cum Angelis in caelo, aut cum perfectis viris in terra. Sacerdos sacris vestibus indutus, Christi vices gerit, ut Deum pro se et pro omni populo suppliciter et humiliter roget. habet ante se et retro Dominicae crucis signum, ad memorandam jugiter Christi Passionem. ante se crucem in casula portat, ut Christi vestigia diligenter inspicat, et sequi ferventer studeat. post se cruce signatus est, ut adversa quaelibet ab aliis illata, clementer pro Deo tolleret. ante se crucem gerit, ut propria peccata lugeat ; post se, ut aliorum etiam commissa per compassionem desineat, et se medium, inter Deum et peccatorem, constitutum esse sciat : nec ab oratione et oblatione sancta torpescat, donec gratiam et misericordiam impetrare mereatur. quando Sacerdos celebrat, Deum honorat, Angelos laetificat, Ecclesiam aedificat, vivos adjuvat, defunctis requiem

praestat, et sese omnium bonorum participem efficit.

VI. INTERROGATIO DE EXERCITIO ANTE COMMUNIONEM.

VOX DISCIPULI.

CUM tuam dignitatem, Domine, et meam vilitatem penso, valde contremisco, et in me ipso confundor. si enim non accedo, vitam fugio; et si indigne me ingessero, offensam incurro. quid ergo faciam, Deus meus, auxiliator meus, et consiliator in necessitatibus? Tu doce me viam rectam: propone breve aliquod exercitium, sacrae Communioni congruum. utile est enim scire, qualiter scilicet devote ac reverenter tibi praeparare debeam cor meum, ad recipiendum salubriter tuum Sacramentum, seu etiam celebrandum tam magnum et divinum sacrificium.

VII. DE DISCUSSIONE PROPRIÆ CON-
SCIENTIÆ, ET EMENDATIO-
NIS PROPOSITO.

VOX DILECTI.

SUPER omnia, cum summa humilitate cordis et supplici reverentia, cum plena fide et pia intentione honoris Dei, ad hoc Sacramentum celebrandum, tractandum et sumendum, oportet Dei accedere Sacerdotem. diligenter examina conscientiam tuam; et pro posse tuo, vera contritione et humili confessione, eam munda et clarifica; ita ut nil grave habeas, aut scias, quod te remordeat, et liberum accessum impediat. habeas displicentiam omnium peccatorum tuorum in generali, et pro quotidianis excessibus magis in speciali doleas et gemas. et, si tempus patitur, Deo in secreto cordis cunctas confitere passionum tuarum miseras. Ingemisce, et dole, quod adhuc ita carnalis sis et mundanus: tam immortificatus a passionibus: tam plenus concupiscentiarum motibus: tam incustoditus in sensibus exterioribus: tam saepe multis vanis phantasiis implicatus: tam multum inclinatus ad exteriora: tam negligens ad interiora: tam levis ad risum et dissolutionem: tam durus ad fletum et compunctionem: tam promptus ad laxiora, et carnis commoda:

tam segnis ad rigorem et fervorem: tam curiosus ad nova audienda, et pulchra intuenta: tam remissus ad humilia et abjecta amplectenda: tam cupidus ad multa habenda: tam parcus ad dandum: tam tenax ad retinendum: tam inconsideratus in loquendo: tam incontinens in tacendo: tam incompotus in moribus: tam importunus in actibus: tam effusus super cibum: tam surdus ad Dei verbum: tam velox ad quietem: tam tardus ad laborem: tam vigilans ad fabulas: tam somnolentus ad vigiliis sacras: tam festinus ad finem: tam vagus ad attendendum: tam negligens in Horis persolvendis: tam tepidus in celebrando: tam aridus in communicando: tam cito distractus: tam raro plene tibi collectus: tam subito commotus ad iram: tam facilis ad alterius displicentiam: tam pronus ad iudicandum: tam rigidus ad arguendum: tam laetus ad prospera: tam debilis in adversis: tam saepe multa bona proponens, et modicum ad effectum perducens. His et aliis defectibus tuis, cum dolore et magna displicentia propriae infirmitatis, confessus ac deploratis, firmum statim propositum semper emendandi vitam tuam, et in melius proficiendi. deinde cum plena resignatione, et integra voluntate, offer te ipsum in honorem nominis mei in ara cordis tui holocaustum perpetuum; corpus tuum scilicet et animam mihi fideliter committendo: quatenus

et sic digne merearis ad offerendum Deo sacrificium accedere; et Sacramentum Corporis mei salubriter suscipere. Non est enim oblatio dignior, et satisfactio major pro peccatis diluendis, quam se ipsum pure et integre, cum oblatione Corporis Christi, in Missa et in Communione Deo offerre. si fecerit homo quod in se est, et vere poenituerit; quotiescumque pro venia et gratia ad me accesserit, Vivo ego, dicit Dominus, qui nolo mortem peccatoris, sed magis ut convertatur et vivat: quoniam peccatorum suorum non recordabor amplius, sed cuncta sibi indulta erunt.

VIII. DE OBLATIONE CHRISTI IN CRUCE, ET PROPRIA RESIGNATIONE.

VOX DILECTI.

SICUT ego me ipsum, expansis in cruce manibus, et nudo corpore, pro peccatis tuis Deo Patri sponte obtuli, ita ut nihil in me remaneret, quin totum in sacrificium divinae placationis transfiret: ita debes et tu temet ipsum mihi voluntarie in oblationem puram et sanctam, quotidie in Missa, cum omnibus viribus et affectibus tuis, quanto intimius vales, offerre. quid magis a te requiro, quam ut te studeas mihi ex integro resignare? quidquid praeter te ipsum das, nihil curo; quia non quaero datum tuum, sed te. Sicut non

sufficeret tibi omnibus habitis, praeter me: ita nec mihi placere poterit, quidquid dederis, te non oblato. offer te mihi, et da te totum pro Deo, et erit accepta oblatio. ecce, ego me totum obtuli Patri pro te; dedi etiam totum Corpus meum et Sanguinem in cibum, ut totus tuus essem, et tu meus permaneres. si autem in te ipso steteris, nec sponte te ad voluntatem meam obtuleris, non est plena oblatio, nec integra erit inter nos unio. igitur omnia opera tua, praecedere debet spontanea tui ipsius in manus Dei oblatio, si libertatem consequi vis et gratiam. ideo enim tam pauci illuminati et liberi intus efficiuntur, quia se ipsos ex toto abnegare nesciunt. est firma sententia mea: nisi quis renuntiaverit omnibus, non potest meus esse discipulus. tu ergo, si optas meus esse discipulus, offer te ipsum mihi, cum omnibus affectibus tuis.

**IX. QUOD NOS ET OMNIA NOSTRA DEO
DEBEMUS OFFERRE, ET PRO
OMNIBUS ORARE.**

V O X D I S C I P U L I .

DOMINE, omnia tua sunt, quae in caelo sunt, et quae in terra. desidero me ipsum tibi in spontaneam oblationem offerre, et tuus perpetue permanere. Domine, in simplicitate cordis mei offero me ipsum tibi hodie in

servum sempiternum, in obsequium, et in sacrificium laudis perpetuae. suscipe me cum hac sancta oblatione tui pretiosi Corporis, quam tibi hodie in praesentia Angelorum, invisibiliter assistentium, offero: ut sit pro me et pro euncto populo tuo in salutem. Domine, offero tibi omnia peccata et delicta mea, quae commisi coram te, et sanctis Angelis tuis, a die quo primum peccare potui, usque ad horam hanc, super placabili altari tuo: ut tu omnia pariter incendas et comburas igne caritatis tuae, et deleas universas maculas peccatorum meorum, et conscientiam meam ab omni delicto emundas, et restituas mihi gratiam tuam, quam peccando amisi, omnia mihi plene indulgendo, et in osculum pacis me misericorditer assumendo. Quid possum agere pro peccatis meis, nisi humiliter ea confitendo et lamentando, et tuam propitiationem incessanter deprecando? deprecor te, exaudi me propitius, ubi asto coram te, Deus meus. omnia peccata mea mihi maxime displicent, nolo ea umquam amplius perpetrare: sed pro eis doleo, et dolebo quamdiu vixero, paratus poenitentiam agere, et pro posse satisfacere. dimitte mihi, Deus, dimitte mihi peccata mea, propter nomen sanctum tuum: salva animam meam, quam pretioso Sanguine tuo redemisti. ecce committo me misericordiae tuae, relinquo me manibus tuis. age mecum secundum bonitatem tuam, non secundum

dum meam malitiam et iniquitatem. Offero etiam tibi omnia bona mea, quamvis valde pauca et imperfecta; ut tu ea emendes et sanctifices; ut ea grata habeas, et accepta tibi facias, et semper ad meliora trahas, nec non ad beatum ac laudabilem finem, me pigrum, et inutilem homuncionem, perducas. Offero quoque tibi omnia pia desideria devotorum, necessitates parentum, amicorum, fratrum, sororum, omniumque carorum meorum, et eorum qui mihi vel aliis propter amorem tuum benefecerunt: et qui orationes et Missas pro se suisque omnibus dici a me desideraverunt et petierunt; sive in carne adhuc vivant, sive jam seculo defuncti sint; ut omnes sibi auxilium gratiae tuae, opem consolationis, protectionem a periculis, liberationem a poenis, advenire sentiant; et ut ab omnibus malis erepti, gratias tibi magnificas laeti persolvant. Offero etiam tibi preces et hostias placationis, pro illis specialiter, qui me in aliquo laeserunt, contristaverunt, aut vituperaverunt, vel aliquod damnum vel gravamen intulerunt; pro his quoque omnibus, quos aliquando contristavi, conturbavi, gravavi, et scandalizavi, verbis, factis, scienter vel ignoranter; ut nobis omnibus pariter indulgeas peccata nostra et mutuas offensiones. aufer, Domine, a cordibus nostris omnem suspensionem, indignationem, iram et discertationem, et quidquid potest caritatem

laedere, et fraternam dilectionem minuere. miserere, miserere, Domine, misericordiam tuam poscentibus, da gratiam indigentibus: et fac nos tales existere, ut simus digni gratia tua perfrui, et ad vitam proficiamus aeternam. amen.

**X. QUOD SACRA COMMUNIO DE FACILI
NON EST RELINQUENDA.**

V O X D I L E C T I.

FREQUENTER recurrendum est ad fontem gratiae et divinae misericordiae, ad fontem bonitatis et totius puritatis; quatenus a passionibus tuis et vitiis curari valeas, et contra universas tentationes et fallacias diaboli fortior atque vigilantior effici merearis. inimicus sciens fructum et remedium maximum in sacra Communione positum, omni modo et occasione nititur fideles et devotos, quantum praevallet, retrahere et impedire. Cum enim quidam sacrae Communioni se aptare disponunt; peiores satanae immisiones patiuntur. ipse nequam spiritus (ut in Iob scribitur) venit inter filios Dei, ut solita illos nequitia sua perturbet, aut timidos nimium reddat et perplexos: quatenus affectum eorum minuat, vel fidem impugnando auferat; si forte aut omnino Communionem relinquant, aut cum tepore accedant, sed non est quid-

quam curandum de versutiis et phantasiis illius, quantumlibet turpibus et horridis; sed cuncta phantasmata in caput ejus sunt retorquenda. contemnendus est miser et deridendus; nec propter insultus ejus et commotiones, quas suscitatur, sacra est omittenda Communio. Saepe etiam impedit nimia sollicitudo pro devotione habenda, et anxietas quaedam de confessione facienda. age secundum consilium sapientum, et depone anxietatem et scrupulum: quia gratiam Dei impedit, et devotionem mentis destruit. propter aliquam parvam turbationem vel gravitatem, sacram ne dimittas Communionem: sed vade citius confiteri, et omnes offensiones aliis libenter indulge. si vero tu aliquem offendisti, veniam humiliter precare, et Deus libenter indulget tibi. Quid prodest, diu tardare confessionem, aut sacram differre Communionem? expurga te cum primis, exspue velociter venenum, festina accipere remedium, et senties melius, quam si diu distuleris. si hodie propter istud dimittis, cras forsitan aliud majus eveniet: et sic diu posses a Communionem impediri, et magis ineptus fieri. quanto citius vales, a praesenti gravitate et inertia te excutias: quia nihil importat diu anxiam, diu cum turbatione transire, et ob quotidiana obstacula se a divinis sequestrare. imo plurimum nocet, diu Communionem protelare; nam et gravem torporem consuevit inducere. proh

dolor! quidam tepidi, et dissoluti, moras confitendi libenter accipiunt, et Communionem sacram idcirco differri cupiunt, ne ad maiorem sui custodiam se dare teneantur. Hec, quam modicam caritatem, et debilem devotionem habent, qui sacram Communionem tam faciliter postponunt! quam felix ille et Deo acceptus habetur, qui sic vivit, et in tali puritate conscientiam suam custodit, ut etiam omni die communicare paratus, et bene affectatus esset, si ei liceret, et sine nota agere posset. si quis interdum abstinet, humilitatis gratia, aut legitima impediens causa, laudandus est de reverentia. si autem torpor obrepserit, se ipsum excitare debet, et facere quod in se est; et Dominus aderit desiderio suo pro bona voluntate, quam specialiter respicit. Cura vero legitime praepeditus est, habebit semper bonam voluntatem, et piam intentionem communicandi, et sic non carebit fructu Sacramenti. potest enim quilibet devotus, omni die et omni hora, ad spirituales Christi Communionem salubriter et sine prohibitione accedere: et tamen certis diebus et statuto tempore Corpus sui Redemptoris, cum affectuosa reverentia, Sacramentaliter debet suscipere, et magis laudem Dei et honorem praetendere, quam suam consolationem quaerere. nam toties mystice communi- cat, et invisibiliter reficitur, quoties incarnationis Christi mysterium passionemque devotus

recolit, et in amore ejus accenditur. Quā aliter se non praeparat, nisi instante festo, vel consuetudine compellente, saepius imparatus erit. beatus, qui se Domino in holocaustum offert, quoties celebrat aut communicat. non sis in celebrando nimis prolixus aut festinus, sed serava bonum communem modum cum quibus vivis. non debes aliis generare molestiam et taedium, sed communem servare viam secundum majorum institutionem; et potius aliorum servire utilitati quam propriae devotioni vel affectui.

**XI. QUOD CORPUS CHRISTI ET SACRA
SCRIPTURA MAXIME SINT ANI-
MAE FIDELI NECESSARIA.**

V O X D I S C I P U L I .

O DULCISIME Domine Iesu, quanta est dulcedo devotae animae, tecum epulantis in convivio tue: ubi ei non alius cibus manducandus proponitur, nisi tu unicus dilectus ejus, super omnia desideria cordis ejus desiderabilis! et mihi quidem dulce foret, in praesentia tua ex intimo affectu lacrymas fundere, et cum pia Magdalena pedes tuos lacrymis irrigare. sed ubi est haec devotio? ubi lacrymarum sanctarum copiosa effusio? certe in conspectu tuo et sanctorum Angelorum tuorum totum cor meum ardere deberet, et ex gaudio

fiere: habeo enim te in Sacramento vere praesentem, quamvis aliena specie occultatum. Nam in propria et divina claritate te conspiciere, oculi mei ferre non possent; sed neque totus mundus in fulgore gloriae majestatis tuae subsisteret. in hoc ergo imbecillitati meae consulis, quod te sub Sacramento abscondis. habeo vere et adoro, quem Angeli adorant in caelo, sed ego adhuc interim in fide, illi autem in specie et sine velamine. me oportet contentum esse in lumine verae fidei, et in ea ambulare, donec aspiret dies aeternae claritatis, et umbrae figurarum inclinentur. cum autem venerit quod perfectum est, cessabit usus Sacramentorum; quia Beati in gloria caelesti non egent medicamine Sacramentali: gaudent enim sine fine in praesentia Dei, facie ad faciem gloriam ejus specularantes; et de claritate in claritatem abyssalis Deitatis transformati, gustant Verbum Dei caro factum, sicut fuit ab initio et manet in aeternum. Memor horum mirabilium, grave mihi sit taedium, etiam quodlibet spirituale solatium: quia quamdiu Dominum meum aperte in sua gloria non video, pro nihilo duco omne quod in mundo conspicio et audio. testis es tu mihi, Deus, quod nulla res me potest consolari, nulla creatura quietare, nisi tu, Deus meus, quem desidero aeternaliter contemplari. sed non est hoc possibile, durante me in hac mortalitate. ideo oportet ut me ponam

ad magnam patientiam, et me ipsum in omni desiderio tibi submittam. nam et Sancti tui, Domine, qui tecum jam in regno caelorum exsultant, in fide et patientia magna, dum viverent, adventum gloriae tuae expectabant. quod illi crediderunt, ego credo: quod illi speraverunt, ego spero: quo illi pervernerunt, per gratiam tuam me venturum confido. ambulabo interim in fide, exemplis confortatus Sanctorum. habebo etiam libros sanctos pro solatio et vitae speculo, atque super haec omnia, sanctissimum Corpus tuum pro singulari remedio et refugio. Duo namque mihi necessaria per-maxime sentio in hac vita, sine quibus mihi importabilis foret ista miserabilis vita; in carcere corporis hujus detentus, duobus me egere fateor, cibo scilicet, et lumine. dedisti itaque mihi infirmo sacrum Corpus tuum ad refectiorem mentis et corporis: et posuisti lucernam pedibus meis, verbum tuum. sine his duobus bene vivere non possem: nam verbum Dei, lux animae meae, et Sacramentum tuum, panis vitae. haec possunt etiam dici mensae duae, hinc et inde in gazophylacio sanctae Ecclesiae positae. una mensa est sacri altaris, habens panem sanctum, id est, Corpus Christi pretiosum: altera est divinae Legis, continens doctrinam sanctam, erudiens fidem rectam, et firmiter usque ad interiora velaminis, ubi sunt Sancta Sanctorum, perducens. gratias tibi, Domine

Iesu, lux lucis aeternae, pro doctrinae sacrae mensa, quam nobis per servos tuos Prophetas et apostolos, aliosque Doctores, ministrasti. Gratias tibi, Creator ac Redemptor hominum, qui, ad declarandam toti mundo caritatem tuam, coenam parasti magnam, in qua non agnum typicum, sed tuum sanctissimum Corpus et Sanguinem, proposuisti manducandam; lactificans omnes fideles convivio sacro, et calice inebrians salutari, in quo sunt omnes deliciae paradisi, et epulantur nobiscum Angeli sancti, sed suavitatem feliciorem. O quam magnum et honorabile est officium Sacerdotum, quibus datum est, Dominum maiestatis, verbis sacris consecrare, labiis benedicere, manibus tenere, ore proprio sumere, et ceteris ministrare! O quam mandae debent esse manus illae, quam purum os, quam sanctum corpus, quam immaculatam cor erit Sacerdotis; ad quem toties ingreditur auctor puritatis! ex ore Sacerdotis nihil nisi sanctum, nihil nisi honestum et utile, procedere debet verbum, qui tam saepe Christi accipit Sacramentum. Oculi ejus simplices et pudici, qui Christi Corpus solent intueri, manus purae, et in caelum elevatae, quae Creatorem caeli et terrae solent contrectare. Sacerdotibus specialiter in Lege dicitur: Sancti estote, quoniam ego sanctus sum Dominus Deus vester. Adjuvet nos gratia tua, omnipotens Deus, ut, qui officium Sacerdotale sus-

cepimus, digne ac devote tibi in omni puritate et conscientia bona famulari valeamus. et si non possumus in tanta innocentia vitae conversari, ut debemus; concede nobis tamen digne flere mala quae gessimus: et in spiritu humilitatis, ac bonae voluntatis proposito, tibi ferventius de cetero deservire.

XII. QUOD MAGNA DILIGENTIA SE DEBEAT, COMMUNICATURUS CHRISTO, PRAEPARARE.

VOX DILECTI.

Ego sum puritatis amator, et dator omnis sanctitatis. ego eor purum quaero, et ibi est locus requietionis meae. para mihi coenaculum grande stratum, et faciam apud te Pascha cum discipulis meis. si vis, ut veniam ad te, et apud te maneam; expurga vetus fermentum, et munda cordis tui habitaculum. exclude totum seculum, et omnem vitiorum tumultum: sede tamquam passer solitarius in tecto, et cogita excessus tuos in amaritudine animae tuae. omnis namque amans suo dilecto amatori optimum et pulcerrimum praeparat locum, quia in hoc cognoscitur affectus suscipientis dilectum. Scito tamen, te non posse satisfacere huic praeparationi ex merito tuae actionis, etiamsi per integrum annum te praeparares, et nihil aliud in men-

te haberes. sed ex sola pietate et gratia mea
 permitteris ad mensam meam accedere: ac si
 mendicus ad prandium vocaretur divitis, et
 ille nihil aliud habeat ad retribuendum bene-
 ficiis ejus, nisi se humiliando et ei regratian-
 do. fac quod in te est, et diligenter facito:
 non ex consuetudine, non ex necessitate, sed
 cum timore, et reverentia, et affectu, accipe
 Corpus dilecti Domini Dei tui, dignantis ad
 te venire. ego sum qui vocavi, ego jussi fieri;
 ego supplebo quod tibi deest: veni, et susci-
 pe me. Cum gratiam devotionis tribuo,
 gratias age Deo tuo: non quia dignus es, sed
 quia tui misertus sum. si non habes, sed ma-
 gis aridum te sentis, insiste orationi, ingemisce
 et pulsa: nec desistas, donec merearis micam
 aut guttam gratiae salutaris accipere. tu mei
 indiges, non ego tui indigeo. nec tu me
 sanctificare venis, sed ego te sanctificare et
 meliorare venio. tu venis, ut ex me sanctifi-
 ceris, et mihi uniaris; ut novam gratiam re-
 cipias, et de novo ad emendationem accenda-
 ris. noli negligere hanc gratiam; sed prae-
 para cum omni diligentia cor tuum, et intro-
 duc ad te dilectum tuum. Oportet autem,
 ut non solum te praepares ad devotionem an-
 te Communionem, sed ut etiam te sollicite
 conserves in ea post Sacramenti perceptio-
 nem. nec minor custodia post exigitur, quam
 devota praeparatio prius. nam bona postmo-
 dum custodia, optima iterum est praeparatio

ad maiorem gratiam consequendam. ex eo quippe valde indispositus quis redditur, si statim fuerit nimis effusus ad exteriora solatia. cave a multiloquio, mane in secreto, et fruerere Deo tuo: ipsum enim habes, quem totus mundus tibi auferre non potest. ego sum cui te totum dare debes: ita ut jam ultra non in te, sed in me, absque omni sollicitudine, vivas.

XIII. QUOD TOTO CORDE ANIMA DEVOTA CHRISTI UNIONEM IN SACRAMENTO AFFECTARE DEBEAT.

V O X D I S C I P U L I.

Quis mihi det, Domine, ut inveniam te solum, et aperiam tibi totum cor meum, et fruam te, sicut desiderat anima mea; et jam me nemo despiciat, nec ulla creatura me moveat vel respiciat, sed tu solus mihi loquaris, et ego tibi, sicut solet dilectus ad dilectum loqui, et amicus cum amico convivari? hoc oro, hoc desidero, ut tibi totus uniar, et cor meum ab omnibus creatis rebus abstraham, magisque per sacram Communionem, ac frequentem celebrationem, caelestia et aeterna sapere discam. ah, Domine Deus, quando ero tecum totus unitus et absorptus, meique totaliter oblitus? tu in me, et ego in te; et sic nos pariter in unum manere concede. Vere

tu es dilectus meus, electus ex millibus, in quo complacuit animae meae habitare omnibus diebus vitae suae. vere tu pacificus meus, in quo pax summa et requies vera, extra quem labor et dolor, et infinita miseria. vere tu es Deus absconditus; et consilium tuum non est cum impiis, sed cum humilibus et simplicibus sermo tuus. ô quam suavis est, Domine, spiritus tuus, qui ut dulcedinem tuam in filios demonstrares, pane suavissimo, de caelo descendente, illos reficere dignaris! vere non est alia natio tam grandis, quae habeat deos appropinquantés sibi, sicut tu, Deus noster, ades universis fidelibus tuis; quibus ob quotidianum solatium, et cor erigendum in caelum, te tribuis ad edendum et fruendum. Quae est enim alia gens tam inclýta, sicut plebs Christiana? aut quae creatura sub caelo tam dilecta, ut anima devota, ad quam ingreditur Deus, ut pascat eam carne sua gloriosa? ô ineffabilis gratia! ô admirabilis dignatio! ô amor immensus homini singulariter impensus! sed quid retribuam Domino pro gratia ista, pro caritate tam exímia? non est aliud quod grátius donare queam, quam ut cor meum Deo meo totaliter tribuam, et intime conjungam. tunc exultabunt omnia interiora mea, cum perfecte fuerit unita Deo anima mea. tunc dicet mihi: si tu vis esse mecum, ego volo esse tecum. et ego respondebo illi: dignare, Domine, manere mecum,

ego volo libenter esse tecum. hoc est totum desiderium meum, ut cor meum tibi sit unitum.

**XIV. DE QUORUNDAM DEVOTORUM ARDENTI DESIDERIO AD CORPUS
CHRISTI.**

VOX DISCIPULI.

O QUAM magna multitudo dulcedinis tuae, Domine, quam abscondisti timentibus te! quando recorder devotorum aliquorum, ad Sacramentum tuum, Domine, cum maxima devotione et affectu accedentium, tunc facpius in me ipso confundor et erubesco; quod ad altare tuum, et sacrae Communionis mensam, tam tepide et frigide accedo; quod ita aridus, et sine affectione cordis maneo: quod non sum totaliter accensus coram te Deo meo: nec ita vehementer attractus et affectus, sicut multi devoti fuerunt, qui praenimio desiderio Communionis, et sensibili cordis amore, a fletu se non potuerunt continere; sed ore cordis et corporis pariter ad te Deum fontem vivum medullitus inhiabant, suam esuriem non valentes aliter temperare nec satiare, nisi Corpus tuum cum omni jucunditate et spiritali aviditate accepissent. O vera ardens fides eorum, probabile existens argumentum sacrae praesentiae tuae! isti e-

nim veraciter cognoscunt Dominum suum in fractione panis, quorum cor tam valide ardet in eis de Iesu ambulante cum eis. longe est a me saepe talis affectus et devotio, tam vehemens amor et ardor. esto mihi propitius, Iesu bone, dulcis et benigne; et concede pauperi mendico tuo, vel interdum modicum de cordiali affectu amoris tui, in sacra Communione sentire, ut fides mea magis convalescat, spes in bonitate tua proficiat, et caritas semel perfecte accensa, et caeleste manna experta, numquam deficiat. Potens est autem misericordia tua, etiam gratiam desideratam mihi praestare, et in spiritu ardoris, cum dies beneplaciti tui venerit, me clementissime visitare. et enim licet tanto desiderio tam specialium devotorum tuorum non ardeo, tamen de gratia tua, illius magni inflammati desiderii desiderium habeo, orans et desiderans, omnium talium fervidorum amatorum tuorum participem me fieri, ac eorum sancto consortio annumerari.

XV. QUOD GRATIA DEVOTIONIS, HUMILITATE ET SUI IPSIUS ABNEGATIONE ACQUIRITUR.

VOX DILECTI.

OPORTET te devotionis gratiam instanter quaerere, desideranter petere, patienter et fiducialiter exspectare, gratanter recipere, humiliter conservare, studiose cum ea operari, ac Deo terminum et modum supernae visitationis, donec veniat, committere. humiliare praecipue te debes, cum parum aut nihil devotionis interius sentis; sed non nimium dejici, nec inordinate contristari. dat saepe Deus in uno brevi momento, quod longo negavit tempore: dat quandoque in fine, quod in principio orationis distulit dare. Si semper cito gratia daretur, et pro voto adesset, non esset infirmo homini bene portabile. propterea in bona spe, et humili patientia, exspectanda est devotionis gratia. tibi tamen et peccatis tuis imputa, cum non datur, vel etiam occulte tollitur. modicum quandoque est, quod gratiam impedit et abscondit; si tamen modicum, et non potius grande dici debeat, quod tantum bonum prohibet. et si hoc ipsum modicum, vel grande, amoveris, et perfecte viceris, erit quod petisti. Statim namque, ut te Deo ex toto corde tradideris,

nec hoc vel illud pro tuo libitu seu velle quaesieris, sed integre te in ipso posueris, unitum te inuenies, et pacatum: quia nil ita bene sapiet et placebit, sicut beneplacitum divinae voluntatis. quisquis ergo intentionem suam simplici corde sursum ad Deum levaverit, seque ab omni inordinato amore, seu displicentia cuiuslibet rei creatae evacuaverit, aptissimus gratiae percipiendae, ac dignus devotionis munere erit. dat enim Dominus ibi benedictionem suam, ubi vasa vacua invenerit. et quanto perfectius infimis quis renuntiat, et magis sibi ipsi per contemptum sui moritur, tanto gratia celerius venit, copiosius intrat, et altius liberum eor elevat. Tunc videbit, et affluet, et mirabitur, et dilatabitur cor ejus in ipso, quia manus Domini cum eo, et ipse se posuit totaliter in manu ejus usque in seculum. ecce sic benedicetur homo, qui quaerit Deum in toto corde suo, nec in vanum accipit animam suam. hic, in accipiendo sacram Eucharistiam, magnam promeretur divinae unionis gratiam, quia non respicit ad propriam devotionem et consolationem, sed super omnem devotionem, et consolationem, ad Dei gloriam et honorem.

**XVI. QUOD NECESSITATES NOSTRAS
CHRISTO APERIRE, ET EJUS
GRATIAM POSTULA-
RE, DEBEMUS.**

VOX DISCIPULI.

O DULCISSIMA atque amantissima Do-
mine, quem nunc devoto desiderio suscipere,
tu scis infirmitatem meam, et necessitatem
quam patior; in quantis malis et vitiis jaceo;
quam saepe sum gravis, tentatus, turbatus,
et inquinatus. pro remedio ad te venio, pro
consolatione et sublevamine te deprecor. ad
omnia scientem loquor, cui manifesta sunt
omnia interiora mea, et qui solus potes me
perfecte consolari, et adjuvare. tu scis, qui-
bus bonis indigeo prae omnibus, et quam
pauper sum in virtutibus. Ecce, sto ante te
pauper et nudus, gratiam postulans, et mise-
ricordiam implorans. refice esurientem men-
dicum tuum, accende frigiditatem meam ig-
ne amoris tui, illumina caecitatem meam cla-
ritate praesentiae tuae. verte mihi omnia
terrena in amaritudinem, omnia gravia et
contraria in patientiam, omnia infirma et
creata in contemptum et oblivionem. orige
cor meum ad te in caelum, et ne dimittas
me vagari super terram. tu solus mihi ex

hoc jam dulcescas usque in seculum; quia tu solus cibus et potus meus, amor meus et gaudium meum, dulcedo mea et totum bonum meum. Utinam me totaliter ex tua praesentia accendas, comburas, et in te transmutes; ut unus tecum efficiar spiritus, per gratiam internae unionis, et liquefactionem ardentis amoris! ne patiaris me jejenum et aridum a te recedere, sed operare mecum misericorditer, sicut saepius operatus es cum Sanctis tuis mirabiliter. quid mirum, si totus ex te ignescerem, et in me ipso deficerem; cum tu sis ignis semper ardens, et numquam deficiens; amor corda purificans, et intellectum illuminans?

XVII. DE ARDENTI AMORE, ET VEHE-
MENTI AFFECTU SUSCIPIEN-
DI CHRISTUM.

V O X D I S C I P U L I.

CUM summa devotione et ardenti amore, cum toto cordis affectu et fervore, desidero te, Domine, suscipere, quemadmodum multi Sancti, et devotae personae, in communicando te desideraverunt, qui tibi maxime in sanctitate vitae placuerunt, et in ardentissima devotione fuerunt. O Deus meus, amor aeternus, totum bonum meum, felicitas intermi-

nabilis, cupio te suscipere cum vehementissimo desiderio, et dignissima reverentia, quam aliquis Sanctorum umquam habuit, et sentire potuit. Et licet indignus sum omnia illa sentimenta devotionis habere, tamen offero tibi totum cordis mei affectum, ac si omnia illa gratissima inflammata desideria solus haberem. sed et quaecumque potest pia mens concipere et desiderare, haec omnia tibi, cum summa veneratione et intimo favore, praebeo et offero. nihil opto mihi reservare, sed me et omnia mea tibi sponte et libentissime immolare. Domine Deus meus, creator meus, et redemptor meus, cum tali affectu, reverentia, laude et honore; cum tali gratitudine, dignitate et amore; cum tali fide, spe et puritate, te affecto hodie suscipere, sicut te suscepit et desideravit sanctissima mater tua, gloriosa Virgo Maria, quando Angelo evangelizanti sibi incarnationis mysterium, humiliter ac devote respondit: ecce ancilla Domini, fiat mihi secundum verbum tuum. Et sicut beatus praecursor tuus, excellentissimus Sanctorum Joannes Baptista, in praesentia tua laetabundus exultavit in gaudio Spiritus sancti, dum adhuc maternis clauderetur visceribus; et postmodum cernens inter homines Iesum ambulantiem, valde se humilians, devoto cum affectu dicebat: amicus autem sponsi, qui stat, et audit eum, gaudio gaudet prop-

ter vocem sponsi: sic et ego, magnis et sacris desideriis opto inflammari, et tibi ex toto corde me ipsum praesentare. unde et omnium devotorum cordium jubilationes, ardentes affectus, mentales excessus, ac supernaturales illuminationes, et caelicas visiones tibi offero et exhibeo, cum omnibus virtutibus et laudibus, ab omni creatura in caelo et in terra celebratis et celebrandis, pro me et omnibus mihi in oratione commendatis; quatenus ab omnibus digne lauderis, et in perpetuum glorificeris. Accipe vota mea, Domine Deus meus, et desideria infinitae laudationis, ac immensae benedictionis; quae tibi, secundum multitudinem ineffabilis magnitudinis tuae, jure debentur. haec tibi reddo, et reddere desidero, per singulos dies et momenta temporum; atque ad reddendum mecum tibi gratias et laudes, omnes caelestes spiritus, et cunctos fideles tuos, precibus et affectibus invito et exoro. Laudent te universi populi, tribus, et linguae, et sanctum ac mellissimum nomen tuum, cum summa jubilatione, et ardenti devotione magnificent. et quicumque reverenter ac devote altissimum Sacramentum tuum celebrant, et plena fide recipiunt, gratiam et misericordiam apud te invenire mereantur, et pro me peccatore suppliciter exorent. cumque optata devotione, ac fruibili unione, potiti fuerint, et bene con-

solati, ac mirifice refecti, de sacra mensa caelesti abscesserint, mei pauperis recordari dignentur.

**XVIII. QUOD HOMO NON SIT CURIOSUS
SCRUTATOR SACRAMENTI, SED HU-
MILIS IMITATOR CHRISTI, SUBDEN-
DO SENSUM SUUM SACRAE FIDEI.**


VOX DILECTI.

• **CAVENDUM** est tibi a curiosa et inutili perscrutatione hujus profundissimi Sacramenti, si non vis in dubitationis profundum submergi. qui scrutator est majestatis, opprimetur a gloria. plus valet Deus operari, quam homo intelligere potest. tolerabilis, pia et humilis inquisitio veritatis, parata semper doceri, et per sanas et Patrum sententias studens ambulare. Beata simplicitas, quae difficiles quaestionum relinquit vias, et plana ac firma pergit semita mandatorum Dei. multi devotionem perdiderunt, dum altiora scrutari voluerunt. fides a te exigitur, et sincera vita; non altitudo intellectus, neque profunditas mysteriorum Dei. si non intelligis, nec capis, quae infra te sunt; quomodo comprehendes quae supra te sunt? subde te Deo, et humilia

sensum tuum fidei, et dabitur tibi scientiae lumen, prout tibi fuerit utile ac necessarium. Quidam graviter tentantur de fide et Sacramento; sed non est hoc ipsis imputandum, sed potius inimico. noli curare, noli disputare cum cogitationibus tuis, nec ad immixtas a diabolo dubitationes responde; sed crede verbis Dei, crede Sanctis ejus et Prophetis, et fugiet a te nequam inimicus. saepe multum prodest, quod talia sustinet Dei servus. nam infideles et peccatores non tentat, quos secure jam possidet; fideles autem devotos variis modis tentat et vexat. Perge ergo cum simplici et indubitata fide, et cum supplici reverentia ad Sacramentum accede. et quidquid intelligere non vales, Deo omnipotenti secure committe. non fallit te Deus; fallitur, qui sibi ipsi nimium credit. graditur Deus cum simplicibus, revelat se humilibus, dat intellectum parvulis, aperit sensum puris mentibus, et abscondit gratiam curiosis et superbis. ratio humana debilis est, et falli potest; fides autem vera, falli non potest. Omnis ratio, et naturalis investigatio, fidem sequi debet, non praecedere, nec infringere. nam fides et amor ibi maxime praecellunt, et occultis modis in hoc sanctissimo et superexcellantissimo Sacramento operantur. Deus aeternus et immensus, in-

finitaeque potentiae, facit magna et inscrutabilia in caelo et in terra, nec est investigatio mirabilium operum ejus. si talia essent opera Dei, ut facile ab humana ratione caperentur, non essent mirabilia nec ineffabilia dicenda.

F I N I S.



INDEX

IN HOS QUATUOR

DE

IMITATIONE

CHRISTI

LIBELLOS.

A.

Abnegatio sui, ac Christi imitatio per Crucem. lib. 3, c. 32, c. 56. Vide Contemptus. Communio.

Acedia l. 1, c. 25.

Adventus Dei in mentem. l. 2, c. 1.

Adversitatis utilitates. l. 1, c. 12.

Aestimatio sui vilis in oculis Dei. l. 3, c. 8.

Aeterna vita. Vide, Vita aeterna.

Affectus noster quibus rebus inhaereat, expendendum sedulo. l. 3, c. 31.

in Agendo non debet esse homo importunus,
l. 3, c. 31.

- Amandus Iesus super omnia.** l. 2, c. 7.
- Amandus proximus :** cujus amor tunc perit, quando illius imperfectiones non aequo animo perferuntur. l. 1, c. 16.
- Amanti Deum, super omnia sapit Deus.** l. 3, c. 34.
- Amator Christi verus quis sit.** l. 3, c. 6.
- Amatores crucis Christi pauci.** l. 2, c. 11.
- Amatoris veri probatio.** l. 3, c. 6, c. 7.
- Ambulandum sincere coram Deo.** l. 3, c. 4.
- Amor Iesu, rerumque aeternarum ac caelestium.** l. 2, c. 1.
- Amoris divini effectus mirabiles.** l. 3, c. 5.
- Amor creaturarum homini plurimum nocet.** l. 2, c. 1.
- Amor proprius valde retardat a fruitione summi boni.** l. 3, c. 27.
- Amicitia Iesu quanti sit facienda.** l. 2, c. 8.
- Amici si te deserant, ne moleste feras.** l. 2, c. 9.
- Amico carere cum sit molestum, da operam, ut sis cum Iesu familiaris.** l. 2, c. 8.
- Anni conversionis seu vocationis.** l. 1, c. 11.
- Annos conversionis plerique numerant, sed pauci emendationis vitae.** l. 1, c. 23.
- Apostoli Christi quales fuerint.** l. 3, c. 22.
- Appetitio inordinata parit inquietudinem.** l. 1, c. 6.
- Avari et superbi nulla pace fruuntur.** l. 1, c. 6.
- Auditus curiositas cavenda.** l. 3, c. 44.
- Auxilium divinum petendum; cum fiducia recuperandae gratiae.** l. 3, c. 30.

B.

Beneficia Dei expendenda sunt. l. 3, c. 22.

Beneficiis Dei quis sit indignus. l. 3, c. 22.

Beneplacitum Dei. vide, **Voluntas Dei.** O-
ratio.

Boni nihil ex se habet homo. l. 3, c. 40.

Bona vita praestat scientiae. l. 1, c. 3.

C.

Carnalia sectari, maxima vanitas. l. 1, c. 1.

Caecitatis humanae consideratio. l. 2, c. 5.

Caelestium rerum amor. l. 2, c. 1.

Cella continuata dulcescit. l. 1, c. 20.

Cella in te servabit quod foris amittes. ibid.

Cellae et silentii fructus. l. 1, c. 20.

**Caritas non quaerit quae sua sunt, sed omnia
in Deum refert.** l. 1, c. 15.

absque Caritate opera nostra sunt vana. ib.

**Caritas ad omnes habenda est, non autem fa-
miliaritas.** l. 1, c. 8.

Christi vitam sequentes illuminantur. l. 1,
c. 1.

Christi verba interna ad animam fidelem. l. 3,
c. 1.

Christi doctrina cur quibusdam non sapiat.
l. 1, c. 1.

**Christi doctrina antecellit omnium Sancto-
rum doctrinas.** ib. in ea est manna abscon-
ditum. ib.

Christi vitae imitatio. l. 1, c. 1, l. 3, c. 56.

Christum qui habet magistrum, is felix est.

l. 1, c. 3.

Christi exemplo, Superiori obediendum est.

l. 3, c. 13.

contra cogitationes malas oratio. l. 3, c. 23.

vide, Desideria.

Cognitio sui, summa sapientia est. l. 1, c. 2.

Communionis fructus. l. 4, c. 1.

Communicare saepe, est utile. l. 4, c. 3.

ante Communionem exercitia. l. 4, c. 7.

per Communionem, unio cum Deo optanda

est. l. 4, c. 13.

Communionem qua praeparatione, et cum

quanta reverentia adire oportet. l. 4, c. 1,

c. 12.

ad Communionem Christi, exhortatio. in

Libri quarti prooemio. Item l. 4, c. 1.

Communio non est facile relinquenda. l. 4,

c. 12.

in Communione orandum est pro nobis, ac e-

tiam pro omnibus. l. 4, c. 9.

ad Communionem quorundam ardens desi-

derium. l. 4, c. 14, c. 17.

Communionem non sumus digni, si nos ipsos

spectemus. l. 4, c. 1.

per Communionem acquiruntur humilitas,

devotio, suique abnegatio. l. 4, c. 15.

ante Communionem oportet suam conscien-

tiam examinare: concipiendum quoque

se se emendandi propositum. l. 4, c. 7.

Communicantes debent Christo suas necessita-

tes aperire, atque ejusdem gratiam postulare. l. 4, c. 16.

Communicantibus devote, ampla gratia confertur. l. 4, c. 4.

Communicantes, tum nos, tum nostra, Deo offerre debemus. l. 4, c. 7, c. 8, c. 9. vide, Eucharistia.

Compunctionis bona. l. 1, c. 1.

Conjunctionis interioris commendatio. l. 1, c. 21.

Compunctio cordis unde nascatur. ib.

Compunctio quomodo acquiri possit. l. 1, c. 20.

Compunctionis interioris commendatio. l. 1, c. 21.

Concupiscentiae breves et falsae. l. 3, c. 12.

contra Concupiscentias pugna necessaria. l. 3, c. 35.

Concupiscentiis minime est indulgendum. l. 3, c. 12.

Confessio propriae infirmitatis, atque miseriarum hujus mundi. l. 1, c. 20.

Confidentia habenda est de gratia recuperanda, si forte illa recessisset. l. 3, c. 30.

Confidentiam suam in Deo debet reponere injuriis laceratus. l. 3, c. 46.

Confidendum est nec in se, nec in aliis. l. 1, c. 7, c. 20.

Conjunctio cum Deo unde nascatur. l. 1, c. 21.

Conqueri non oportet facile. l. 2, c. 1.

Conscientiae bonae gaudium. l. 2, c. 6.

Conscientia mala pacem non habet. ib.

Consideratio sui ipsius, et caecitatis humanae,
l. 2, c. 5.

Consilium accipere melius est, quam dare.
l. 1, c. 9.

Consolatione caelesti quis sit dignus. l. 1,
c. 20.

Consolatione homo haud dignus est; quin po-
tius verberibus. l. 3, c. 52.

ex Consolatione merita non sunt aestimanda.
l. 3, c. 7.

Consolatio humana aspernanda est. l. 3, c. 16.

Consolatio in Deo quaerenda est. ib.

Consolatione omni carere, magnum quid est.
l. 2, c. 9.

Consolationes nonnumquam recedunt, ite-
rumque revertuntur. ib.

Consolationes quando dantur vel auferuntur,
quo pacto se gerere debeat homo. ib.

Consolationes externae frequenter internas
impediunt. l. 1. c. 13, c. 21.

Consolationem humanam qui non quaerit,
signum est, quod inceperit Deum gustare.
l. 1, c. 25.

Consolationes divinae non semper ad votum
habentur. l. 1, c. 10.

Contemplari alta qui non novit, sese in Chris-
ti passione exerceat. l. 2, c. 1.

Contemptus sui, est summa sapientia. l. 1,
c. 2.

Contemptus tum sui, tum voluptatum. l. 3,
c. 32.

Contempto mundo, quam sit dulce Christo
servire. l. 3, c. 10.

Contemptus honoris temporalis. l. 3, c. 41.

Contemptus externarum rerum. l. 2, c. 1.
vide, Humilitas.

Contumeliae patienter ferendae. l. 3, c. 46.

Conversatio in mundo qualis esse debeat. l. 1,
c. 7. l. 3, c. 22.

Conversandum cum quibus sit. l. 1, c. 8.

Conversatio externa multum nocet. l. 1,
c. 20.

Conversari cum bonis recte, parum quid est;
at cum malis, res est maxima. l. 2, c. 3.

Conversari secum intus, et cum Iesu, opti-
mum est, l. 2, c. 1.

Conversionis seu vocationis anni. l. 1, c. 11.

Conversionis annos plerique numerant, sed
pauci emendationis vitae. l. 1, c. 23.

Cor hominis est mutabile et inconstans. l. 3,
c. 32, c. 33.

Cor purum quibus fruatur bonis. l. 2, c. 4.

Cordis pacem quiniam habeant. l. 2, c. 6.

Cordis desideria examinanda. l. 3, c. 15.

Creaturarum amor homini plurimum nocet.
l. 2, c. 1.

Creaturarum contemptus, efficit, ut Creator
facile inveniri possit. l. 3, c. 31.

Credendum minime omnibus; quia homo
mendax est. l. 3, c. 45.

Credimus de aliis citius malum quam bonum.

l. 1, c. 4.

Crucis Christi amatores pauci admodum inveniuntur. l. 2, c. 11. item c. seq.

Crucis Christi qui sint veri imitatores. l. 2, c. 12.

Crucis sanctae via regia. l. 2, c. 13.

Crucem suam mundani habent. l. 3, c. 12.

Cubiculum intrandum, et tumultus mundi excludendi. l. 1, c. 20.

Cupiditas omnis refecanda est. lib. 3, c. 15. c. 32.

Cura et sollicitudo omnis, in Deo ponenda. l. 3, c. 17.

Curiositas de vita aliorum inquirenda, evitanda. l. 3, c. 24.

Curiositas cavenda est, tum audiendo, tum videndo. l. 3, c. 44.

D.

Daemon conatur bona desideria impedire. l. 3, c. 6.

Defectus aliorum tolerandi. l. 1, c. 16, l. 2, c. 3.

Defectus nostros ab aliis sciri, ad humilitatem nostri subinde utile est, l. 2, c. 21.

pro Defunctis in Missa orandum. l. 4, c. 9.

Deseri ab amicis, non moleste ferendum. l. 2, c. 9.

Desiderium nimium sciendi est reprehensibile.

l. 1, c. 2.

Desideria sua homo debet offerre Deo, ac tum ipsius voluntati plane acquiescere. l. 3,

c. 15.

Desideria nostra ordinata esse debent, divinæque voluntati conformia. ib.

Desideria cordis examinanda. ib. et c. 11.

Desolatus debet ad Deum confugere, ac ei se offerre. l. 3, c. 50.

Detractatores sunt patienter ferendi. l. 3, c. 26.

Devotio acquiritur per Communionem. l. 4, c. 15.

Devotio quorundam posita est in libris et imaginibus. l. 3, c. 4.

Devoti hominis consolatio. l. 3, c. 18.

per Devotionem indiscretam quidam se destruxerunt. l. 3, c. 7.

pro Devotionis gratia impetranda, oratio. l. 3, c. 3.

Devotionis gratia occultari debet. l. 3, c. 7.

Devotionis gratia non est in manu hominis. ib.

Deus sapit super omnia amanti Deum. l. 3, c. 34.

Deus cur permittat nonnullos tentari. l. 1, c. 13.

Dei voluntas omnibus in rebus quaerenda est. l. 3, c. 15.

Deo nihil occultum. l. 3, c. 46.

- ad Deum via potius per sui cognitionem habetur, quam per scientiam. l. 1, c. 3.
- Deo sunt committenda omnia nostra. l. 3, c. 14.
- Deus est in tribulatione invocandus, et benedicendus. l. 3, c. 29.
- Deus est vera quies interna. l. 3, c. 21.
- in Deum, tamquam in finem, omnia sunt referenda. l. 3, c. 9, c. 10.
- Dilectio. vide, Caritas.
- Disputatio de Trinitate, Deo non placet sine humilitate. l. 1, c. 1.
- Dissolutum esse ac vagum, nocet homini quam maxime, l. 1, c. 21.
- Distractionis remedia. l. 1, c. 3.
- Divitiae spernendae. l. 3, c. 41.
- Doctrina Christi antecellit omnium Sanctorum doctrinas: in qua manna est absconditum. l. 1, c. 1.
- Doctrina Christi cur quibusdam non sapiat. ib.
- ob Doctrinam multi perierunt. l. 1, c. 2, c. 3.
- Docti ut plurimum fiunt viri elati. l. 1, c. 2.
- Docti raro sunt boni subditi. l. 3, c. 7.
- Docti punientur ceteris gravius, nisi prae aliis melius vixerint. l. 1, c. 2.
- Doctus quis vere sit. l. 1, c. 3.
- Doloris iusti materiae, sunt peccata et vitia nostra. l. 1, c. 21.
- Domi manendum. l. 1, c. 20.

E.

Effectus mirabiles amoris divini. l. 3, c. 5.

Emendatio vitae. l. 1, c. 25.

Emendationis propositum non differendum.

l. 2, c. 22.

Emendationem morum duo impediunt. l. 1, c. 25.

ad Emendationem vitae ac morum duo plurimum conducunt. l. 1, c. 25.

ex Evangelii auditu sive praedicatione, cur vel nullus, vel exiguus admodum fructus in plerisque fiat. l. 1, c. 1.

Eucharistiae dignitas. l. 4, c. 5.

Eucharistia nobis est quam maxime necessaria. l. 4, c. 11.

de Eucharistia ne sit homo indagator curiosus: sed suos sensus fidei simpliciter subiiciat. l. 4, c. 18. vide, *Communio*.

Examen conscientiae faciendum, tum mane, tum vespere. l. 1, c. 19.

Exempla perfectorum multum ad profectum conducunt. l. 1, c. 18.

Exempla bonorum magis nos ad virtutem impellere debent, quam malorum ad vitam laxiorem. l. 1, c. 18.

Exercitia corporalia quatenus sint assumenda. l. 1, c. 19.

Exercitia spiritualia, diversis temporibus, alia atque alia assumenda sunt. ib.

Exercitia ante Communionem. l. 4, c. 7.

L

F.

- Familiaritas cum Iesu optima est. l. 2, c. 8.
 Familiaritas nimia caveri debet, maxime re-
 so cum mulieribus. l. 1, c. 8.
 Familiaritas nimia cum hominibus subinde
 sollicit bonam opinionem de nobis prius con-
 ceptam. l. 1, c. 8.
 Hervori oportet se dare. l. 1, c. 25.
 Fervido omnia fiunt levia. ib.
 Hesto die solenni appropinquante, quid agen-
 dum sit. l. 1, c. 19.
 Fiducia nec in se nec in hominibus ponenda
 est, sed in Deo nostro. l. 1, c. 7, l. 2, c. 1.
 l. 3, c. 59.
 Fidere sibi nimium non oportet. l. 2, c. 5.
 Finis ultimus et supremus, Deus. l. 3, c. 9.
 Fragilitas hominis est magna. l. 1, c. 22.
 Fructum facere ex aliorum dictis et factis de-
 bemus, tametsi peccata esse appareant. l. 2,
 c. 2.

G.

- Gaudium conscientiae bonae. l. 1, c. 20, l. 2,
 c. 6.
 Gaudium mala conscientia non habet. ib.
 Gaudium verum in Deo solo. l. 3, c. 16.
 Gaudii privatio. l. 2, c. 9.
 Gloria vera, et falsa, quae sit. l. 2, c. 6.
 Gloriam aeternam, ejusque desiderium, considera-
 tio. l. 3, c. 48, c. 49.

Gloriari homo de nullo potest, quia ex se nihil habet. l. 3, c. 40.

Gloriandum in tribulatione. l. 2, c. 6.

Gloriandum in nulla re hic. l. 3, c. 40.

Gloriandum in Deo solo, non autem in aliis;
l. 1, c. 7, l. 3, c. 9.

pro Gratia Dei impetranda, oratio. l. 3, c. 3.

Gratiae internae custos est humilitas. l. 3, c. 7.

Gratiae Deo pro acceptis beneficiis agenda,
l. 2, c. 10.

Gratiae Dei, et naturae, sunt motus diversi,
l. 3, c. 54.

Gratiae divinae vis ac necessitas. l. 3, c. 55.

Gratiae divinae efficacia; item corruptae naturae mala. ib.

Gratia occultanda est sub humilitate. l. 3, c. 7.

Gratia recedente qualis homo remaneat. l. 2,
c. 8.

-H.

Habitus Religiosorum qualis. l. 1, c. 25.

Homo mendax est, ideo in omnibus non ei credendum. l. 3, c. 45.

Homo debet in hoc mundo esse instar peregrini cuiusdam et exulis. l. 1, c. 23.

Homo vere internus, numquam se in totum ad externa diffundit. l. 2, c. 1.

Homo existimare debet, se omni consolatione indignum. l. 3, c. 42.

Homini, interius non sese colligentis, mala;
l. 2, c. 5.

- Honores spernendi.** l. 3, c. 41.
Humilis se vilem aestimat. l. 3, c. 8.
Humiles fuerunt omnes Sancti. l. 2, c. 10.
 cum Humili quid agat Deus. l. 2, c. 2.
Humiles et pauperes multa pace fruuntur.
 l. 2, c. 6.
Humiliare se sub omnibus decet, et nulli se
 praeferre. l. 1, c. 7.
Humilis sui ipsius submissio. l. 2, c. 2.
Humilitas est custos gratiae internae. l. 3, c. 7.
Humilitas retinenda est in doctrina et scientia.
 l. 1, c. 2, c. 3.
Humilitas et veritas est retinenda in conver-
 satione cum Deo. l. 3, c. 4.
Humilitas acquiritur per communionem. l. 4,
 c. 15.

I

- Iesus est super omnia amandus.** l. 2, c. 7.
 cum Iesu familiaritas optima. l. 2, c. 1, c. 8.
Iesus quomodo amitti soleat. l. 2, c. 8.
Illuminatio mentis ut impetretur, oratio.
 l. 3, c. 23.
Imitatio vitae Christi. l. 1, c. 1, l. 3, c. 56.
Imperfectiones aliorum patienter tolerandae.
 l. 1, c. 16, l. 2, c. 3.
Inconstantia seu instabilitas. l. 3, c. 33.
Inferni ignis quidnam comburat, et quam sit
 ipse gravis. l. 1, c. 24.
Infirmittatis propriae, atque miseriarum hu-
 jus mundi, confessio. l. 3, c. 20.

ex Infirmirate pauci evadunt meliores. l. 1, c. 23.

Injuriae sunt aequo animo ferendae. l. 3, c. 19, c. 36.

Injuriis laceffitus fuam confidentiam debet in Deo reponere. l. 1, c. 24, l. 3, c. 46.

Inquieti fieri quinam foleant. l. 1, c. 9.

Inquirere de aliorum ftatu et vita, eft periculofum. l. 3, c. 24.

Inftabilitas inquieta. l. 1, c. 9.

pro intellectus illuminatione oratio. l. 3, c. 23.

Intentio in omni re debet effe recta, atque in Deum ferri. l. 2, c. 4, l. 3, c. 31.

Judicium Dei metuendum. l. 1, c. 24.

in Judicio extremo examen quibus de rebus fiet, aut non fiet. l. 1, c. 3, c. 24.

Judicia Dei non funt fcrutanda. l. 3, c. 24, c. 58.

Judicia Dei qui confideravit, de fe facile fentiet humiliter. l. 3, c. 14.

Judicia temeraria rejicienda funt. l. 1, c. 14, l. 2, c. 6, l. 3, c. 36.

Judicandus nemo eft, etfi malus appareat. l. 1, c. 2.

Judicio proprio ftandum non eft. l. 1, c. 4, c. 9.

L.

Lapfus in verbo facilis. l. 3, 45.

Lapfus non debet desperare. l. 3, c. 57.

Laudes et vituperia aliorum non sunt curanda. l. 2, c. 6.

Lectio Scripturae sacrae animae necessaria.
l. 4, c. 11.

Lectio sacrae Scripturae qualis esse debet.
l. 1, c. 5.

Lactitiam veram mali numquam habent. l. 2,
c. 6.

Levitates maxime nocent homini. l. 1, c. 21.

**Libertas cordis magna, est resignatio sui in
Deum.** l. 3, c. 37.

Libertas nimia est noxia. l. 1, c. 21.

**Libri pii sunt subinde legendi, maxime qui ad
compunctionem conferunt.** l. 1, c. 3.

Libri pii quomodo legi debeant. l. 1, c. 5.

Litterae sacrae. vide, Scriptura sacra.

**Loci mutatio saepe animum non facit tran-
quillum.** l. 1, c. 9.

Locutio interna Christi cum anima. l. 3, c. 1,
c. 2, c. 3.

**Loqui et confabulari cur tantopere inter nos
desideremus.** l. 1, c. 10. quanta sint illa,
de quibus ut plurimum loquimur. l. 1,
c. 10.

M.

Magistrum qui habet Christum, is felix est.
l. 1, c. 3.

Magnus quis vere sit. l. 1, c. 3.

**Mendax est homo, ideo in omnibus ei non
credendum.** l. 3, c. 45.

Mens exponit Deo suum desiderium, quatenus a peccatorum periculis liberari possit.

l. 3, c. 26.

Mentis illuminatio ut impetretur, oratio. l. 3, c. 23.

Merita nostra non sunt ex consolatione aestimanda. l. 3, c. 7.

Miraculo majus est, scire latere, et sui curam gerere. l. 1, c. 20.

Miseria humana magna est. l. 1, c. 22, l. 3, c. 20.

Miseriae humanae patienter ferendae sunt. l. 5, c. 18, c. 20.

Miseriae humanae consideratio, et felicitatis aeternae. l. 3, c. 18.

Miseriarum humanarum consideratio. l. 1, c. 22.

in Missa pro defunctis orandum est. l. 4, c. 9.

Morum emendationi duo conducunt. l. 1, c. 25.

Mors cogitanda, appropinquante die festo. l. 1, c. 19.

Mors multorum varia. l. 1, c. 23.

Mortis meditatio utilis est. l. 1, c. 23.

Mortis memoriae quotidie habenda, tam mane, tam vespere. l. 1, c. 23.

post Mortem quae proderunt, et quae non proderunt. l. 1, c. 24.

in Morte qualis vis inveniri, talis sis in vita. l. 2, c. 23.

Morientem quae poterunt consolari. l. 1, c. 23.

Mortificatus, ex quavis re fructum colligit. l. 2, c. 1.

Mortificatus, magis Deum gustat, quam alius. l. 1, c. 11.

non Mortificatus, facile tentatur et vincitur. l. 1, c. 6.

Mortuorum oblivio. l. 1, c. 3.

Mulierum familiaritas cavenda. l. 1, c. 8.

Mundani non carent et ipsi sua cruce. l. 3, c. 12.

Mundus corde, saepe a Deo docetur. l. 1, c. 3.

Mundo contempto, dulce Christo servire. l. 3, c. 10.

Mutatio loci saepe facit animum non tranquilum. l. 1, c. 9.

N.

Naturae corruptae mala; item Gratiae divinae efficacia. l. 3, c. 55.

Naturae et Gratiae motus sunt plane diversi. l. 3, c. 54.

Necessitatibus corporis subjici et servire, grave est ac permolestum, magnaue est miseria. l. 1, c. 22.

Necessitatibus corporis Sancti liberari optabant. l. 1, c. 22.

Negotia sapienter et prudenter agenda. l. 1, c. 4.

Negotia nostra omnia Deo committere debemus. l. 3, c. 39.

in Negotiis homo non debet esse importunus.
l. 3, c. 39.

O.

Obedientia est res valde magna. l. 1, c. 9.

Obedientia humilis subditi, ad exemplum Christi. l. 3, c. 13.

Obedire alteri, optimum est. l. 1, c. 9.

Obediendum est Superiori, exemplo Christi.
l. 3, c. 13.

Oblatio dignissima, se ipsum pure et integre in Missa et Communione Deo offerre. l. 4, c. 7.

Obrectatorum linguae flocci pendendae. l. 3, c. 28.

Occupatio. vide, Opera.

Oculi non in alios, sed in se ipsum reflectendi sunt. l. 1, c. 21.

Offerre Deo tum nos, tum nostra, debemus, quoties communicamus. l. 4, c. 7, c. 8, c. 9.

Opera et exercitia quotidiana quando fieri debeant, et quando sint intermittenda. l. 1, c. 19.

Opus bonum nonnumquam est intermittendum ob bonum finem. l. 1, c. 15, c. 19.

Opus quodvis ex caritate factum, fructuosum est. l. 1, c. 15.

- Operibus humilibus est insistendum, quando altioribus non possumus.** l. 3, c. 51.
- in Operibus quibusdam putatur esse caritas, cum mera sit sensualitas.** l. 1, c. 15.
- Operatur ille multum, qui multum diligit.** ib.
- Opera nostra debent prius intus ordinari, quam foras prodeant.** l. 1, c. 19.
- Opera, quae ex caritate non fiunt, nihil profunt.** l. 1, c. 15.
- Opiniones aliorum non curandae.** l. 1, c. 11.
- Opiniones et contentiones in scientia sunt evitandae.** l. 1, c. 3.
- Opinionum diversitas.** l. 1, c. 14.
- Oratio ad Dei voluntatem perficiendam.** l. 3, c. 15.
- Oratio, ut impetretur illuminatio mentis.** l. 3, c. 23.
- Oratio ad obtinendam divinam gratiam, contra naturam corruptam.** l. 3, c. 55.
- Oratio pro beneplacito Dei perficiendo.** l. 3, c. 15.
- Oratio contra malas cogitationes.** l. 3, c. 23.
- Oratio pro impetranda devotionis gratia.** l. 3, c. 3.
- Oratio pro impetranda cordis puritate, caelestique sapientia.** l. 3, c. 27.
- Oratio magis elevat mentem, quam lectio.** l. 3, c. 26.
- Otiosus in toto numquam fis.** l. 1, c. 19.

P.

Passio et vita Christi sunt vitas nostrae exemplar. l. 2, c. 1.

in Passione Christi se exerceat, qui alta contemplari non novit. ib.

Passio aliquando est, cum zelus assumatur. l. 2, c. 5.

Passiones sunt mortificandae. l. 1, c. 11.

Passiones suas qui sequitur, sit inquietus: quietem vero sibi acquireret, iis resistendo. l. 1, c. 6.

Passionibus obnoxius qualis esse soleat. l. 2, c. 3.

Passionibus suis resistere durum est. l. 1, c. 25.

Passionibus suis serviens, quomodo sit affectus. l. 2, c. 5.

Passionum aculeis qui urgetur, subinde plus in vita spirituali proficit, quam passionibus vacuus. l. 1, c. 25.

Patientia in injuriis ferendis servanda. l. 3, c. 19, c. 36.

Patientia est necessaria in omni tentatione, item et pugna contra concupiscentias. l. 3, c. 35.

Patientiae exemplar Christus. l. 3, c. 18.

Patientia utendum est omnibus in rebus. l. 3, c. 35.

Patiens vere quis sit. l. 3, c. 19.

Patiens ut quis fiat, quid sit expendendum. l. 3, c. 12.

- Pati qui novit, sentiet Dei in se auxilium.** l. 2, c. 2.
- Pati modicum qui nescit modo, quomodo poterit inferni aut purgatorii poenas perferre?** l. 1, c. 24.
- Pauperem te videri, non te pudeat.** l. 1, c. 7.
- Pax super humilem et pauperem spiritu requiescit.** l. 1, c. 6.
- Pax animi quomodo acquiritur.** l. 1, c. 11.
- Pax animi non est in affectibus inordinatis.** l. 1, c. 6.
- Pax cordis quibus in rebus sita sit.** l. 2, c. 6, l. 3, c. 25.
- Pax talis non est quaerenda, quae omni pugna careat.** l. 3, c. 12.
- Pax saepenumero dissolvitur ex opinionum diversitate.** l. 1, c. 14.
- Pax nostra non debet pendere ex ore et sermone hominum.** l. 3, c. 28.
- Pax non est in hominibus ponenda.** l. 3, c. 42.
- in Pace quidam sibi videntur tunc esse, quando ipsis cuncta ex voto cedunt.** l. 1, c. 14.
- Pacem cordis quinam habeant.** l. 2, c. 6.
- quae Pacem unicuique afferunt, quatuor sunt.** l. 3, c. 23.
- qui Pace frui desiderat, in multis debet se frangere.** l. 1, c. 17.
- in Pace multa erit, qui se non involvet verbis factisque aliorum.** l. 1, c. 11.
- Pacificus homo qualis sit.** l. 2, c. 3.

Pacificorum multiplex genus. l. 1, c. 3.

Peccata sunt ignis inferni atque purgatorii materia. l. 1, c. 24.

Peccatorum poenae. ib.

Peccatum nullum umquam est perpetrandum in gratiam alicujus personae, aut propter rem aliquam. l. 1, c. 15.

ad Peccandum proclivis est natura humana. l. 1, c. 22.

Poenitentia sanctorum Patrum qualis olim. l. 1, c. 18.

Peregrini omnes hic sumus. l. 1, c. 17, c. 23.
instar Peregrini homo in hoc mundo debet se gerere. l. 1, c. 23.

Peregrinando raro homines sanctificantur. ib.

Perfectio omnis habet imperfectionem admixtam. l. 1, c. 3.

Pericula cum adsunt, ad Deum confugiendum est. l. 3, c. 38.

Placere sibi ipsi, Deo ingratum est. l. 1, c. 7.

Præcipitem non esse, et sensui suo non inhaerere ; magna est sapientia. l. 1, c. 4.

Praeferre se aliis non decet. l. 1, c. 7.

Praemia vitae aeternae proposita laborantibus et patientibus. l. 3, c. 49.

Probantur in terra servi Dei, caelestia praemia expectantes. ib.

Profectus spiritualis. l. 1, c. 11.

Profectus noster quibus in rebus sit positus. l. 3, c. 24.

Profectus noster qualis sit, tentatio declarat.

l. 1, c. 13.

ad Profectum conferunt sequentia: si te hic gesseris adinstar peregrini. l. 1, c. 17. **Vitas Sanctorum frequenter legendo.** l. 1, c. 18. **Si ut stultus volueris reputari.** l. 1, c. 27. **Si frequenter tua, tum externa, tum interna, examinaveris.** l. 1, c. 29. **Si in silentio et quiete vixeris.** l. 1, c. 20. **Si vim tibi ipsi intuleris.** l. 1, c. 11. c. ult.

Profectus cito in Religione perit, quando tantum habetur caerimoniarum ratio. l. 1, c. 11.

Profectus magnus fieret, si singulis annis saltem vitium unum evelleremus. ib.

Profectus noster talis est, quale est propositum nostrum. l. 1, c. 19.

Profectus noster debet quotidie crescere. l. 1, c. 11.

Profectus nostri negligentia efficit, ut parum ad id quod loquimur, attendamus. l. 1, c. 10.

Propositum nostrum bonum, quotidie est renovandum. l. 1, c. 19.

Propositum bene agendi, ac sese emendandi, minime differri debet. l. 1, c. 22.

Propositum infirmum. ib.

Propositum suae vocationis negligere, nocet plurimum. l. 1, c. 35.

Prudentia in agendo. l. 1, c. 4.

Prudens vere quisnam sit. l. 1, c. 3.

Purgatorii ignis materia sunt peccata. l. 1.

c. 25.

Purgatorium patientis et iusti sunt tribulationes, et adversarii. l. 1, c. 24.

Puritas cordis ut impetretur, oratio. l. 3.

c. 27.

Puritas cordis quaerenda. l. 2, c. 4.

Pusillanimis ne fias si forte lapsus fueris. l. 3.

c. 57.

Q.

Quies qua in re invenitur. l. 2, c. 1.

Quies in solo Deo ponenda. l. 3, c. 27.

Quotidianum hominis studium debet esse, vincere se ipsum. l. 1, c. 3.

Quotidie bonum propositum est renovandum.
l. 1, c. 19.

R.

Refugium nostrum Deus esse debet. l. 3,
c. 38.

Religiosi debent (Christi exemplo) Superiori obedire. l. 3, c. 13.

Religiosorum habitus. l. 1, c. 25.

Religionis fervor intepest. l. 1, c. 18.

in Religionis ingressu, malum omnino signum, intepest. l. 1, c. 22.

in Religionis ingressu nonnulli sunt meliores quam in progressu. l. 1, c. 11.

- Religiosum esse**, magna est gratia. l. 3, c. 10.
- Religiosus debet saepe cogitare ad quid venerit**. l. 1, c. 25.
- Religiosus qualis debeat esse, ut pacem habeat**: et quae sint illius exercitia. l. 1, c. 17. c. 19.
- Renovatio spiritus exuit veterem hominem, sicut ferrum in igne amittit rubiginem**. l. 2, c. 4. vide, *Propositum*. *Emendatio vitae*.
- Requies aeterna Sanctorum**, Deus. l. 3, c. 21.
- Requies qua in re invenitur**. l. 2, c. 1.
- Resignatio sui plena ad Dei nutum et voluntatem**. l. 3, c. 17.
- Resignatio sui ipsius in Deo, magnam affert cordis libertatem**. l. 3, c. 37.
- Resignatio plena in Deo omnibus in rebus, et in cunctis desideriis**. l. 3, c. 15.
- Res altae non sunt scrutandae**. l. 3, c. 38.
- Res externae quomodo a nobis tractari debent**. ib.
- Revelare sua secreta cui oportet, bonum est: cui vero non oportet, malum**. l. 1, c. 8.

S.

- Sacerdotum dignitas**. l. 4, c. 5.
- Sacra Scriptura**. vide, *Scriptura*.
- Saluti animae in primis incumbendum**. l. 1, c. 3.

Sanctorum vita qualis olim fuit, quam fervida. l. 1, c. 18.

de Sanctorum gloria disputare, utputa quis in ea sit major vel minor, stultum est, Sanctisque ingratum. l. 3, c. 58.

Sapientia summa, est cognitio sui. l. 1, c. 2.

Sapientia quae vera sit. l. 1, c. 1.

Sapientia magna est, non esse in agendis precipitem, suoque sensui non fidere. l. 1, c. 4.

Sapiens ille est, qui res tales aestimat, quales sunt. l. 2, c. 1.

Sapientes qui sunt sibi ipsis, in periculo versantur. l. 3, c. 7.

Satiari nemo hic potest. l. 1, c. 1.

Scientia multi perierunt. l. 1, c. 2.

Scientia vera quae sit. ib.

Scientia nostra habet quamdam imperfectiorem annexam. l. 1, c. 3.

Scientia quae probanda, et quae improbanda. ib.

Scientia non est culpanda, sed bonae vitae major habenda est ratio. ib.

Scientia absque humilitate non prodest. l. 1, c. 1, c. 2.

Scientia hominis parva est; ignorantia autem ejus maxima. l. 1, c. 2.

Scientiae secularis contemptus. l. 3, c. 43.

Scriptura sacra est nobis necessaria. l. 4, c. 11.

- Scriptura sacra, quomodo legi debeat. l. 1,
c. 5.
- Secreta sua revelare cui oportet, bonum est;
cui non oportet, malum. l. 1, c. 8.
- Securitas hic nulla. l. 1, c. 20.
- Sensualitas in quibusdam operibus, putatur
esse caritas. l. 1, c. 15.
- Sensualitatem suam sequi, malum est. l. 1,
c. 1.
- Sententiae non sis tenax. l. 1, c. 9.
- Servire Deo, dulce est. l. 3, c. 10.
- Servire aliis, decorum est. l. 1, c. 7.
- Silentii et Cellae fructus. l. 1, c. 20.
- Simplices et puri corde a Deo docentur. l. 1,
c. 3.
- Simplicitas debet esse in intentione, puritas in
affectione. l. 2, c. 4.
- Simplicitate atque puritate mentis sublevatur
homo a terrenis. ib.
- Solitudo quaerenda interdum, et amanda. l. 1,
c. 20.
- Sollicitudo omnis, in Deo ponenda est. l. 3,
c. 17.
- Spes, seu fiducia, in solo Deo ponenda est.
l. 1, c. 7, l. 3, c. 59.
- Sperans de Dei auxilio, debet interim facere
quod in se est. l. 1, c. 25.
- Spiritus renovatio exuit veterem hominem, si-
cut ferrum in igne amittit rubiginem. l. 2,
c. 4. vide, Emendatio vitae.

Spiritalia impediunt necessitates hujus corporis. l. 1, c. 21.

Studium nostrum esse debet in extirpandis vitiis, et in virtutibus inserendis. l. 1, c. 3.

Studium quotidianum hominis esse debet, vincere se ipsum. ib.

Stultus fias propter Christum, si vis religiosam ducere vitam. l. 1, c. 17.

Subjectio est res valde magna. l. 1, c. 9.

Superbi et avari nulla pace fruuntur. l. 1, c. 6. vide, Docti. Tentatio.

Superior quis sit idoneus. l. 1, c. 20.

T.

Tempus praesens est valde pretiosum. l. 1, c. 23.

Tempus praesens nobis concessum est, ut nos praeparemus ad mortem. l. 1, c. 19.

Temporis summa habenda ratio. l. 1, c. 25.

Temporalium rerum vanitas. l. 1, c. 7.

Tentationes sunt utiles. l. 1, c. 13.

a Tentatione nemo liber est. l. 1, c. 22.

per Tentationes transferunt omnes Sancti, et profecerunt. l. 1, c. 13.

eorum qui tentantur, varia genera. ib.

Tentationes quomodo sint perferendae. l. 1, c. 13.

Tentatione una recedente, alia atque alia succedit. l. 1, c. 13. item l. 3, c. 20.

Tentationes pro gloria aeterna sunt tolerandae. l. 3, c. 47.

**Tentationibus viri perfecti quandoque pulsan-
tuntur.** l. 1, c. 13.

**Tentationum initium, progressus, et quo pacto
illis sit resistendum.** ib.

Tentatio est vita hominis. l. 1, c. 13. l. 3,
c. 35.

**Tentationes aequo animo patientibus, quanta
bona sint promissa.** l. 3, c. 49.

**Tentationibus non omnino carere, quibusdam
expedit.** l. 1, c. 20.

**Tentationum nulla securitas, et nullus finis
in hac vita.** l. 3, c. 35. vide, Patientia.

Tepor in religionis ingressu, malum signum.
l. 1, c. 11.

**Terrena sunt aspicienda per modum transe-
untis.** l. 2, c. 1.

**Timor Domini praesens, liberat a timore
mortis futurae.** l. 1, c. 23.

Tribulatio homini necessaria est. l. 1, c. 13.
ejus quanta utilitas. l. 1, c. 12.

in Tribulatione gloriandum. l. 2, c. 6.

**in Tribulatione magis necessarium sibi Deum
intelligit homo bonae voluntatis.** l. 1, c.
12. vide, Tentatio.

**Tribulationes inveniet, qui non quaerit Je-
sum.** l. 1, c. 17.

Tribulationes passi sunt omnes Sancti. l. 1,
c. 13.

de Trinitate disputare, Deo non placet, si careas humilitate. l. 1, c. 1.

Tristitiae iustae materia sunt peccata et vitia nostra. l. 1, c. 21.

Tristitiae causae multae hic sunt. ib.

V.

Vacare sibi ipsi in secreto, optimum est. l. 1, c. 20.

Vanitas quibus in rebus insit. l. 1, c. 7.

Vanitas maxima, sectari opes, honores, vitam longam amare, transitoria quaerere, &c. l. 1, c. 1.

Verbo labi, est facillimum. l. 3, c. 45.

Verba Christi interna ad animam fidelem. l. 3, c. 1.

Verba superflua sunt omnino refecanda. l. 1, c. 10.

Verba contumeliosa patienter toleranda. l. 3, c. 46. floccipendenda, ib.

Verba qualia in colloquium adduci debeant. l. 1, c. 10.

Veritas ipsa tandem aliquando a verbis hominum improborum liberat. l. 3, c. 4.

Veritas retinenda in conversatione cum Deo. ib.

Veritas aeterna amanda super omnia. ib.

Via regia sanctae crucis. l. 2, c. 2.

Via ad Deum, potius per sui cognitionem habetur, quam per scientiam. l. 1, c. 3.

Vilitas hominis maxima, debet sibi semper displicere. l. 3, c. 4.

Vincere se ipsum, debet esse quotidianum studium hominis. l. 1, c. 3. vide, Mortificatio.

Virtus non comparatur nisi diligentia. l. 1, c. 25.

Vis sibi inferenda ad profectum. l. 1, c. 11, c. ult.

Vita hominis tentatio est. l. 1, c. 13, l. 3, c. 35.

Vitae Christi imitatio. l. 1, c. 1, l. 3, c. 56.

Vitae aeternae consideratio. l. 3, c. 48.

Vitae aeternae praemia proposita laborantibus et patientibus. l. 1, c. 49.

Vitae emendatio. l. 1, c. 25.

Vitae emendationi duo conducunt. l. 1, c. 25.

Vita Sanctorum olim qualis. l. 1, c. 18.

de Vita alterius inquisitio curiosa evitanda. l. 3, c. 24.

propter Vitam aeternam quidvis perferendum est. l. 3, c. 47.

Vitam longam quidam amant, tametsi miseram. l. 1, c. 22.

Vituperia et laudes aliorum non curanda. l. 2, c. 6.

Voluntas Dei omnibus in rebus quaerenda est. l. 3, c. 15.

ad Voluntatem Dei perficiendam oratio.


l. 3, c. 15. vide, Resignatio sui.

Voluptatum contemptus. l. 3, c. 32.

Z.

**Zelus quandoque aestimatur, cum tamen sit
passio. l. 2, c. 5.**

**Zelus primo ad se, quam ad alios habendus.
l. 2, c. 3.**



V I T A

THOMAE A KEMPIS,

CANONICI REGULARIS,

EX VARIIS AUCTORIBUS

A B

HERIBERTO ROSWEYDO

CONCINNATA.

IN HAC EDITIONE AB INCREDIBILIBUS
EXPURGATA.

THOMAS A KEMPIS oriundus est Kempis, quod permodicum est in agro et dioecesi Coloniensi oppidum, unde cognomen quoque ei adhaesit. parentes habuit Joannem et Gertrudem, si seculum spectes, nullo quidem generis splendore, nulla divitiarum opulentia conspicuos, sed quibus omnis nobilitas in pietate, census in vitae probitate erat. manuum igitur labore vitam suam tolerantibus, recula sua bene contenti vivebant. quibus gemina proles mascula obtigit, (de pluribus cer-

M

te non liquet;) Joannes et Thomas: quorum ille natu grandior, studiorum curriculo Daventriae confecto, Gerardi Magni familiaritate usus, ad omnem vitae honestatem efformatus est, et in Ordine Canonice Regularium, et disciplina Capituli Windesemensis, variis perfunctus muneribus, feliciter obiit.

Thomas igitur noster natalem habuit circa annum Virginis partus M. CCC. LXXX, Urbano VI, orbis universi pontificium, et Carolo IV, imperium administrante. postquam primam aetatem sub parentum oculis exegerat, et jam capeffendis literarum studiis idoneus videbatur, Daventriam (quae Trans Iulanae ditionis metropolis est) se contulit; tredecenni, ut colligere licet, non major. Daventriam ut peteret, Florentii cum, Sacerdotis cumprimis pii ac eruditi, et fratrum Clericorum praefecti, fama exciverat, quam crebra commicantium studiosorum turba celebrabat. florebant tunc ibi bonarum artium studia, ut Belgicae Athenaeum diceret.

Ubi Daventriam pervenit, prima illi cura fuit de fratre suo germano inquirere, ut ejus consilio et opera (nam tunc illi vel nullum peculium erat) ad studia capeffenda dirigeretur. commendatus igitur Domino Florentio (nam Gerardus Magnus anno M. CCC. LXXXIV. jam e vivis excesserat, cum Tho-

mas noster quadriennis tantum esset) ab eo exceptus est perhumaniter ; qui ei de domo, de libris, de victu prospexit. hac occasione bonae indolis et honestae frontis adolescens, dum inter illustres pietate et eruditione viros, qui in Florentii viventes consortio, religione, vitae innocentia, morum sinceritate elucebant, quotidie versatur, mores eorum expressit, quorum delectabatur consuetudine ; domi sedulus, in scholis assiduus, in templo frequens. ubi paucis annis eos non in studiis magis quam pietate progressus fecit, quos tot conscripta ab eo, numquam satis laudata, testantur volumina. dum in collegio fratrum Clericorum versatur, quidquid calligraphia lucrari potuit (nam antiquarii manu valebat) omne id manupretium in commune subsidium conferebat. —

Cum jam septennio consuetudine Domini Florentii reliquorumque fratrum usus esset, atque omnium virtutum numeris se omnibus probasset, exarsit in eo religionis ardor, cujus igniculos D. Florentius animo ejus subinde subjecerat. Anno igitur M. CCC. XCIX, antequam Florentius e vita migraret, Thomas noster ad montem sanctae Agneti sacrum, qui proxime Swollenfi imminet civitati, concessit ; ubi recens tunc monasterium Canoniorum Regularium, sub D. Augustini habitu Regulaeque militantium, ad Vidrum amnem constructum erat. erat ea domus ea tempestate

admodum obscura, paucissimis nota, raroque (ut sunt fere omnium rerum exordia humilia et difficilia) colebatur cive. ubi in montem hunc Florentii litteris commendatus advenit, a fratre suo germano, qui ei tunc monasterio primum cum potestate Prioris praeerat, exceptus est sane perquam humaniter, et in caeleste hoc jubilum simul erupere: quam bonum et quam jucundum est habitare fratres in unum!

Hic igitur religionis candidatus, etsi praeservide religionem expeteret; ne quid tamen temere, ne quid praepropere ageret, fervorem suum temporis mora, quae una prudentiam parit, omnino temperavit. post, quinque annos igitur in tirocinio positos, sexto demum sacrum habitum induit; et sequenti, sacro se voto ei vitae generi obstrinxit. hic in primis egregia in Deum pietate, erga superiores observantia, in collegas suos caritate et benevolentia valde emicuit. otio, malorum omnium fonti, numquam indulgit; sed vel sacris libris lectitandis, vel in communem usum scribendis, vel ingenio suo procudendis, se exercebat: quod ille concubia plurimum nocte a matutinis laudibus factitabat, se geniumque defraudans suum, laesa etiam corporis valetudine, quo de omnibus pietatem colentibus quam optime mereretur. super sunt etiamnum universa biblia, in quatuor tomos dispertita, ingens praeterea, missarum

liber, et nonnulla sancti Bernardi Opuscula, praecellenti arte et magna industria a Thoma conscripta.

In oratorio, et ecclesiasticis muneribus, dictu difficile, quam reverenti praesentique animo omnia obierit. dum psalleret, vultu semper in caelum sublato, sacro enthusiasmo afflatus, dulcedine nimirum psalmorum incredibili captus, et extra se raptus, advertebatur: sic, ut nonnumquam calcibus, non terrae haereret infixus, sed summis dumtaxat pedum digitis solum contingens, reliquo corpore in caelum subvolare, ubi animo et desiderio agebat, meditaretur. in psallendo erecto corpore consistebat perpetuo, numquam sedili vel brachio vel tergo innitens. ingredientium oratorium nocte dieque primus, egredientium semper postremus erat. divinus cultus et ecclesiasticum decus mirifice illi cordi erat: adeo ut semel cuidam joculariter dicenti, videri sibi felicem Thomam, nec admiratione dignum magnopere, quod tanta vocis alacritate, animi promptitudine, et pietate, psalmos decantaret. —

Ejus sermo omnis de Deo et sacra Scriptura. in praesentia gravium virorum, si ipso praesente forensia aut mundana agitantur, velut mutus ac elinguis sedebat; nec respondebat, ne rogatus quidem, nisi insigni alicujus rei commoditate illectus: quasi ignarus rerum, de quibus commentabantur, omnium.

porro si de Deo rebusque caelestibus haberetur sermo, mox postulatus sententiam, velut limpidissimus fons, perpetuis verborum rivulis scaturiens loquebatur, aut potius profuebatur, rogatus ex tempore, in quorundam commodum, numquam abnuvit declamare; quod tamen non fecit nisi aliquo ad meditandum capto tempore, aut degustato paululum somno. ea vero dicendi facultate facilitataque pollebat, ut complures saepenumero ex urbibus locisque remotioribus fama exciret, et certatim ad montem S. Agnetis confluerent, quos cum audiendi cupido inceserat.

Non minima sodales ejus cepit admiratio, cum considerarent ejus in adversis rebus laete ferendis tolerantiam; patientiam in hominum vitiis non solum aequabiliter tolerandis, sed et benigne excusandis; in omni vita sobrietatem, pudicitiam, verecundiam; sedulitatem in provehendis fratrum commodis; in templi procurando cultu et ornatu impensum studium; in precibus non minus flagrantiam quam frequentiam, lacrymarum profusionem, et reliqua solidae pietatis testatissima indicia. tanta vero erat in eo vanitatum illecebrarumque mundi despicientia, ut praeter divina, fluxa omnia, velut ad se nihil pertinentia, adeo negligeret, ut illorum appellationes usumque addiscere gravaretur.

Dum animo medetur, corpori quoque curam adhibuit: quod adeo non neglexit, ut certis in septimana diebus pro more habuerit flagro sese affligere, hymnum illum, sicut Iesus, decantando.

Sacrae lectionis, cellaeque suae, ita amans fuit, ut hoc symbolum saepius ore proferret, librisque suis inscriberet: In omnibus requiem quaesivi, sed non inveni, nisi in HORTIS OUD BOXTINS: quod postremum Teutonice Latine sonat, nisi in angelis et libellis; quietem invenendam insinuans in abditis recessibus et libellulis.

Porro sic affabilis et mansuetus fuit, ut, multum licet reluctans, communi suffragio superior, aetate adhuc florente, crearetur. postea oeconomiae praefectus seu procurator, quod propensus ad eleemosynas videretur, constitutus est: quam provinciam etsi obibat diligenter, nihilominus, quoniam a contemplatione et piis libellis conscribendis nimium avocabatur, ab eo officio liberatus est, et post multos annos iterum communi suffragio in superiorem electus.

Saepe accidit, ut dum inter fratres versaretur, et cum illis sermonem misceret, intus Deum se alloquentem manifeste sentiens, modeste petita venia, quasi quispiam eum conventum expetens opperiretur, discederet in cubiculum: ibi cor suum coram Domino effundens, hauriebat illam sapientiam,

quam in ejus sanctissimis libellis omnes pii admirantur. hinc frequens discipulorum numerus ejus stipabat cellulam, ut suavissimis ejus moribus, verbisque nectare manantibus, frui possent. nec unusquisquam accessit, qui non doctior, non pientior inde rediret. —

Statura corporis fuisse dicitur infra mediocritatem, forma viro convenienti, colore in vultu vivide, sed fusco; acie oculorum perspicacissima (quod etiam Moyse obtigisse legimus), ut nunquam, vel capulo proximus, sit usus conspicio.

Cum jam annos LXXI (comprehensio simul tirocinio) in monte S. Agnetis religiosam vitam magna cum laude et sodalium fructu duxisset, evocatus est a Domino in montem aeternitatis, quem toties prospexerat, ad quem toties anhelarat; et beata anima, testaceo corporis relicto hospitio, in aeterna tabernacula immigravit, Deo suo aeternum fruitura. mortualis illi dies fuit anno aetatis suae XCII. partae per Christum salutis M. CCCC. LXXI. octavo kalendas Augusti.

V I T A

THOMAE A KEMPIS.

AUCTORE INCERTO, PENE COAEVO.

HIC Thomas, cognomento Hammerlein, id est, Malleolus, qui vere malleus existens in suis dictis et tractatibus, devotis et indevotis: devotis, per suos tractatus excitando et percutiendo corda eorum ad maiorem devotionem, et profectum virtutum; et gratiarum actiones; sed indevotis existens malleus, videlicet corda eorum excitando ad compunctionem et recognitionem propriae infirmitatis et imperfectionis, et ad emendationem vitae compellendo, tentatos et tribulatos consolando et roborando, et in omnibus viam incipiendi, proficiendi, ac perficiendi, ostendendo; ut merito sibi adscribendum sit jam illud: Qui erudiunt multos, erunt quasi stellae in perpetuas aeternitates.

Multum affabilis et consolatorius fuit infirmis et tentatus iste bonus et devotus pater, et valde zelosus pro salute animarum, et omnes cupiebat salvos fieri sicut se ipsum: ideo scriptis et admonitionibus, instructionibus, modis quibuscumque potuit, alios etiam se-

cum trahere ad regnum caelorum nitebatur, sicut S. Gægorius hortatur in quadam Homilia, &c.

Et quia in juventute coepit congregare divitias, scilicet virtutum, ideo sortitus est nomen bonum: et illud Threnorum tertio impletum est in eo, scilicet: Beatus vir, qui portaverit jugum Domini ab adolescentia sua: sedebit solitarius et tacebit, quia levabit se super se.

Quod hoc sit impletum in eo, consideratur omnino in tractatibus ejus, et praecipue in soliloquio animae, quod composuit: ubi Christus sponsus ejus loquitur cum anima ejus, scilicet sponsa sua. ibi consideratur, quomodo sedebat solitarius, et tacebat, et levabat se super se, &c.

Iste bonus pater solitus erat dicere, quando fuit cum conventu spatiando, vel cum aliis, quando sensit inspirationem, quando sponsus ejus (scilicet Iesus Christus) voluit cum sponsa loqui, tunc humiliter petiit licentiam, dicendo: dilecti fratres, oportet me ire; unus me exspectat, in cella. et fratres pie annuentes petitioni ejus, multum aedificati fuerunt. et sic impletum fuit in eo illud: Ducam eum in solitudinem, et ibi loquar cum eo. et ipse Thomas ad Dominum illud: Loquere, Domine, quia audit servus tuus. quid tunc loquebatur Domino, et quid loquebantur ad invicem, ha-

bemus in tractatu ejus de Interna Christi locutione ad animam fidelem; qui tractatus habet hoc idem pro themate, in secundo capitulo: Loquere, Domine, quia audit fervus tuus. quod Samuel propheta etiam dixerat ad Dominum, quando Dominus eum vocaverat, &c.

Item adhuc multa alia plura de ejus vita et conversatione audiui a fratribus illius conventus, qui adhuc vivunt, quod vix millesimam partem enarravi scribendo. sed quid dicam amplius? sicut alios docuit et instruxit dictando et scribendo, sic ipse fecit vivendo; opere implevit, quod sermonibus dixit faciendum.

Hic Thomas Kempis, cognomen habens Malleus, natus fuit de civitate, cui nomen Kempis, dioecesis Colonienfis: qui studuit Daventriae in domo fratrum, scilicet Clericorum, qui ingeniosus et docilis fuit et tractabilis; et ideo multum fuit amabilis Domino Florentio et ejus fratribus: qui postea vocatus a Deo per inspirationem ad servandum Deo viventi, acquievit cito inspirationibus divinis, ne sibi impropinquaret Dominus illud: vocavi, et tenuisti: et illud sibi contingeret: vocabis tu me in orationibus, sed non exaudiam te, quia tenuisti vocem meam audire. sed fecit iste Thomas Kempis, sicut scriptum est de S. Andrea, mon, ut audivit vocem Do-

mini vocantis se, relictis omnibus quæ hujus mundi sunt, intravit Ordinem Canonicorum Regularium, qui tunc temporis in brevi fuerat reformatus, in domum scilicet in monte S. Agnetis prope Swollis, anno Domini M. cccc. et fuit investitus ibidem anno Domini M. cccc. vi. et sic fuit per sex annos probatus, antequam investitus: quia tunc temporis fuit consuetudinis, quod sic probantur prius, antequam investiantur, tamquam aurum in fornace; ideo aurum probatum fuit: Quia qui non est probatus et tentatus, qualia scit? et quia acceptus erat Deo, ideo necesse fuit ut multis tentationibus et exercitationibus et humiliationibus probaretur, ut postea sciret aliis dare remedium, sicut in se et in aliis fuit expertus sæpe: sicut et fecit in suis sermonibus et tractatibus.

Hic Thomas multum profecit in virtutibus, de die in diem proficiens, addens semper fervorem fervori, devotionem devotioni, virtutem virtuti; ita ut omnes mirabantur de ejus fervore et devotione. et quia multum humilis fuit, ideo a Deo magnam et singularem gratiam meruit habere, sicut patet ex dictis ejus.

Item bis supprior fuit, et semel procurator: et quia multum fuit internus et devotus, et ideo simplex in temporalibus rebus, ideo depositus fuit ab officio procuratoris, et in

suppriorem iterum electus : quia sic majorem fructum dictando, contemplando, orationibus insistendo, fecit. quod fratres considerantes, fecerunt sibi misericordiam, eum sublevando ab exterioribus.

Anno Domini M. cccc. lxxi. obiit iste devotus pater Thomas Kempis ; et sic serviebat Domino in Ordine Canonicorum Regularium lxx. annis, in magna austeritate vitae, et fervore spiritus.

THOMAE DE KEMPIS

V I T A,

EX VALERII ANDREAE BIBLIO-
THECA BELGICA IN 4^o.

THOMAS A KEMPIS (oppidulo in agro et dioecesi Colonienſi) cognomento Mallecolus, vulgo Hamerken, natus circa annum cIoccc. Lxxx. puer tredecennis Daventriae ad Ifalam et artium liberalium et pietatis ſtudia ſectatus fuit in collegio fratrum clericorum communiter viventium, ſub diſciplina Florentii fratrum praefecti. inde Canonicis Regularibus in monte S. Agnetis apud Swollam, ditionis Trans-Ifalanae oppidum, anno cIo cccc, a fratre ſuo germano Joanne, qui primus titulo prioris eidem monaſterio praefuit, adſcriptus, probatusque per quinque annos, ſexto demum anno ſacrum habitum induit, ac religionem anno ſeptimo profeſſus eſt. in qua veri religioſi omnes explevit numeros, functus ſupprioris ac procuratoris munere, comis et affabilis omnibus, at-

que in primis vitae innocentia sanctimonia-
que conspicuus erat; adeo ut plurimos sui
visendi et audiendi causa ad se attrahe-
ret. sermo illi omnis de Deo, et sacra
Scriptura, cujus lectioni mire addictus;
cellaeque suae ita amans fuit, ut hoc sym-
bolum saepius usurparet, librisque inscribe-
ret: In omnibus requiem quaevisi, sed non
inveni, nisi in angello cum libello. num-
quam otiosus, semper vel lestitabat ali-
quid vel in communem usum scribebat,
vel pro instructione fratrum commenta-
batur. obiit nonagenario major, VIII. kal.
Augusti, anno partae per Christum salutis
cLo cccc LXXI. professionis LV. multa
scripsit, totius orbis iudicio ac testimonio com-
probata, uno volumine excusa, primum
Norimbergae, 1494. fol. deinde Paris. a
Badio, 1520. Venet. 1565, et 1569.
Antv. typis Nutii, 1574. et 1580. 8. et
novissime ex recensione Henr. Sommalii,
S. I. qui libellos omnes distribuit in tres
tomos, lb. 1615. 8. Duaci, typis Belleri,
1635. 8.

Tomo 1. continentur Sermones ad Novi-
tios xxx.

Sermones ad Fratres xlv.

Tom. 11. De Imitatione Christi libri iv.
vere aurei, non Latine solum, sed et Graece,
interprete Georgio Mayr, e Societ. Iesu, Au-
gustae Vindel, 1615. item, Germanice,

Gallice, Hispanice, Lud. Granatensi, et Italice, saepius excusi; imo et Bohemice, interprete Balthasare Osthovino, Bohemo, e Societ. Iesu; Hungarice, interp. Petro Pazmani, ejusdem Societ. Arabice, interp. Caelestino a S. Liduina, Carmelita Discal. Turcice, aliisque linguis. Thomam vero nostrum esse hujus libelli auctorem, non vero aut Joan. Gersonem, Cancellarium Parisiensem, aut Joan. de Gessen vel de Gersen, Abbatem Vercellensem, satis evincit Herib. Rosweyds, e S. Iesu, editis Vindiciis Kempensibus adversus concertationem Constantini Caietani, Romae an. 1616 editam; qui et responsionem apologeticam eidem Rosweydo anno 1618 reposuit. vide Rob. Bellarminum de Script. Ecclesiast. et Ant. Possevinum in Apparatu sacro. ceterum Latiniore fecit hos Thomae libellos Fr. Artopaeus, Tolensis. quod ante illum praestiterat Sebast. Castalio mala fide; libro quarto, qui de Sacramento Eucharistiae tractat, impie et sacrilege sublato.

Soliloquium Animae.

Hortulus Rosarum.

Vallis Liliorum.

De tribus Tabernaculis.

De disciplina Claustralium.

De fidei Dispensatore.

Hospitale pauperum.

Dialogus Novitiorum.

Spiritualia Exercitia Religiosorum duplicia.

Doctrina Juvenum.

De vera cordis compunctione.

De Solitudine et Silentio.

De recognitione propriae fragilitatis.

Epitaphium seu Enchiridion Monachorum.

Manuale Parvulorum.

De elevatione mentis ad quaerendum summum bonum.

Alphabetum parvum Monachi in Schola Christi.

Consolatio Pauperum et Infirmorum.

Orationes piae ac devotae.

De Mortificatione sui ipsius.

De Humilitate.

De Vita bona et pacifica.

Vita boni Monachi.

Hymni et Cantica Spiritualia.

Tomo III. Vita B. Lidewigis Virginis.

Vita Gerardi Magni, institutoris fratrum clericorum in communi viventium: item D. Florentii, et discipulorum utriusque, Joannis Gronde, Joannis Brincherinck, Luberti Berneri, Henrici Brune, Gerardi Zntphanienfis, Amilii Burani, Jacobi de Viana, Joannis Cacabi, vulgo Ketel, Arnoldi Schoonhovii.

Epistolae sex, utiles et religiosae.

Epistola ejusdem De pia memoria Defunctorum, citatur a Joanne Mauburno, in Roseto Exercitiorum Spiritualium, Tit. XII, Alphab. xxxv, ab aliquibus Gersoni inscripta: sed patulum est (inquit Mauburnus) quod non sit ejus.

His postremo accessit Chronicon Monasterii S. Agnetis, edente Herib. Rosweydo. Antv. 1622. 8. apud Balleros fratres.

F I N I S.

Books printed and sold by ROBERT
& ANDREW FOULIS.

In pure Greek, on fine writing
paper, in 4to.

Homeri Ilias, 2 vols
Æschylus
Sophocles

With Latin translations in 4to.

Æschylus, 2 vols
Demetrius Phalereus de elocutione

In pocket volumes the following,

Homeri Ilias, 2 vols
Hippocratis Aphorismi
Xenophontis de Agesilao rege oratio
Pindari opera
Anacreon
Æschylus, 2 vols
Sophocles, 2 vols
Aristotelis poetica
Demetrius Phalereus
Xenophontis Hiero
Theophrasti characteres
Epictetus
M. Antoninus
Aristotelis de mundo
Cebetis tabula cum notulis
Longinus

In Folio.

**C. Julii Caesaris et A. Hirtii de rebus
a Caesare gestis commentarii cum
fragmentis. accesserunt indices lo-
corum, rerumque et verborum. om-
nia, ex recensione Samuelis Clarke,
fideliter expressa.**

In quarto,

C. Julii et A. Hirtii commentarii.

**C. Plinii Caecilii Secundi quae super-
sunt.**

M. Minucii Felicis Octavius.

Boetius de Consolatione Philosophiae.

**In pocket volumes the following
Latin Authors.**

Lucretius

Terentius

Horatius, editio altera

Juvenalis et Persius

Ciceronis opera omnia, 20 vol.

**C. Julii Caesaris et A. Hirtii commen-
tarii. 3 tom.**

**C. Nepotis vitae excellentium impera-
torum**

M. Minucii Felicis Octavius

Boetius de consolatione Philosophiae

**C. Plinii epistolarum libri decem, et Pa-
negyricus Trajano dictus**

GLASGOW, *January 7, 1751.*

ROBERT & ANDREW
FOULIS,

PRINTERS TO THE UNIVERSITY,

Propose to print by subscription

THE

WORKS OF PLATO.

On a new Type, the largest of the Louvre
sizes, just now cut by Alexander Wilson,
M. A. Type-founder to the University :

IN QUARTO, and in FOLIO.

I. In IX volumes in quarto, of which
the Greek in 6 volumes, and the Latin
translation, with the notes, in 3. the
price to subscribers, one penny sterling
per sheet. the whole will be contained in
about 500 sheets; so the price will be a-
bout 2l. 1s. 8d. in quires; on a fair paper.

A number will be printed on a fine large
paper, at two-pence sterling per sheet.

II. In VI volumes in folio, with the
translation on the same page, below; like-
wise at one penny per sheet; and in about
740 sheets; which will amount to about
3l. 1s. 8d.

A number also on the finest writing paper, (the same on which we printed Cicero,) at three half-pence per sheet; which will amount to about 4 l. 12 s. 6 d.

The GREEK shall be accurately printed from the edition of H. Stephens.

The various readings, and his own conjectures, printed on the margin of his edition, shall be printed at the bottom of each page.

Any other readings we can procure, or conjectural emendations, shall also be printed at the bottom of each page, or at the end of the work, with proper distinctions.

The NOTES of H. Stephens, relating to the Greek text, which are printed at the end of his edition, shall also be printed at the end of this.

Also all other notes of any merit, published since his edition, and all which we can procure besides.

The TRANSLATION will be that of FICINUS; but with several corrections published since, and all others which we can procure.

The PUBLISHERS propose to demand no money at subscription : only beg leave to reserve it in their own choice, to call for, at delivery of the volume first printed, which will contain the LAWS and EPINOMIS, ONE GUINEA of the whole price, upon their note to deliver the rest of the work according to the above terms.

N. B. The LAWS and EPINOMIS make about a fifth part of the whole of Plato's works.

GENTLEMEN who chuse to favour this undertaking, and are at a distance, will very much oblige the printers if they take the trouble themselves of transmitting their names to Glasgow, and as quickly as possible; or if, at least, they give notice to the printers, of the person with whom they have subscribed. by either of these means, but especially by the former, the undertakers will both have the satisfaction of knowing their encouragers, and of having it in their power to prevent gentlemen from being disappointed of their copies, or in the size or paper they had chosen.

As the undertakers are to do their utmost to render this edition the most extensively useful, they take this occasion of inviting gentlemen of learning every where to communicate what helps they can, either for establishing the text, correcting the version, or illustrating the philosophy. whatever of this kind is received shall be gratefully acknowledged, printed with the author's name, if not forbid, and his labour suitably rewarded.